



73-9022

TBMM KUTUPHANESI

ترتیب مہربم

قواعد عثمانیہ

اثر خامہ احمد جودت

مکاتیب اعدادیہ نیک دردنجی سنہ سندنہ تدریس اولنق اوزره معارف
عمومیہ نظارت جلیلہ سنجہ قبول اولنشددر .

نظارت مشارالیهانک ۳۶۲ نومرو و ۹ ایلول سنہ ۳۱۵ تاریخی
رخصتنامہ سیلہ طبع ایدلشددر .



معارف عمومیہ نظارت جلیلہ سیلہ مطبعہ عامرہ نیک بالاده کی مهر لرنی
حاوی اولیان نسخہ لرن مکاتبہ قبول اولنماز .

دار الخلافۃ العالیۃ

مطبعہ عامرہ

۱۳۱۷

فیئاتی (۵۰) پارہ در .

مبسملا محمد لامصلولا

معلوم ادبا اولدینی اوزره قواعد عثمانیه که - لسان
عثمانینک قواعد صرفیه ونحویه سنه دأرأک ابتدا یاپلمش
اولان بر اثر در - انجمن دانش طرفندن باتصدیق مکاتب
عمومیه ده تدریسنه باشلانمش و مبتدیره مدار سهولت
اولمق اوزره « مدخل قواعد » نامیه له انک بر مختصری
یاپیلوب بوکا بعض قواعد دخی الحاق اولمش ایدی .
لکن مبتدیره مدخل قواعدك دخی آغیر کلدیکی اهل
خبره اولان معلمین طرفندن خبر ویرلمکله مکاتب
عمومیه درس جدولرینک ترتیبی ایچون معارف عمومیه
نظارتی دائره سنده تشکیل اولنا اهل خبره قوم یسیوننده
مکاتب ابتدایه شاگردانی ایچون ده مختصر و مفید
بر رساله نك تألیفی اخطار و تکلیف اولنغله « قواعد ترکیه »
نامیه بر رساله جك دخی قلمه النمش ایدی .

نسخه نفیسه شان وشوکت و سرلوحه مجموعه
خلافت وسلطنت شهریار معارفپور و پادشاه مراحم
کستر خاقان بی مثل و بی مدانی ﴿ السلطان الغازی
عبد الحمید خان ثانی ﴾ افزودن حضرتلینک مغبوط
سوالف اعصار و مجلای جلائل آثار اولان عصر مآرف
حصر هایونلرنده موقع انتشاره قونیلان بونجه آثار
جمیله به برلاحقه عاجزانه و ناچیزانه اولمق اوزره بوکره
« قواعد عثمانیه » بوجه آتی یکیدن ترتیب اولندی.
جناب حق ذات فرشته صفات هایونلرینی دائماً توفیقات
صمدانیه سنه مقرون و عمر وشوکت شاهانه لرینی روز
افزون بیورسون آمین .

نقطه

عثمانی لسانك اصلی ترکیه در . فقط فارسیدن و عربیدن
 بك چوق لفظلر النوب اوچ لساندن مرکب برسان اولمشد .
 حروف اصلیه سی حروف عربیه درکه شو یکر می سکز
 حروفدن عبارتدر :

ا ب ت ث ج ح خ د ذ ر ز س ش ص
 ض ط ظ ع غ ف ق ك ل م ن و ه ی

حروف فارسیه یکر می درتدر . چونکه حروف عربیه نك
 سکزی یعنی (ث ح ص ض ط ظ ع ق) حرفلری لسان فارسیده
 اولیوب باقیلری قوللانیلور . فقط عربیده اولمیان دها درت
 حرف وارد درکه [بای فارسی] و [جیم فارسی] و [زای فارسی] و [کاف
 فارسی] دینلور و اوزر لرینه شویله (پ چه ژ گ) اوچ نقطه
 وضع ایله عربیدن تفریق اولنور .

حروف عربیه و فارسیه نك کافه سی لسان عثمانیده مستعمل
 اولمغه حروف عثمانیده اوتوز ایکی یه بالغ اولور .

بوندن بشقه ترکیه ککزدن کلور برکاف وارد درکه اکا
 [صاغر کاف] دینلور . سکا، بکا کبی . شمدی بوکافلر نون کبی تلفظ
 اولنور . فقط بونلری کاف عربی و فارسیدن تفریق ایچون بر
 علامت مخصوصه یه احتیاج کورلمکله بوکافلر اوزرینه اوچ نقطه

وضع اولنوبده كاف فارسی شویله (ک) ایکی توالی یازاق
خصوصی مقدا تذکر وانجمن دانش طرفندن تصدیق وامضا
اولنغله مدخل قواعدده کافر بووجهله تفریق اولنمشیدی .

بعده سالف الذکر اهل خبره قومیسونک تذهیبی اوزرینه
قواعد ترکیهده كاف فارسی شویله (ک) قولی قیوریق اوله رق یازلدی.
لکن اوتیه دنبرو كاف فارسی اوزرینه اوچ نقطه وضعه
آشلمش اولدیغندن بوقاعده متروک وجمهور اولدی. بناء علیه
بو کتابده دخی اوتیه دنبرو اوله کلدیکی اوزره كاف فارسی اوزرینه
اوچ نقطه وضع اولنوبده لدی الحاجه دفع التباس واشتباه ایچول
صاغر كاف اوزرینه بر نقطه وضع ایله سکا بگا کی یازلق مناسب
کورلمشدر .

فتمه وکسره کی ضمه دخی یاخفیف ویا آغیر اولور : ضمه
خفیفه وثقیله یا مبسوط ویا مقبوض اولور . [ضمه خفیفه مبسوطه]
دوداقلری بر مقدار آچهرق تلفظ اولنور . [ضمه خفیفه مقبوضه]
دوداقلری بر مقدار صیقه رق تلفظ اولنور . ضمه ثقیله مبسوطه
ومقبوضه بوایکینک آغیرلری دیمکدر .

ضمه لر (۷) و () اشارت لریله یکدیگرندن تفریق اولنق
یعنی (اولمک) و (اولق) و (کولمک) و (بولق) رسملری اصول
اتخاذ قیلنق خصوصی مقدا تذکر وانجمن دانش طرفندن تصدیق
وامضا ایدلمش اولدیغندن مدخل قواعدده بو اشارت لر استعمال
اولنمشیدی .

بعدء سالت الذكرو اهل خبره قوميسيوننده (اولمك) و
(اولمق) و (كولمك) و (بولمق) اشارتلى وضع اولنديغندن
قواعد تركيده بواشارتلى قوللاندلى .

حروف هجا بمضاً خفيف و بمضاً آغير حرکه ايله حرکه لنورلر .
فقط (ث ذك) دائماً خفيف حرکه ايله و (ح خ ص ض ط
ظ ع غ) دائماً آغير حرکه ايله حرکه لنورلر .

لسان عربيدء حرکه نك خفت و ثقلى حرفك جنسنه تابعدر .
مثلا سين و كافك حرکه لرى خفيف و صاد و قافك حرکه لرى آغير
بولمق طبعيدر .

قاعده

بركله قنى جنس حرکه ايله بدأ ايدرسه صكره كى حرکه لر
دخى اول جنسدن اولمق يعنى خفيف ايسه خفيف و آغير ايسه
آغير تلفظ اولمق شيوء لسان تركى اقتضاسيندندر : كورمك ،
كوسترمك ، اوتومق ، يازديرمق كى

بوقاعده الما وليمون كى پك آز اسملرده تخلف ايتمشدر .
اينامق ماده سى دخى شاذدر .

برده ديكر لسانلردن مأخوذ اولان كله لر بوقاعده دن
مستثادر . مثلا منقولات كلمه سنك ميمى فتحه خفيفه ايله و قافى
ضمه ثقيله ممدوده ايله و لامى فتحه خفيفه ممدوده ايله متحرك
لاوله رقى تلفظ اولنور ، بوايسه كلمات تركيده اوله ماز ،

معلیمه تعلیمات

علم صرف ونحو، لسانی طوغری سوبلیوب یاز مق فنیدر. سوبلیوب یاز دیغمزه کلام دینور که کلمه لردن و کلمه لر حرفلردن مرکبدر. حرف بر کیفیت مخصوصه ایله آغزک نخرج معینندن چیقان سمدر. اول کیفیت دخی حرکه در و حروف عثمانیه شو اوتوز ایکی حرفدر.

ا ب پ ت ث ج چ ح خ د ذ ر ز ژ س ش
ص ض ط ظ ع غ ف ق ک ل م ن و ه ی.

ایشته بونلره [حروف هجا] دینلور.

ترجکده برده صاغر کاف واردر که شمدی نون کبی تلفظ اولنور. سکا بکا کبی. لدی الحاجه بودخی دیگر کافلردن تفریق اولنقی لازم کلدیکندن اوزرینه بر نقطه وضعیله (ک) صورتده یاز یله جقدر.

لسان عثمانیده ضاد اکثریا ظا کبی تلفظ اولنور. ضمیر، ماضی کبی.

اشبو حروف هجا ایکی قسمدر: بری مابعدینه متصل اولیان حرفلر اولوب بونلره «حروف انفصال» دینور که (ا د ذ ر ز ژ و) حرفلریدر.

دیگری مابعدینه متصل اولان حرفلر اولوب «حروف اتصال» دینور. بونلر باقی حروف هجادر.

لسان عربیده حرکه اوچدر : فتحه ، کسره ، ضمه یعنی
اوستون ، اسره ، اوتره در .

حروف هجاءك هر بری حرکه یه محتاجدر . فقط حرفك
بعضاً كندی حرکه سی اولوب « متحرك » دینور و بعضاً كندی
حرکه سی اولیوب ماقبلنده کی حرفك حرکه سنه اعتماد ایلر . اكا
دخی « ساكن » دینور . اوزرینه اشبو (ه) جزم اشارتی قونور
ال ، بل کبی .

لسان عربیده برجنسندن ایکی حرف یان یانه کلدکده
اکثریادغام اولنور . یعنی برحرف یازیلوب اوزرینه اشبو (ّ)
تشدید اشارتی قونور و مشدد یعنی مکرر او قونور : محمد معظّم .
الف ویا وواو حرفلرینه « حرف مد » دینلور . چونکه
فارسی و عربی کلمه لرده الف فتحه یی مد ایدر : یاور ، کاتب کبی .
و یا کمره یی مد ایدر و آئنه (ٓ) علامتی وضع اولنور :
زیور ، لیب کبی . و او ضمه یی مد ایدر : دلسوز ، مکتوب کبی .
اگر مد اولنان فتحه الفك حرکه سی ایسه یان یانه ایکی الف یازلامق
ایچون بر الف یازیلور و اوزرینه اشبو (ٓ) مد اشارتی وضع
اولنور : آزر ، آسر کبی .

الف برحرف هوا ئیدر که حرکه لندکده همزه اولور و علامت
اولق اوزره اشبو (ء) اشارتی استعمال اولنور . بونک کیفیت
استعمالی ذیل کتابک برنجی فصلنده بیان قلنور .

بالاده مذکور اولان حرکت لرا اکثر استعمالاً تنزده ترك اولانور
 وکله لر قرینه ایله اوقونور وکلمات ترکیه ده الف اکثریا الف فتحیه
 ویا کسریه وواو ضمه یه علامت اولمق اوزره قوللانیلور. بو حالده
 انلره «حرف املا» دینور. یالی، کوزل کله لرنده اولدینی کبی .
 بعضاً ها دخی بویله علامت حرکت اوله رق یازیلوب بو حالده اکا
 دخی «حرف املا» و «هائ رسمییه» دینور: هله، خانه، عباره کبی .
 ایشته حرکت لر من بونلردن عبارت اولوب لسانغزه ایسه
 سکز در او حرکت واردر . چونکه حرکات ثابته دن هر بری یا خفیفه
 ویا ثقیل اولور وضمه یا مبسوط ویا مقبوض اولور .

فتحیه ثقیله الف صورتنده یازیله رق فتحیه خفیفه دن تفریق
 اولنور. بل، بال کبی . واکر مفتوح اولان حرف دخی الف
 ایسه یان یانه ایکی الف یازیلوب بلکه بر الف یازیله رق اوزرینه
 () اشارتی قونور. آو کبی .

لدی الایجاب کلمات ترکیه ده کسره خفیفه دن تفریق ایچون
 کسره ثقیله نك التنه کسره ممدوده اشارتی اولان (ر) وضع
 اولنور . اسکی یالی کبی .

ضمه خفیفه مبسوطه (و) رسمنده یازیلور. کور، کوز کبی .
 ضمه خفیفه مقبوضه (و) رسمنده یازیلور. اوچ، یوز کبی .
 ضمه ثقیله مبسوطه (و) رسمنده یازیلور. صول، قول کبی .
 ضمه ثقیله مقبوضه (و) رسمنده یازیلور. اوغون، کبی .

مقدمه

کلمه یالکز بر معنایه موضوع اولان لفظدر وبش نوعدر
یعنی اسم ، صفت ، فعل ، ضمیر ، ادواتدر .

اسم . — بروصف ایله مقید اولقسزین مجرد بر شخصه
یاخود دیگر برشیئه دلالت ایلیان کلملردر: اجد، استانبول، قلم،
کاغد کبی .

صفت . — زمان ایله مقید اولقسزین بروصف ایله متصف
اولان شی دیمکدر . مثلاً کوزل دیدیکمزده کوزلاک ایله متصف
انسان یاخود بر شی دیمک اولور . کذلک بیاض کاغد دیدیکمزده
کاغد بر اسم اولوب مجرد مسماسنه دلالت ایدر . اما بیاض لفظی
بیاضلق صفتیله متصف اولان شیئه دلالت ایدر واوشی بوراده
کاغد ضمننده تحقق ایدر . فقط هیچ بریسی بروقته دلالت ایلز .
ضمیر . — اسمک . مسماسنی اشعار ایدن الفاظ مخصوصه در :
او، سن، بن کبی .

فعل . — اوچ زمانک برنده بر ایشک یا برحال وکیفیتک
وقوعنی افاده ایلیان کلملردر . کلدی، یازیور، دکلنه جک دنیلدیکی
کبی که کلاک ویا زمق برر ایش اولوب اولکی وقوع بولمش
وایکنجیسی وقوع بولمقده اولدینی و دکلنمک بر حال وکیفیت
اولوب بعده وقوع بولمقنی مستفاد اولور .

ادوات — که انلره «حروف معانی» دخی دینور. اسم
 وصف و ضمیر و فعلدن بشته اولان کلمه لر در که حد ذاتنده مستقل بر
 معنایی افاده ایتیموب بلکه دیگر کلمه لره مربوط اوله رق خصوصی
 معناله دلالت ایدر لر. مثلاً استانبولدن قایق ایله بوغاز ایچنه کیتدم.
 دینلدرکه (دن) و (ایله) حرفلری کبی. ایشته بو کلمه لر ترکیب ایدر که
 کلام اولور و کلامه جمله دخی دینلور. مثلاً - کون طوغدی -
 جمله سی ایکی کلمه دن مرکب بر کلامدر.

باب اول

اسمک صنوف و اقسامی بیاننده در

فصل اول

اسم خاص و عام و مفرد و جمع بیاننده در
 اسم ایکی قسمدر. بری اسم خاصدر که بر فرد معینه دلالت
 ایچون وضع اولنمیشدر. اکا علم دخی دینور. احمد، استانبول
 نیل کبی که احمد بر ذاتک آدیدر. استانبول دخی عالمک فهرستی
 اولان شهر منک و نیل مصرده جاری اولان نهر معروفک آدلریدر.
 ایکنجیسی اسم عامدر که افراد کثیره یه شامل اولور. اکا اسم
 جنس دخی دینور. انسان شهر نهر کبی که انسان بر شخص

معینہ منحصر اولیوب جہلہ بنی آدمہ شامل اولور . شہر دخی
بر بلدئہ منحصر اولیوب بالجہلہ بیہوک و مشہور بلدئہ اطلاق
اولور . كذلك نہرک دخی بر یوزندہ جاری اولان ایرماقلرک
کافہ سنہ شمولی واردر .

اسم جنسک اولنہ (او) کتوزیلور ایسہ علم کبی معرفہ
اولور . یعنی بر فرد معینہ منحصر قالور . مثلاً بر کیمسہ خدمتکارینہ
— او قلمی کتور — دیدکدہ بینلرنده معلوم اولان قلمی ایستمش
اولور . خدمتکار بشقہ قلم کتورسہ ایفای خدمت ایلش اولماز
وہضاً «او» یرندہ «اول» قوللانیلور واکر (بر) کتوریلور ایسہ
نکرہ اولور یعنی لاعلی التعمین بر قلم ایستمش اولور و خدمتکار
ہر قنفی قلمی کتورسہ ایفای خدمت ایلش اولور واکر جمیع
افرادى استغراق ایلک مراد اولور ایسہ (ہر) کتوریلور . مثلاً
ہرانسان بر ایچر — دینور .

مفرد و جمع

اسم عامدن بر فرد مراد اولور ایسہ مفرد وزیادہ مراد
اولور ایسہ جمع دینلور . ترکیجہ ادات جمع (لر) اداتیدر . کرک
ترکی و کرک فارسی ویاعربی کلدلرک اخرینہ علاوہ اولندقدہ جمع
اولور لر . آتلیر ، اسبلر ، فرسلر کبی .

اسماء فارسیه یعنی اسمان فارسیدن مأخوذ اولان اسملر بعضاً قاعدهٔ فارسیه اوزره چمنلور . شویله که اخری مفتوح قلنهرق الف ونون الحاق اولنور . مردان ، صوفیان ، چشمان ، آهوان ، سخنان کبی . واکر اسمک آخرنده های رسمیه بولنور ایسه کافه تبدیل اولنور . بنده نک جمی بندکان کبی . واکر الب بولنور ایسه بریازیده قلنور . کداندک جمی کدایان کبی . اسماء عربیه یعنی عربییدن مأخوذ اولان اسملر دخی بعضاً بویله قاعدهٔ فارسیه اوزره چمنلور لر . مشیران ، منشیان کبی .

عربجهده متعدد جملر اولوب انلر باب مخصوصنده بیان اولنده قدر .

اسم مکان

اسملرک آخرینده خفیف حرکه لی ایسه (لک) ، آغیر حرکه لی ایسه (لق) علاوه ، سیله اسم مکان صیغه سی یاپیلور . چیچکلک وچالیق کبی . شاذ اولهرق مختلف حرکه لرله استعمال اولنان کلمه لرده حرکهٔ اخیریه اعتبار اولنور لیونلق کبی .

فارسیده (زار) و (ستان) و (کاه) و (کده) لفظلری ادات محایت اولوب فارسی یا عربی اسملره لاحق اولهرق لسان غنائیده دخی استعمال اولنور لر . نته کیم لاله لک وکلک معناسنه لاله زار وکلستان وزیارت یری و محنت یری معناسنه زیارتگاه و محنتکده دینلور .

فصل اول

اسم تصغیر بیانده در

خفیف حر که لی اسملرک آخرینه (جک) و آغر حر که لی اسملرک آخرینه (جق) الحاق اولند قده اسم تصغیر اولوب مسماسنک کوچک کنی افاده ایدر. کدیجک، دستیجک، او طه جق، قوزیجق، قادیجق، او غلانیجق کبی. فقط آخری ساکن اولان ایکی حرف لی اسملرک تصغیرنده جک و جق یرینه (جکز) و (جفز) کتوریلور: کویجکز، او جکز، قیزجفز، قوشجفز کبی. و جفز بعضاً مقام ترجمه قوللانیلور. نته کیم بیچاره قیز دنیلجک یرده قیزجفز دنیلور.

تصغیر اولنه جق اسمک آخرنده کاف و یا قاف بولنور ایسه حذف اولنور. نته که دوشک و دوداق و قولاق اسملرینک تصغیرلرنده دوشه جک دوداجق قولاجق دینور. فارسی و عربی اسملر دحی بویله قاعده ترکیه اوزره تصغیر اولنور لر. فارسیدن خانه جک، خاتونجق و عربیدن رساله جک، دکانجق کبی. (چه) لسان فارسیده ادات تصغیر اولوب فارسی و عربی اسملره لاحق اولور. دیوانچه و دکانچه کبی کوچک دیوان و کوچک دکان دیمک اولور.

عربی اسملره مخصوص اولقی اوزره عربجه قاعده تصغیر وارددر. شویله که اسمک اوکی حرفی مضموم قلنهرق حرف

اخیرندن اول بریاء ساکنه زیاده ایدیلور . عبدك تصنیزند، عبید
دینلدیکی کبی که عبد قول و عبید قولجغز دیمکدر .

فصل ثالث

اسماء اعداد بیاننده در

اصل اسماء اعداد یعنی صایلرک اسملری ایکی مرتبه اعتبار
اونور که آحاد و عشراتدر .

آحاد برلر یعنی بردن طقوزه قدر اولان عددلردر . عشرات
اونلر یعنی اوندن طقسانه قدر اولان عددلردر .

آحاد . — بر، ایکی، اوچ، درت، بش، التی، یدی، سکز، طقوز.
عشرات . — اون، یکرمی، اوتوز، قرق، الی، التمش، یتش،
سکسان، طقسان .

بونلر رأس عشرات اولوب هر برینک آخرینه آحاددن بری
علاوه اولنه رق اون بر، اون ایکی دیواون طقوزه قدر صایلور .
بعده یکرمی بر، یکرمی ایکی دیو یکرمی طقوزه قدر صایلور . بعده
یوز کلور وینه بو منوال اوزره یوز سکسان طقوزه قدر صایلور
واندن صکره یوزک اولنه آحاددن بری علاوه اولنه رق ایکی یوز،
اوچ یوز و هکذا طقوز یوز طقسان طقوزه قدر صایلدقدن صکره
بیک کلور . اندن صکره دخی منوال مشروح اوزره صایاور .
وخزینئه مالیه نک اسکی اصطلاحجه اچه حسابنده یوز بیکه
بر یوک تعبیر اولنه رق ایکی یوک، اوچ یوک دیو تمعداد اولنوردی .
لکن اصحاب فن حساب عندنده بو « یوک » تعبیری قوللانلیوب

هر خصوصه طقوز یوز بیکدن ایلروسی کرات اعتبار اولنهرق
اون کره یوز بیک، یکرمی کره یوز بیک دیو صاییلوردی . بعده
اون کره یوز بیکه لسان افرنجیدن مأخوذ اولان ملیون لفظی
اطلاق اولنهرق آحاد و عشرات و مئات علاوه سیله صاییلور
اولدی. ایشته بونلر اسماء اعداد اولوب صاییلان شی نه ایسه اکا
دخی معدود دینلور. مثلاً بش التون، بش یوز غروش، بیک التی
یوز پاره دینلده کده التون و غروش و پاره معدود اولور .

اعداد فارسیه نك لسان عثمانیده نادر اولهرق قوللانیلان
احادی بونلردر: يك، دو، سه، چهار، پنج، شش، هفت، هشت، نه.
چهارك هاسی اکثریا حذف اولنهرق چار دینلور و یوز
معناسنه اولان صدوبیک معناسنه اولان هزار دخی قوللانیلور
نته کیم صدبار و هزار کره دینلور .

عربینك اسم عددلری دخی لسان عثمانیده كذلك نادرآ
قوللانیلور. احادی بونلردر: احد، اثنين، ثلثه، اربعه، خمسة،
سته، سبعة، ثمانية، تسعة .

احد یرنده اکثریا واحد لفظی قوللانیلور . عشراتی دخی
بونلردر : عشرة، عشرين، ثلاثين، اربعين، خمسين، ستين، سبعين،
ثمانين، تسعين .

عربیده یوز معناسنه اولان مائه و بیک معناسنه اولان
الف دخی لسان عثمانیده مستعملدر .

کسورات . — عدلک کسرلری جزء لریدر که یارم ، اوچده بر ، درنده بر وهکذا ایلرو طوغری کیدر . فارسینک کسرلرندن لسان عثمانیده یالکیز یارم معناسنه اولان [نیم] قوللانیلور . اما عربینک اونه قدر کسوراتی لسان عثمانیده مستعملدر که شونلردر : نصف ، ثلث ، ربع ، خمس ، سدس ، سبع ، ثمن ، تسع ، عشر ، بعضاً بونلره اعداد ترکیه منضم اولور : بر ثلث ، اوچ ربع ، درت خمس کبی .

اعداد توزیعیه . — بر جاعتدن هر برینه مساوات اوزره بر مقدارک تعیینی قصد اولندوقده اسم عدلک آخری مفتوح قیلنهرق بررءساکنه الحاق اولنور و آخری مکسور ایسه رادن اول برده شین مفتوحه زیاده قیلنور و درت لفظنک اخرنده کی تا حرکه لندکده داله منقلب اولور . نته کیم - فلان قریه اهاالیسی برریا ایکیشر یاخود دردر غروش ویرسون - دنیلور واسم عدد ایکی ایکی ودرت درت دیو تکرار ایدلش کبی اولور .

کذلک بر فرقه بی طاقم ایتک مقامنده دخی بو اعداد توزیعیه قوللانیلور و اول حالده تکرار لانور . نته که - ایکیشر ایکیشر کلیکیز - دینور . فارسیده لسان عثمانیده « برر برر » معناسنه اولان « یکان یکان » قوللانیلور .

فصل - رابع

مبهمات بیاننده در

مبهمات، معناسنده ابهام اولان اسملر در :

اصل مبهمات ترکیه : کندی ، کیم ، نه ، قاچ ، قچان ، قفی ،
قنقی کلمه لریدر .

(کندی) که کندو دخی یازیلور ، بشقه سی قاریشمقسرین
برذات دیمکدر . نته که - کندی یاپدی - دینلیر که بشقه سی قاریشمیوب
بالذات یاپدی دیمک اولور و - ترزی بوجه بی کندی دیکدی -
دینلر که قالفدسنه یاشا کردینه دیکدیرمدی معناسی چیقار . و (لر)
ایله جمعلوب کندیلر و کندولر دینلور . بعضاً تأکید ایچون تکرار
لانور و کندی کندینه و کندو کندویه دینلور . فارسیده بومعنایه
(خود) قوللانیلور . مثلاً رأی خودیله دینلور که کندی رأییله
دیمکدر . و خود بخود دینلور که کندی کندینه دیمکدر عربیدن
دخی بومقامده (ذات) و (نفس) قوللانیلور . مثلاً : ذاته
مخصوص و نفسنه منحصر دینلور که کندینه مخصوص و کندینه
منحصر دیمکدر . وبالذات یاپدی دینلور که کندو یاپدی دیمک
اولور . (کیم) ذوی العقوله مخصوص اولوب بر شخصی استفهام
ایچوندر . مثلاً کیم کلدی ؟ کیملر کله جک ؟ دینلور . و بعضاً
استغراق ایچون قوللانیلور : کیم اولور ایسه اولسون کبی که
هرکیم اولور ایسه اولسون دیمکدر . و بعضاً ابهام ایچون استعمال

اولنور. نته که - کیم کلدی بلمیورم - دینلور وتکرار اولنهرق بعض معناسنه استعمال اولنور. نته کیم : انلرک کیمی شویله وکیی بویله دینلور. کیمسه وکسنه لفظلری دخی مبهم بر شخص دیمکدر.

(نه) ذوی العقولدن اولیان شیئی استفهام یا استغراق ویا ابهام ایچونددر. نته کیم مقام استفهامده - نه اولدی؟ و مقام استغراقده نه اولور ایسه و مقام ابهامده نه اولدی بيلم دینلور. (نسنه) لفظی مبهم برشی معناسنه استعمال اولنور واکثریا [نه] مابعدینه وصل ایله هاء رسمیه سی اسقاط اولنور. نلر، ندر، ندن کبی. نقدر ونوجهله دخی بعضاً بویله هاسز اولهرق یازیلور و بعضاً متصل اولدینی کله نك اولکی حرفی علی الخصوص الف اولدینی حالده تخفیف ایچون حذف اولنور. نه اوله (نوله) نه اولدی (نولدی) نه ایلسون (نیلسون) نه ایچون (نیچون) کبی. كذلك نه اصل بووجهله تخفیف اولندقدن ناصل اولوب اکثریا الف دخی اسقاط ایله نصل یازیلور. و بویکیقی استفهام ویا استغراق ویا خود ابهام ایچون استعمال اولنور. نته که نصل اولدی؟ دیو سؤال اولنور و نصل اولور ایسه اولسون و نصل اولدی بيلم دینلور و بعضاً مقام تشبیه ایراد اولنور. نته کیم سن نصل که ایتدک ایسه اوله جه ایتدیکی بولدک دینلور ونه یرده تخفیف اولنهرق نرده، نره ده دینلور و مکانی استفهام یا استغراق ویا ابهام ایچون استعمال اولنور. نته که: نره ده قالدی و نره ده اولور سه اولسون

ونزهده بيلم واو نزده بونزهده دنيور . لسان فارسیده (چه)
نه ديمك اولوب بعضاً لسان عثمانیده قوللانيور و (چه فائده)
دنيور كه نه فائده ديمكدر و بعضاً (هرچه بادآباد) جلهسى قوللانيور
هرنه اولور ايسه اولسون ديمكدر . (نيجه) نصل معناسنه در .
نته كيم نيجه سين و نيجه اولور ايسه اولسون و نيجه اولدى بيلم
دنيور . و بعضاً وقت مبهم ايچون قوللانيور مثلاً نيجه يه دك دنيور
نه و قته دك ديمك اولور . و بعضاً مقام ابهامده چوق معناسنى مفيد
اولور . نته كه - نيجه كره دنيور كه چوق كره ديمكدر ، و بعضاً بومقامده
خيلي لفظى قوللانيور . نته كه - خيلي مدت دنيور كه چوق مدت
ديمك اولور . و تقبلل ايچون خيليجه و تا كيدا ايچون خيليدن دنيور .
عرييده دخى بعضاً چوق مقامده (كثيراً ما) ودها چوق مقامنده
(اكثراً) لفظلرى قوللانيور . (قاچ) عددى استفهام ويا
استغراق ويا ابهام ايچوندر . دائماً مفرد اوله رق قوللانيور .
نته كيم مقام استفهامده قاچ غروشك وار ؟ دنيور كه نه مقدار
غروشك وار ؟ ديمك اولور و مقام استغراقده قاچ اولور ايسه
اولسون دنيور كه هرنه قدر اولور ايسه اولسون ديمك اولور
و مقام ابهامده ساعت قاچه كلدى بيلمورم دنيور . و بعضاً مقام
ابهامده نيجه كې كثرت معناسنى مفيد اولور . قاچ كره كې كه چوق
كره ديمكدر . و برقاچ دنيور سه بعض و براز معناسنى افاده ايلر .
فارسیده چند كلمه سى مېهاتندن اوله رق نيجه و قاچ مقامنده قوللانيور .

فقط چند کلمه سی اوچدن اونه وارنجه مقداری معین اولیان عدد دیمکدر که لسان عربیده بعض دینلور و بعضاً هر چند قولانیلور که هر قدر دیمکدر . (قچان) خاچان ، نه وقت ونه زمان دیمکدر . بعضلر الفسز اوله رق قچن یازارلر .

(قتی) نزهده دیمکدر . شمدی خانی تلفظ اولنور .
(قنغی) کلمات استفهامیه دندر . نته که - قنغی کاتب ، قنغی کتاب دینلور و شمدی بین الانام هانکی تلفظ اولنور و هافتمه ثقیله و کاف کسره خفیفه ایله حرکه لنور . وایسه لسان ترکیک آهنگ خفت و ثقلته مخالف اولدیفندن هانکی لفظی کلمات شاذه دن معدود اولور . بوقدر و شوقدر و اوقدر لفظلری دخی غیر معین معناسنده استعمال اولنورلر . بوتقدیرجه اوچیده مبهاتدن اولورلر . نته که (اون بوقدر غروش) دینلور و بر عدد غیر معین اراده اولنور . كذلك (بوقدر معلوماتی واریکن) و (شوقدر معلوماتی وار ایسه ده) و (اوقدر معلوماتم یوق) دینلور و بعضاً اوقدر معناسنه فارسیده چندان لفظی قولانیلور و (چندان معلوماتم یوق) دینلور .

فصل فاس

اسم اشارت بیاننده در

اسم اشارت بر فرد معینه اشارت ایچون موضوع اولان (بو) و (شو) لفظلریدر . ادواتده بر شیئه متصل اولدقلرنده بر نون زیاده قلنور . بناءً علیه تصغیرلرنده بونچمز و شونچمز و جملرنده

بونلر، شونلر دینلور. (بو یرده) و (شو یرده) تخفیف اولنهرق بوراده، شوراده و شوراجق و بوراجق دینلور. [شو] قریبه واکانسبتله دهاقرب و معروف اولان شیئه اشارت ایچون قوللانیلور. نته کم: بوقوناغک باغچه سنده کزن شو آدم کیدر؟ دینلور. اسم اشارت لری بویله بر مشار الیهی اولمق لازم کلور. فقط بعضاً اسم مبهم مقامنده استعمال اولنورلر. (عادت بودر که بیوکلر مجلسه سائرندن صکره کلور.) و شو (سوز که سکا سویلنیور پک نافع بر نصیحتدر.) جله لرنده بو وشو کبی. و بومقامده بعضاً (شول) استعمال اولنور. (شول چوجوق که انا بابا نصیحتی دکلهمیه؛ صکره فلکک چوق سله سنی یر.) دینلدیکی کبی. فارسیده بعدازین لفظی بوندن صکره دیمک اولهرق بعضاً عباره اراسنده قوللانیلور. عربیده (ذا) بو و (هذا) ایشته بو و (ذلك) شودیمکدر. بونلر دخی لسانعزده مستعمل دکلدر. فقط بعضاً عباره صره سنده کلورلر و [بعدذا] و [بعدذلك] دینلور که بوندن صکره وشوندن صکره دیمکدر.

باب ثانی

صفت بیاننده در

اسملر کبی صفتلر دخی ترکیه (لر) ایله جملنور: کوزلار، چالغیمیلر کبی. و فارسی و عربی صفتلر بعضاً قاعده فارسیه اوزره دخی جملنور: دلبران و سازندگان و رقاصان کبی.

فصل اول

تصغیر و تأکید و مبالغه و تفضیل بیاننده در

صفتلره ادات تصغیر الحاق اولندقدہ معنای وصفینک تقلیلنی مفید اولور. صفتلرک تصغیری ایچون اکثریا (جه) الحاق اولنور :
نته که قره جه، قوریجه، تنهاجه، خفیفجه دینلور که برازقاره، بر
از قوری و بر مرتبه تنها و بر آز خفیف دیمکدر. و کوزلجه و چوقجه
دینلور که عادی کوزل و آز ایله چوق اراسی دیمک اولور .
وبعضاً (جه) یرینه (مترک) یا (متراق) کتوریلور . اکشیمترک
و آجیمتراق کبی که آزا کشی و آز آجی دیمکدر . و بعضاً صفتلره
(سی) الحاق اولندرق معنای تشبیهی متضمن اولور . اکشیمی
کبی که اکشییه بکزر یعنی مایخوش دیمک اولور. ککرمسی دخی
بو قیلدندر. فقط ککره ترکجه دیل بوران معناسنه اولدینی حالده
شمیدی متروک و مهجوردر . اندن مأخوذ اولان ککرمسی لفظی
ایسه مستعملدر . اسملرده ادات تصغیر اولان (جک) و (جق)
نادر آصفتلره دخی لاحق اولور . اوفق تفک، اوفه جق تفه جک
کبی. شاذ اوله رق آز لفظنک اخری حرکه لندرک آزیجق و بیوک،
کچوک لفظلرینک تصغیرند، قمع جیم ایله بیوجک، کچوجک دینلور .
تأکید . — معنای وصفینک تمامی قافده اولنق استنلیدیکی حالده
تأکید ایچون صفتک اولکی حرفی تکرار و اکثریا بر (پ) یا خود
(س) و یا خود (م) زیاده قیلنور. قاپ قاره، موس مور، سیم سیاه کبی.

اشبو صفات مؤكده دن بين الناس زبازد اولانلر ذيل
كتابك ايكنجى فصلنده بيان اولنور .

مبالغه . — صفتده مبالغه يعنى معنای وصفينك قوت و شدت
اوزره اولدينى افاده اولنقى مراد اولور ايسه صفتك اولنه چوق و پك
وزياده لفظلرندن برى كتوريلور : چوق كوزل ، پك سياه ، زياده
لطيف كې . و بر مرتبه ده مبالغه قصد اولنور ايسه غايت يا خود پك
چوق ديو تاكيد اولنور . غايت واسع ، پك چوق تكلفلى كې .
تفضيل . — معنای وصفيده تفضيل يعنى برينك ديكره نسبتله

فضل و رجحاننى افاده مقامنده ايكي صورت واردر : بريسى بودر كه
صفت تفضيليه مضاف قيلنهرق اولنه (ك) كتوريلور : نته كه —
انلرك اكه كوزلى شودر . دنيلور . ديكرى بودر كه (دن) اداندن صكره
كلهر كه اولنه (ها) كتوريلور : نته كه بواندن ده كوزلدر . و بعضاً
ادات تفضيل حذف اولنور : نته كه — بواندن كوزلدر . دنيلور كه ده
كوزلدر ديك اولور . فارسيد ادا تفضيل اولان (تر) فارسى و ياعربى
صفتلر اخرينه علاوه اولنور و مقام تفضيلده قوللاندينى كې مبالغه
معناسنه دخى كلور . مثلاً بالاتر و واسعتر دنيلد كده اك بالا و يا خود
دها بالا واك و سعتلو يا خود ده و سعتلو معناسنه كلديكى كې پك
بالا ، چوق و سعتلو معناسنه دخى كلور و بعضاً بونك اخرينه يا
نون علاوه اولنور : بالاترين كې . لسان عربيده مبالغه و تفضيل
صيفه لرى مشتقاتندن اولمغله فرع فعل بابنده بيان اولنور .

فصل ثانی

صفتلرک سماعی و قیاسی به تقسیمی بیاننده در

صفتلر یاسماعی و یاقیاسیدر : سماعی ایشیدوب بلله مک ایله ضبط اولنان صفتلردر . یوجه، بالا، رفیع کبی . قیاسی بر قاعده ایله ضبط اولنان صفتلردر . آخرنده ادات نسبت اولان اسملر کبی . لسان ترکیده اصل ادات نسبت (لی) یاخود (لو) حرفلیدر که بر اسم الحاق اولندقدہ اکا منسوب بر فرد دیمک اولور . بروسه لی، نشئه لی، سوعلی، سوکیلی، استانبوللو، صوقوللو، زورلو کبی . فارسیده یاه ممدوده ادات نسبت اولور . فارسی یاخود عربی اسملره لاحق اوله رق لسان عثمانیده دخی مستعملدر . ایرانی و جازی و فارسی و عربی کبی . واکر اسمک آخرنده هاء رسمیه بولنور ایسه یاه نسیبه دن اول بر واو زیاده قیلنور . بروسوی فرانسوی کبی . عربیده ادات نسبت یاه مشدده در . شرقیه کی . فقط بویله متحرک اولمدینی حالده تخفیف اولنهرق عینیه فارسینک یاه نسبتی کبی مد ایله تلفظ اولنور . جازی و عربی کبی واکر کلمه نک آخرنده الف بولنور ایسه نسبتنده و اوہ منقلب اولور جادن، جوی کبی . واکر هابولنور ایسه حذف اولنور : مکہ، مکی کبی . و برده (فعل) وزنده اولان اسملرک یاسی حذف ایله ماقبلی مفتوح قیلنور : مدینه، مدنی کبی .

بو عربی اداتلر انجق اسماء عربیه یه لاحق اولور . فقط عمللر مستشادر . انلرده هر لسانک قاعده سی اوزره تصرف اولنور . مثلاً

طربزونى الاصل وقره حصارى الاصل دینلور . لسان عثمانیده فارسیده صاحب معناسنى مفید اولان (مند) دخى استعمال اولنور ونسبت معناسنى افاده ایلر . دانشمند ومعرفتند کبی که صاحب دانش ومعرفت یعنی دانشلى ومعرفتلى دیمک اولور . ینه فارسیده بو معنایه (ور) قوللانیلور هنرور، تاجور کبی .

فارسیمجه بر کیفیتله متصف معناسنى مفید اولان (ناک) دخى بعضاً استعمال اولنور. دردناک وغنائک کبی که دردلى وغلى دیمک اولور.

قاعده.— بر اسمک آخرینه (جه) الحاق اولندقدده صفت اولور . نسبت معناسنى افاده ایلر. عربجه کبی که عربی یعنی عربیه منسوب دیمکدر. وبعضاً لیاقت معناسنى افاده ایدر. درویشجه کبی که درویشه لایق وجهله دیمک اولور. لسان فارسیده بو معنایى مفید اولمق اوزره فارسى یا عربى اسملر قاعده فارسیه اوزره الف ونون ایله جعلندکدن صکره آخرینه های رسمیه الحاق اولنور وزیرانه و درویشانه و بندکانه کبی که وزیرلره و درویشلره و بندهلره یا قیشور صورته دیمک اولور .

قاعده.— بر اسمه (جی) الحاق اولندقدده صفت اوله رق بر کار ایله اشتغال معناسنى افاده ایلر . بودخى بر نوع نسبتدر : سوتجی ویاغجی کبی فارسیده بو معنایه (بان) (وکار) و (کر) لفظلری قوللانیلور: باغبان و خدمتکار و شمشیرکر کبی که باغجی و خدمت ایدجی و قلیججی دیمکدر . عربجه بو مقامده (فاعل) صیغه سى قوللانیلور . لابن کبی که سوتجی دیمکدر .

قاعده. — بر اسمك اخرينه خفيف حرکه لی ایسه (دش) واغیر
حرکه لی ایسه (داش) الحاق اولندقدده برلك معناسنی مفید بر
نوع صفت اولور . نته که انلر پیردشدر یولداشدر دینلور که
پبرلری بر ویوللری بر دیمکدر . قرداش دخی قارنداش مخفیدر.
اسمك اخری دال اولدینی تقدیرده حذف اولنور . آداس کبی که
آدلری بر دیمکدر . فارسیده بو معنایه (هم) قوللانیلور : همسن
وهم مذهب کبی که سنلری بر ومذهبلری بر دیمکدر .

فأمره . — بعض اسملره (سی) الحاق اولنه رق معنای تشبیهی
متضمن صفت اولور . نته که : آبدالسی دینلور که آبدال کبی دیمکدر
وامتحانسی دینلور که امتحان کبی بر معامله دیمک اولور وارککسی
دینلوب ارکک طورنده قادین مراد اولنور . وکله نك آخری
متحرك ایسه میم زیاده قیلنور . بدلامسی کبی . محله مسی دخی بو
قییلندر که شهرک محله کبی بر قطعه سی دیمک اولور .

نغیه . — بالاده مذکور اولان صفتلردن بشقه فعللردن مشتق
پک چوق صفتلر واردر . انلر ان شالله تعالی باب فعلده بیان اولنور لر .
اعداد وصفیه . — ترجمه صایلر اخرينه (نجی) لفظی الحاق
اولندقدده اعداد وصفیه اولور . برنجی ، ایکنجی ، اوچنجی ، دردننجی
کبی . فارسینک اعداد وصفیه سی لسان عثمانیده مستعمل دکلدیر .
عربینک اعداد وصفیه سی لسان عثمانیده اکثریا بروجه آفی

اونه قدر استعمال اولنور : اول ، ثان ، ثالث ، رابع ، خامس ، سادس ، سابع ، ثامن ، تاسع ، عاشر.

بعضاً بروجہ آتی تنوین ایله استعمال اولنور لر : اولاً ، ثانیاً ، ثالثاً ، رابعاً ، خامساً ، سادساً ، سابعاً ، ثامناً ، تاسعاً ، عاشرأ .

تکملہ۔ باب اسمدہ بیان اولندیفی اوزره اسملره (لک) یا خود (لق) الحاق اولندقدہ اسم مکان اولور . فقط اسم عدده لاحق اولدقلرنده صفت قیلندن اولور . بشلک واولنلق کبی که بش غروشه واون غروشه رایج اولان سکه دیمکدر . برده مکانہ دلالت ایدن اسملره لاحق اولدقلرنده دخی برنوع صفت اولور . جنتلک یا جهنملک آدم و صوبالق اودون دنیلدیکی کبی . اوطهلق دخی بو قیلندکرکه اوطه خدمتنه مخصوص جاریه دیمک اولور . کذلک زمانه دلالت ایلیان اسملره لاحق اولدقلرنده دخی صفت قیلندن اولور . نته که بیراملق البسه دینلورکه البسه عیدیه دیمکدر و کذا برسندلک کرا و آلتی آیلق چوجوق دنیلور . فارسجه بو مقامده اسمک آخرینه های رسمیه کتوریلور . نته که یکساله دینورکه برسندلک دیمکدر . واکر بولفظلر صفتلره لاحق اولور لر ایسه اادات مصدریت اولور لر : بیوکلک ، اوزوونلق کبی .

دیگر لسانلردن آئوبده مختلف حرکه لر ایله مستعمل اولان کلمهلرده حرکه اخیریه اعتبار اولنور . خستلک کبی . فقط ترکیجه . نلک آهنگ حرکاتنه اویدرمق ایچون تایه اغیر حرکه ویریلورسه

(لك) يرینه (لق) كتوريلهرك خسته لق دینلور. سائر امثالی دخی
بوکا قیاس اولنه .

فارسیده یاء ساکنه بووجهله ادات مصدریت اولوب فارسی
یا عربی صفتلره لاحق اولور . پریشانی و مسرفی کبی که پریشانلق
و مسرفلک دیمکدر .

عربیده دخی یاء مشدده ایله تا ادات مصدریت اوله رق
یا لکز عربی صفتلره لاحق اولور . شاعربت کبی که شاعرلک
دیمکدر . کرم لفظی فارسی ازلا یعنی حالده کرمیت غنط مشهور
اوله رق مستعملدر .



باب ثانی

ترکیبلر حقنده در

فصل اول

ترکیب اضافی بیاننده در

اضافت بر معنای خصوصی افاده سی ایچون بر اسمی دیگر
اسمه ربط ایلمکدر . بونلرک برینه مضاف دیکرینه مضاف الیه
دینلور. ترجمه مضاف الیه دائماً مضافک اوزرینه تقدیم اولنور .
و مضافک آخری ساکن ایسه مکسور قیلنور و متحرک ایسه یعنی
حرف مد بولنورسه برسین زیاده قیلنور. بیکک مهتابی و باغچه سی
کبی . بیک مضاف الیه و باغچه مضافدر .

اضافات ايکي قسمدر . بری اضافت لاميه وديکری اضافت بيانيه در .
اضافات لاميه تملك ونسبت معنالريني افاده ايلر . مثلاً فلانك
اوی ، دینلده اول کیمسه نك بواوه مالك اولدیني ا کلاشیلور .
واوك طامی ، دینلده طام ، اوک اجزاسندن اولمغله اکا نسبتی
مستفاد اولور .

بواضافت بعضاً دخی ادنی ملابسسه ایچون اولور . یولمک
اوزرنده کبی . اشبو اضافت لاميه نك قاعده سی بودرکه مضاف
ایله آخری ساکن ایسه مکسور قیلنور و متحرک ایسه برنون
زیاده قیلنور . ایضاح ایچون امثله آتیه ایراد اولنور .

استانبولک آرمودی	چاملیجه نك اوزوی
صوبانک بوروسی	قبونک رزه سی
هوانک اعلاسی	یالینک هواسی
طوق اوک آچ کدیسی	شونک بونک لفر دیسی

شاذ اوله رق صو لفظنك مضاف الینده نون یرینه یا کلور .
مثلاً صوبک آقندیسی دینور .

بعضاً ادات اضافت اولان کاف حذف اولنور . علی الخصوص
علم یا خود برصنف مخصوصک اسمی اولدقه حذف مطرددر .
نته کیم : ابراهیم اغانک چایری وکوشکک بکچیسی دینله جک یرده
ابراهیم اغا چایری وکوشکک بکچیسی دینور . مرمه دکری
دخی بوقیلدنر .

اضافات بیانیه ده مضاف الیه مضافک نوعنی یا خود اصلنی تعیین

وبیان ایلر واولکیسندده مضافک کسره سی یاخود سیفی ایله اکتفا اولنهرق مضاف ایله کاف اضافتدن مجرد اولهرق ایراد اولنور .
 نتهکه: چنار اغاجی، دینلدهکده چنار لفظی مضاف ایله اولهرق اغاجک نوعی تعیین وتخصیص ایلر . سوار ی فرقه سی دخی بوقیلدندر . وایکنجیسندده مضافه کسره یاخود سین دخی لاحق اولماز .
 التون کوبه ، دینلدهکده آتون مضاف ایله اولهرق کوبه نک قنغی معدندن اولدیغنی بیان ایلر .

برشی برشیئه تشبده مبالغه قصدیه مشبههک مشبهه اضافتی دخی اضافت بیانیه قیلدندر . نتهکیم : کوکل کعبه سی ییقمه دینلور که کعبه کی اولان کوکلی ییقمه دیمک اولور .

قاعده . — کلمات ترکیه نک آخرنده بولان قاف براداته متصل اولهرق حرکه لندکده غینه منقلب اولقی قاعده مطرده در .

بناء علیه مضاف یا مضاف ایله اولان کلمه لرك آخرلرنده کی قافلر غینه تبدیل اولنور . قوناغک اونجانی کی

اما قاف حرکه لندیکی حالد براداته متصل اولسه بیله حالی اوزره قالور . قوناقلر ، قوناقلرك ، قوناقلری کی . بوقاعده سائر فصل وابلرده دخی جاری اولمغله خاطر نشان اولمیدر .

آخر کلمده بولان کاف بروجه بالا حرکه لندکده رسم خطی دکشمز ایسه ده تلفظی دکشور ویا کی ملایم تلفظ اولنور . اینکک

کپی، کبی، فقط ترك، کوزل، کوشك کبی نادر اسملرده بوقاعده
تخلف ایدر .

فارسیه اضافت . — اسماء فارسیه و عربیه بعضاً قاعده فارسیه
اوزره یکدیگره مضاف اولورلر .

شوبله که: كرك اضافت لامیه ده ، كرك اضافت بیانیه ده مضافك
آخری مكسور قلندهرق مضاف الیهك اوزرینه تقدیم اولنور :
برك كل، چشم بلبل، اهل باغ جهان کبی .

اكر مضاف الیهك آخرنده هاء رسمیه یا خودیاء ممدوده بولنور
ایسه برهمزه زیاده قلنور: ساحه زمین، کعبه دل، صوفی بروسه،
قاضی بلده کبی . واکر الف یا خود واو ممدوده بولنور ایسه
بریا زیاده قلنور : صفای دل ، غدای روح ، بوی کل ، جوی
صفاء کبی .

قاعده . — فتوی ومعنی کبی آخرنده الف مقصوره اولان
اسملری اهل فارسی یا ایله تلفظ ایدرلر و حال اضافتده فتوی مفتی
ومعنی بیت دیرلر . اما لسان عثمانیده او مثللو کلملر یا ایله یازلسه
بیله الف تلفظ اولنورلر . حال اضافتده دخی فتوای مفتی ومعنای
بیت دینلور . صحرا و غدا کبی فی الاصل آخرلرنده همزه اولوبده قاعده
ترکیه اوزره اسقاط اولان کلملرک حال اضافتدرنده بر قاعده
آخرلرینه یا کتوریلور . صحرای تیه و غدای روح کبی . فقط

یاخود مضاف الیه اوله‌ماز مثلاً : طام قوناق ، چفتلک ضابط ،
اوست خانه ، زمین کوشک ، موقع یالی ، دینله من . بوضابطه
دیگر فصل و بابلرده دخی مرعی الاجرا اولدیفندن کوزلجه
ضبط اولنمیدر .

فصل ثانی

ترکیب وصفی بیاننده در .

معنای وصفی ایله متصف اولان اسمایه [موصوف] دینلور که
صفتک عقبنده کتوریلور . اشته ترکیه ترکیب وصفی بوندن
عبارتدر . صفت و موصوف کرک ترکی و کرک فارسی و یاعربی
اولسون بوقاعده اوزره یکدیگریله ترکیب ایدرلر . مثاللری بونلردر :

کوزل چپکن	کوزل جامه	کوزل جبه
دلشین کوشک	دلشین کاشانه	دلشین قصر
اعلا قوناق	اعلا خانه	اعلا منزل

فارسی و عربی موصوف و صفتلر بعضاً قاعده فارسیه اوزره
یکدیگریله ترکیب ایدرلر . شویله که : موصوف آخری مضاف کی
مکسور قیلنهرق صفتک اوزرینه تقدیم اولندقدن ترکیب وصفی
اولور و موصوفنک آخری های رسمیه یاخود یاه ممدوده ایسه
برهمزه واکر الف یاخود واو ممدوده ایسه بر یا زیاده قننور .
امشله سی بونلردر :

ره راست	راه مستقیم	قصر والا	قصر اعلا
بندۀ دیرینه	بندۀ قدیم	طبقۀ بالا	طبقۀ علیا
صراخی لبریز	صراخی مملو	بنای استوار	والی عادل
بنای تهی	بنای خالی	عدوی بدخو	بنای محکم
سبوی تهی	سبوی خالی	عدوی مکار	

ترکیب اضافیده اولدینگی کبی ترکیب وصفیده دخی بنا کبی
فی الاصل آخرنده همزه بولنان کلمات عربیه بویله قاعدۀ فارسیه
اوزره مضاف اولدقده متروک اولان همزه نك اعاده سیله مثلاً :
بناء استوار و بناء محکم دنیلک دخی جائزدر .

عدو کبی فی الاصل آخری مشدد اولان کلمه لر موصوف
اولدقده دخی تشدیدک اعاده سیله مثلاً : عدو بدخوء ، عدو
مکار دینلک جائزدر ،

ترجیه ترکیب وصفیده موصوف کک مفرد اولسون کک
جمع اولسون صفی مفرد کلور : کوزل قوشلر ، کوزل مرغان ،
کوزل طیور کبی .

فارسیجه ترکیب وصفیده دخی اکثریا بوقاعده جاری اولور .
نته که ، یاران یکدل و بندکان مخلص دینلور . فقط بعضاً موصوف
کبی صفت دخی قاعدۀ فارسیه جه جعلنور . نته که مردان دلاوران
و بندکان مرحت جویان و عالمان عاملان و حاکمان عادلان دینور .
بالاده مسطور اولان ضابطه حکمنجه الفاظ ترکیه قاعدۀ
فارسیه اوزره صفت و موصوف اوله ماز . بوجهتله « مدیرک

مذکور « دینه جک یرده » مذکور مدیرک « دینک لازم کلور .
فقط دونمادن مأخوذ اوله رق دونمای همایون شاذر .

نهیہ — چوق دفعه موصوفلر ترک اولنه رق صفتلر انلرک مقامنه
قائم اولور . او حالده صفتلر جعلنور و مضاف و مضاف الیه اولور
وانلرده اسملرک احوال سائرہ سی دخی جاری اولور .

نتہ کہ : چرکینلرک طالعی یاور اولور . بیچارکانی کوزتملی
و کوچکمزہ شفقت ، بیوکمزہ حرمت ایلمیان بزدن دکلدر و حاکم
عصرک حکمی نافذدر . حکم حاکمه اطاعت لازمدر ، جله لرندہ
اولان صفتلر کی .

تمہ — صفت ایکی قسمدر . بری صفت ذاتیدر که موصوفک
کندی صفتیدر . بالاده مذکور مثالدرده اولدیغی کی . دیکری
وصف سببیدر که موصوفک مضافی کندی صفتیلہ ترکیب ایدوب
ایکیسنی برکله حکمنده اوله رق موصوفه صفت قیلنور .

نتہ کہ : بلی اینجه آدم دینلور که اینجه لک بلک صفی اولوب
انک سببیلہ صاحبی توصیف اولنور و کندوسنک بلی اینجه اولان آدم
دیمک اولور . عربیده بومعنائی افاده ایچون صفت موصوفنه مضاف
قلنور . و بوکا اضافت لفظیه دینلور . نتہ کہ حسن الوجه دینلور که
یوزی کوزل دیمکدر . کذلک کریم الشیم ، دینلور که خویلمری
کوزل دیمکدر . سالف الذکر و مستجاب الدعوه دخی بوقبیلدنذر .
فارسیجه بومقامده وصف ترکیبی قوللانیلور . بو دخی اوچ
صورتله یاپیلور :

اولاً قاعدهٔ فارسیه اوزره اضافت بیانیہ قیلندن اوله رق مشبهه مضاف اولان مشبه بهک کسره سی حذف اولندقدہ مضاف ایله مضاف الیهک مجموعی وصف ترکیبی اولور . مثلاً : آی کبی یوز، معناسنه اولان ماه رو ترکیبنده ها اسکان اولندقدہ ماهرو برکله حکمنده اولوب آی یوزلی یعنی یوزی آی کبی دیمک اولور وکذا کل کبی یوز معناسنه اولان کل رو ترکیبنده کل کلمه سنک آخری ساکن قیلندقدہ کل یوزلی معناسنه اولور و بحالده ایکسی دخی برر اسم صفت اوله یلور . زن ماهرو ، شوخ کلرو کبی .

ثانیاً قاعدهٔ فارسیه جه اضافت لامیه صورتندہ مضاف الیه آخری ساکن اولدینی حالده مضاف اوزرینه تقدیم اولندقدہ ایکسی سنک مجموعی وصف ترکیبی اولور . نته کیم : پرتو ماه ، آیک ضیاسی دیمک اولوب ماه پرتو ایسه ، آی ضیالی دیمک اولور و براسمه صفت اوله رق مثلاً « روی ماه پرتو » دینلور .

ثالثاً فارسی ترکیب وصفی قلب اولنده یعنی صفت آخری ساکن اولدینی حالده موصوفک یرینه و موصوف انک یرینه کتورلدکده ایکسی بر صفت اولور . نته کیم : قره کوز معناسنه اولان چشم سیاه ترکیبی قلب ایله سیاه چشم دینلدکده کوزی قره یعنی قره کوزلی معناسنه وصف ترکیبی قیلندن برکله اوله رق براسمه صفت اولور . طفل سیاه چشم کبی . بعضاً صفت تقدیم اولنمقسرین موصوفک کسره سی حذف ایله وصف ترکیبی اولور . مثلاً : دل شاد ،

کسرلام ایله شاد اولان کوکل ، دیمکدر ولامک سکونیه دلشاد
ایسه کوکلی شاد معناسنه وصف ترکیبی اولور . دلسته دخی
بو قیلندر .

فارسیده دیکر بر وصف ترکیبی دخی واردر . فقط وصف
سبی اولیوب وصف ذاتیدر . شوپله که امر حاضرک مفعولی
اوست طرفه کچورلدکده ایکسی بر صفت اولور . مثلاً فارسیجه
کوستر معناسنه اولان (نما) یه مفعول اوله جق بر اسم انک اوست
طرفه کچورلدکده وصف ترکیبی اولور . نته کیم : رونما ، یوز
کوسترن و صداقت نما ، صداقت کوسترن و حیرت نما ، حیرت
کوستریجی دیمک اولور .

فارسیجه امر حاضرلردن بو وجهله وصف ترکیبی یایلق
قاعده مطرده در . لکن فارسینک امر حاضرلرینی اوکرنک
سماعه موقوفدر . بناء علیه لسان عثمانیده بو وجهله مستعمل اولان
امر حاضرلر ذیل کتابک دردنجی فصلنده ضبط و تحریر اولنور .

فصل ثالث

ترکیب اسنادی بیاننده در .

ترکیب اضافی و ترکیب وصفی برر ترکیب ناقصدر که آنلر
ایله سوز تمام اولماز . اما موصوف مبتدا و صفت خبر قیلنهرق

ادات ربط ایله یکدیگره ربط اولنسه لر ترکیب اسنادی اوله رق سوز تمام اولور و بوکا جله اسمیه دینلور .

ادات ربط (در) و (درلر) لفظلریدر . مثلاً : سرت هوا دیدیکمزده « سرت » هوانک صفقی اولور ، لیکن برکلام اولماز . اما « هوا سرتدر » دیدیکمزده هوا مبتدا وسرت خبردر وربط اولنهرق جله سی برکلام اولوب بوکا جله اسمیه دینلور . « آنلر عاقلدرلر » جله سی دخی بومنوال اوزره در . بونلر جله اسمیه نک مثبتی اولوب منفی قیلنق ایستیلدیکی حالده (دکل) علاوه اولنور . هوا سرت دکلددر ، آنلر عاقل دکلددرلر کبی .

رابطه بعضاً طرفلرده الحاق ایله خبر قیلنور . فلان آدم اوده در یاخود دکلددر کبی که اوده کائن و موجوددر یاخود دکلددر ، دیک اولور . و بعضاً وارددر ، یوقدر لفظلری رابطه اولور . نته که : اکا امنیتم وارددر یاخود یوقدر ، دینلور .

جمله ایکی قسمدر : بری جمله اسمیه در که بوجه بالا مبتدا و خبردن ترکیب ایدر . دیکری جمله فعلیه در که فعل ایله فاعلندن ترکیب ایدر . نته که باب مخصوصنده کلور .

تکمله — ترکیبده اسملر درت حال اوزره بولنورلر :
اولاً مجرد یعنی فاعل یا مبتدا و خبر اولوب حالی اوزره قالورلر . یعنی آخرلری ساکن ایسه ساکن ، متحرک ایسه متحرک قالور . فقط مضاف اوله قلیری حالده فصل اولده بیان اولندیغی اوزره آخرلری ساکن ایسه حرکه لنور و متحرک ایسه سین زیاده قیلنور .

ثانیاً مضاف الیه اولوب ینه فصل مذکورده بیان اولندی
اوزره آخرلرینه ادا ت اضا فت لاحق اولور وسا کن ایسه
حرکه لنور و متحرک ایسه نون زیاده قیلنور . فقط ادا ت اضا فت
مخدوف اولدیغی صورته اضا فت بیانیه ده مضاف الیه لر مجرد
صورته ایراد اولنور .

ثالثاً بر فعلک مفعول بهی اولوب آخری سا کن ایسه مکسور
قیلنور و کسره یه علامت اوله رق یا یازیلور و متحرک ایسه یاه
مکسوره زیاده قیلنور . نته که (بهاری سورم . باغچه یی صولارم .
شتای کوردم . صوبای یاقدم . دستی یی طولدرم . قوی قیادم)
جمله لر نه کی بهاری ، باغچه یی ، شتای ، صوبای ، دستی یی ، قوی ،
لفظ لری کبی .

رابعاً بر فعلک مفعول الیهی اولوب آخری سا کن ایسه مفتوح
قیلنور و قمه ده علامت اوله رق های رسمیه یازیلور و متحرک ایسه
یاه مفتوحه زیاده قیلنور . نته که (واپوره بیدم . قاره یه کیردم .
هوایه آلداندم . قیی یه یناشدم . قویه واردم) جمله لر نه کی
واپوره ، قاره یه ، هوایه ، قیی یه ، قویه لفظ لری کبی .

مبهماتده دخی قاعده بو وجهه در . فقط کندی لفظنک
مفعول لر نه یا یرینه نون کلور و کندی ، کندینه دینلور . اسم
اشارت لک مفعول به لری دخی بویه نون ایله کلور و بونی ، شونی ،
دینلور و مفعول الیه لر نه صاغر کاف کتوریلور و بوکا شوکا دینلور .

باب رابع

ضمیر بیلنده در .

ضمیر بش صنفدر : ضمیر شخصی ، ضمیر اضافی ، ضمیر وصفی
ضمیر نسبی ، ضمیر فعلی ، در .

فصل اول

ضمیر شخصی بیائنده در .

ضمیر شخصی اسمک یرینی طوتان ضمیردر واوچدر . یعنی غائب
مخاطب و متکلم ضمیرلریدرکه او ، سن ، بن ، کلهلریدر . جعنده
آنلر ، سز ، بز ، دینلور . بعضاً او یرینه اول قوللانیلور و بعضاً
تعظیم ایچون مخاطب و متکلمک جملرینه دخی (لر) علاوه اولنهرق
سزلر ، بزلر دیناور و متکلمک مفردینه متکلم وحده وجعنده
متکلم مع الغیر دخی دینلور .

اشبو ضمیر شخصیلر مجرد یعنی مبتدا و خبر اولدقلری کبی
مضاف الیه و مفعول دخی اولورلر . فقط اولفظی براداته متصل
اولدقده مفتوح قیلنور و برنون زیاده ایدیلور . دیکرلرندن بعضلری
دخی برر صورتله تغیر ایدر . تفصیلی زیرده کی جدولدن معلوم
اولور .

مفعول به	مضاف الیه	مجرد	مفعول الیه
آفی	آنک	او	اکا
سنی	سنگ	سن	سکا
بنی	بنم	بن	بکا
آنلری	آنلرک	آنلر	آنلره
سزی	سزک	سز	سزه
بزی	بزم	بز	بزه

ضمیر غائبک بر مرجعی اولمق یعنی یرینه قائم اولدینی شخصک یاخود دیکر شیئک اولجه ذکرى کچمک لازم کلور . فقط بعضاً مرجعسز قوللانیلوب ضمیر مبهم دینلور و بر اسم مبهم یرینی طوتار . نته که : (انسانیت اودر که نعمت قدرینی بیله سین .) و (مصلحت اولدر که هنر و معرفته سعی ایده سین .) و (آنلر که وفاسزدر ، برایشه یارامازلر .) کلاملرنده واقع اولان او و اول و آنلر کی . و باب اولده بیان اولندینی اوزره او ، و اول بعضاً ادات تعریف اوله رق اسم جنسلرک اولنه داخل اولور .

فصل ثانی

ضمیر اضافی بیاننده در .

ضمیر اضافی مضافه لاحق و مضاف الیهه راجع اولان ضمیر در . و مضاف الیهک ادات اضافدن عاری اولدینی صورتده اضافه دلالت ایلیان ضمیر اضافیدر .

ضمير اضافى مضاف اليهك حاله كوره غائب ، مخاطب و متكلم
ضميرى اولور . شويله كه : غائب صورتنده ضمير اضافى غائب
ضميرى اولور و مضاف اليه ضمير مخاطب ايسه او دخى مخاطب
و متكلم ايسه متكلم ضمير اولور .

غائب صورتنده ضمير اضافى كسره يه علامت اولان يادن
عبارتدر . آنك امرى كې . فقط اضافت فصلنده بيان اولنديغى
اوزره مضافك آخرنده حرف املا ويا حرف مد بولنور ايسه
برسين زياده قيلنور . آنك خانهسى ويا لىسى كې .

مضاف جمع اولديغى حالده دخى حكىمى بوجملهدر . آنك
امرلى و آنك امرنامه لرى .

اسملىر غائب ديمك اولديغندن غائب صورتى تغييرنده آنلر
دخى داخل اولور . نته كه ناظرك امرى و ناظرك امرنامهسى
يا امرنامه لرى و قوناغك قبوسى يا قبولرى دينور .

مضافلر بعضاً بويله جعلنور ، اما ضمير اضافى جعلنمز والا
جعلنوبده مثلاً آنلرك كتابلرى دينلسه ضمير اضافينك جعيميدر ؟
يوقسه مضافك جعيميدر ؟ يعنى جمله سنك مشترك بر كتابى ديمكدر ؟
بيلنه مز .

بناء على ذلك غائب صورتنده مضاف اليه جمع اولسه دخى
ضمير اضافى مفرد اولور . آنلرك حالى و آنلرك صفاسى دينلور .
فقط براسم عربى عربجه جعلند كدنصكره تكرار (لر) ايله

جعلنمسی جائز اولمديفنندن آنده بواشتباه بولنيه جفنه مبنی غائب
 صورتنده آکا الحاق اولنه جق ضمير اضافينك (لر) ايله جعلنمسی
 جائز اولور . نته كه شو باغلرك اطراف اربعه سی دینلدیکی کبی
 شو باغلرك اطراف اربعه لری دخی دینلور و اولکی صورتده
 او باغلرك جله سنك درت طرفی ، ایکنجی صورتده ایسه هرباغك
 آیری آیری درت طرفی دیمك اولور .

ضمير اضافينك مفرد مخاطبی (صاغر كاف) جعی (گز)
 ومفرد متکلمی (م) وجعی (من) در . مثاللری بروجہ آتی
 تحریر اولنور :

سنك كتابك ، سزك كتابكز ، بنم كتابم ، بزم كتابمز ،
 امرك ، امركز ، امرم ، امرمز

آخرنده های رسمیه بولنان مضافك مثالی :
 خانه ك ، خانه كز ، خانه م ، خانه مز .

آخرنده الف اولان :
 صوباك ، صوباكز ، صوبام ، صوبامز .

آخرنده یا اولان :
 افنديك ، افنديكز ، افنديم ، افنديمز .

افندی لفظنك كثر استعمالنه مبنی متكلمك مفردنده اكثريا
 وچمنده بعضاً یاسی حذف اولنه رقی افندم ، افندمز صورتنده یازیلور .

آخرنده واو اولان :

قبوك ، قبوكز ، قيوم ، قيومز .

مضاف اليه متعدد اولوبده برى متكلم وديكرى مخاطب يا غائب اولسه ، مضافه ضمير متكلم الحاق اولنور . نتهكيم : سنك وبنم حالمز ، ياخود ، آنك وبنم حالمز ، دينلور . اكر برى مخاطب ، ديكرى غائب اولور ايسه ضمير مخاطب الحاق اولنور . نتهكيم : آنك وسنك حالگوز ، دينلور . مضافده احوال اربعه جارى اولور يعنى مجرد ومضاف اليه ومفعول به ومفعول اليه اولور . مثاللى بروجہ آتی بیان اولنور :

آخرنده حرف انفصال اولانلردن ،

غائب صورتنك مثاللى :

مفعول اليه	مفعول به	مضاف اليه	مجرد
امرينه	امريني	امرينك	امري

مخاطبلرك مثاللى :

امرك	امركك	امركي	امركه	مفرد
امركز	امرككز	امركزي	امركزه	جمع

متكلمك مثاللى :

امرم	امرمك	امرمي	امرمه
امرمز	امرمكز	امرمزي	امرمزه

بعضا مضاف ومفعوللرده علامت كسره اولان يا حذف ايله

مثلاً امرنى امرنه يازيلور . آخرنده حرف اتصال اولانلرده ايسه بويلا اكرتيا حذف اولنور .

آخرنده حرف اتصال اولانلردن ،

غائب صورتتك مثاللى :

كتابتى كتابك كتابى كتابنه

مخاطبلرك مثاللى

كتابك كتابك كتابكى كتابكه مفرد
كتابكز كتابكزك كتابكزى كتابكزه جمع

متكلملرك مثاللى :

كتابتى كتابك كتابى كتابه مفرد
كتابكز كتابكزك كتابكزى كتابكزه جمع

بعضاً ضمير اضافى حذف اولنور . نته كيم : « عالمك ذوقنى سورم . واياى ذوقك قدرين بيلهلم . » دىنلور كه ذوقنى و قدرينى ديمكدر . « مولى اقبالك وعمر ك مزيد ايلسون » دىنلور كه اقبالكى وعمر كى ديمكدر . « فلك بنم حالم يمان وافكارم پريشان ايتدى . » دىنلور كه حالمى وافكارمى ديمكدر .

اكرتيا مضاف اليه اولان ضمير مخاطب و متكلم حذف اولنور
ضمير اضافى اليه اكرتيا اولنور . نته كيم : سنك كتابك ، بنم كتابم
دنيله جك يرده كتابك ، كتابم ، دىنلور .

بعضاً مضاف اليه اولان ضمير شخصيلر ابقا اليه ضمير اضافيلر

حذف اولنور. نته کیم: سنک او، سزک او، بنم او، بزم او دینلور.
 سائر اسملر کبی بعض مبهمانه دخی ضمیر اضافی لاحق اولور.
 مثلاً: کندسی، کندوسی، کندیک، کندوک، کندیم، کندوم،
 کندیمز، کندومز دینور. فقط مفرد متکلمنده اکثریا حرف
 املا حذف ایله کنسدم یازیلور. كذلك (بنم سندن بشقه کیم
 وار؟) دینور. بعضاً (نه سی) لفظنک های رسمیه سی حذف
 ایله (نی) صورتده یازیلور.

تنبیه. — بنم اومک طامی دینلدکده بنم ضمیر شخصی مضاف ایله
 و (مک) ضمیر اضافی، واو، ضمیر شخصی یه مضاف اولدینی
 کبی طامه نسبتله دخی مضاف ایله وطام اکا مضاف اولور. بو
 ایکنجی اضافتک ضمیر اضافیسی (یا) اولور. بعضاً بوصورتله
 تنابع اضافات وقوع بولور. نته کیم: بنم اومک طامنک کناری.
 دینلدیکی تقدیرده طام هم مضاف وهم مضاف ایله اولور.

فصل ثالث

ضمیر وصفی بیاننده در.

ضمیر وصفی (کی) اداتیدر که ظرفله لاحق اوله رق صفت
 مقامنه قائم اولور. نته که: اوده کی بازار چارشویه اویماز. دینور که

اوده اولان بازار ديمك اولور وبوصورتده دائما مفرد اوله رق قوللا نیلور . برنجی معناسنه اولان اولکی وابتدا کی دخی بوقیلدندر ، وبعضاً مضاف الیه لاحق اوله رق موصوفی محذوف صقتلر کی استمک مقامنه قائم اولور و (لر) ایله جملنور . مثلاً : بنمکی ، بنمکینک ، دینلور . مضاف الیه اولدقده برقاعده آخینه (نک) کلور . بنمکینک کی . مفعول به و مفعول الیه دخی اولور ، فقط آنلرده دخی آخینه نون کلور . مثلاً : بنمکی ، بنمکینه دینلور ، سائر صیغه لری دخی بوکا قیاس اولنه . (کی) بعضاً فعللره دخی لاحق اولور و آغیر حرکه لی ماده لرده (غی) لفظنه مبدل اولور ، نته که باب فعلده کلور .

فصل رابع

ضمیر نسبی بیاننده در .

ضمیر نسبی جمله اسمیه لک جزء آخینه لاحق وادات ربطدن مغنی اولور . بونلرک غائبی یوقدر . غائب صورتسده اادات ربط آنلردن مغنی اولور . او شاعر در : آنلر شاعر در لر کی .
اسملر بوبابده ضمیر غائب حکمنده در . نته که : فلان افندی شاعر در دینلدیکی کی .

ضمیر نسبینک مفرد مخاطبی (سین) و جمعی (سکز) لفظلریدر ،

سن کاتبین. سز کاتبسکز، وسن منشیسین، سز منشیسکز کبی. اما
مفرد متکلمی میم ساکنه وجعی زای ساکنه ایله ایکیسنده دخی
خبرک آخری ساکن ایسه کسره ایله حرکه لنور: بن کاتبم،
بز کاتبز کبی. اگر متحرک ایسه بر یا زیاده قیلنور: بن بنده میم،
بز بنده یز، کدایم، کدایز، منشی میم، منشی یز کبی.
ضمیر نسبی بعض افعاله دخی لاحق و فاعلرینی مبین اولور.
تفصیلی باب فعلده کلور.

فصل فاسی

ضمیر فعلی حقنده در.

ضمیر فعلی انجق بعض افعاله لاحق اوله رق فاعلرینی مبین
اولور. بونلر دخی مخاطب و متکلمه منحصر اولوب غائبلری
یوقدر و مخاطبک مفردی صاعر کاف اولوب جعنده اکا بر زا
علاوه اولنور. کلدک، کلدیگز، ویازدک، یازدیگز کبی.
مفرد متکلمی میم وجعی خفیف حرکه لی کله لرده کاف و آغز
حرکه لی کله لرده قاندر: کلدم، کلدک و یازدم، یازدق کبی.
تفصیلاتی باب فعلده کله جکدر.

تکلمه — فارسی ضمیرلر لسان عثمانیده مستعمل دکلدر. عربی
ضمیرلر رأساً قوللانماز. فقط بعضاً عباره آره سنده کلور. تفصیلی
انشاءالله باب مخصوصنده بیان اولنور.

باب خامس

فعللر بیاننده در .

فصل اول

فعللرك صنف و اقسای بیاننده در .

مقدمه ده اشعار اولدینی اوزره فعللر اوج زمانك برنده بر
ایشك یاخود بر حال، کیفیتك وقوعنی افاده ایلر. مثلاً: جبه سنی
کیش کلیور. و اوویه جق، دینلده کیش کلهسی کچمش زمانده
کیمك ایشنك وقوعنی، و کلیور کلهسی کیمك ایشنك زمان حالده
وقوع بولمقده اولدیغنی و اوویه جق، کلهسی او یومق حال و کیفیتك
زمان مستقبلده وقوع بوله جغنی افاده ایلر و کیمك و کیمك مثللو
ایشلر و او یومق کبی حال و کیفیتلر همه حال بر ذاتك صفتلری
اولور و ایشه اودانه فاعل دینلور و فعللر زمانه دلالت ایلدیکی
کبی بر فاعله اسنادی دخی متضمن اولور. زمانه تعرض اولمقسرین
یا لکز فاعللر بو وصفلر ایله اتصافنه دلالت ایچون موضوع اولان
کلملر صفات مشتقه در. یازان، یازیلان، یازیجی، یازمه جی کبی.
ذات و زمانه تعرض اولمقسرین مجرد اول معنای فعلی یه دلالت
ایچون موضوع اولان کلملر مصدر در. کیمك، یازمق، او یومق
کبی. بناء علی ذلک معنای مصدری کیمك فعللره و کیمك صفات مشتقه یه
نسبتله ساده اولدیغندن جهسی مصدر دن مشتق اعتبار اولنور .

فعللره ذات فعل ، و صفات مشتقده فرع فعل و مصدره اصل فعل دینور . اما بحسب اللفظ جمله سنك مأخذی ماده اصلیه دركه لسان ترکیده امر حاضر صیغه سی اولوب خفیف حرکه لی اولنلرینه (مك) و آغیر حرکه لی اولنلرینه (مق) الحاق اولندقدہ مصدر اولور و صور سائرۀ مختلفه ایله تصریف اولنهرق ذات فعللر حاصل اولور و اول صورتلره صیغه دینور .

فعللر ماده اصلیه اعتباریله مجردات و مزیداته منقسم اولور . شویله که : ماده اصلیه ده حرف زاید یوق ایسه ، مجرد دینلور که جوهر کله دیملدر و اگر بر معنی ایچون زیاده قلمش حرف واریسه ، مزید فیه دینلور .

مجردات یافرادی یعنی جوهری تک حرفدن عبارت اولور و یا ثنائی یعنی ایکی حرفلی یاخود ثلاثی یعنی اوچ حرفلی یاخود رباعی یعنی درت حرفلی و یا خاسی یعنی بش حرفلی اولور . فرادیلردن شمدی لسان عثمانیده مستعمل اولنلر دیمك ، قومق ، یمك ، یومق کله لرندن عبارتدر .

خاسیلر دخی اصماریلامق ، ایمزغتمق ، اینجقمق کله لرینه منحصردر . ثنائی و ثلاثی و رباعیلر دخی سماعی اولمغله بونلردن لسان عثمانیده حالا زباززد اولانلر ذیل کتابك اوچنجی فصلنده ضبط و تحریر اولنور .

بروجه بالا کله نك جوهری تک حرفدن عبارت اولدیغی

حاله بالطبع متحرك اولدينى كېي دىكرلرينك دخى حرف اوللرى متحرك اولور و قحمة ثقيله علامت اولمق اوزره الف يازيلور يازمق كېي و اكر حرف اولى الف ايسه اوزرينه مد اشارتى قونور . آلمق كېي . كسره يه علامت اوزره يا يازيلور . كيمك ، قيرمق كېي . فقط بعضاً بو يا حذف اولنور : اصرمق ، اصلامق كېي . ضمه نك دخى انواعنه كوره علامت مخصوصه قونور . كورمك ، اوزمك ، صورمق ، ظورمق كېي . بر كلمه بر نوعدن ايگى حرکه بربرى آرقه سنده كلور ايسه بعضاً اولكيسى حذف اولنور . مثلاً: ياشامق و ياناشمق يشامق و يناشمق صورتنده يازلمق جائزدر . اما جوهر كلمه نك حرف اخيرى اكثرياً ساكن اولور و بعضاً متحرك اولوب حرکه سى قحمة خفيفه ايله هاى رسميه و قحمة ثقيله ايله الف و كسره ايله يا يازيلور و ضمه ايسه آخر كلمه اولان ضمه لر دائماً مقبوض اولديغندن خفيفلرنده (و) و ثقيللرنده (و) اشارتلى قونور .

اسنه مك ، آرامق ، اريمك ، آجيمق ، سوپورمك ، چورومك ، اوقومق ، اويومق كېي . ايله مك ايله ايسته مك لفظلى كثر الاستعمال اولديغندن اكثرياً تخفيف ايچون هاسز اوله رق ايلمك و ايستمك صورتنده يازيلور . بعضى اغلامق كېي كلمه لرى الفسز اوله رق اغلمق صورتنده يازارلر . حروف املا بر نوع حرکه اولوب بونلرك طى و اثباتنده اصحاب انشانك اختلافلى چوقدر . سوريمك ،

قوریمق، یوریمق لفظلرینک رالری شمدی ضمه مقبوضه ایله تلفظ اولنمقده اولدینی حالده از قدیم اوله کلدیکی اوزره اکثریا یا ایله یازلمقده در . ایسته بونلر مجردات اولوب آنلره بعض حروفک علاوه سیله مزیدات صیغه لری حاصل اولور . آنلرده فصل مخصوصنده بیان قیلنور .

لازم و متعدی . — معنی جهتیه فعللر اولا لازم و متعدی قسملرینه تقسیم اولنورلر . شوبله که : فاعلک فعلی آخره تجاوز ایلر ایسه متعدی والا لازم اولور . مثلاً کاغدی کیمک و قلمی قیرمق متعدیدرلر . زیرا مفعول بهه یعنی کسین و قیریلان شیه تاثیر لری واردر . کیمک ، وارمق فعللری لازمدر . زیرا آنلر فاعل ایله قائم برر صفت اولوب بشقه سنه تاثیر لری یوقدر . بناء علیه مفعول به آلازلر . فقط مفعول الیه تعلق ایدرلر . نده که : فلان بره کیتدم دینلور .

اما اسنه مک و او یومق کبی یالکز فاعلک حال و هیئتینی مبین اولان فعللر نه مفعول بهه طوقنور ونده مفعول الیه تعلق ایدر . متعدیلرک بعضیلری یالکز مفعول بهه تعلق ایدر و بعضیلری ایکی مفعوله یعنی هم مفعول بهه و هم مفعول الیه تعلق ایدر . مکتوبی پوسته خاندیه و یرمک کبی ، علی العموم فعللرینه معنی جهتیه خاص و عام دیو ایکی قسمه منقسم اولورلر . فعل خاص بر مخصوص ایش یا خود بر مخصوص کیفیت بیان ایدن فعللردر : کیمک ، قیرمق ، بیومک ، او یومق کبی

فصل عام جميع افعاله ياغود جميع احواله شامل اولان
فصلردر : ايتك واولمق كې . اولمق لازم و ايتك متعددر .
ايتك و قيلمق دخى ايتك معناسندهر . افعال خاصه بعضاً كندو
صنغلريه تركب ايدر . سرعلى كيتك ويايان يوريمك وكوزل
يازمق كې . وفعل متعدلرى بعضاً مفعول به ايله تركب ايدر
واحواله مفعول به ادات مفعوليت اولان كسر علامتدن تجريد
اولنور . مكتوب يازمق كې .

كلمه افعال عامديه : (اولمق) جمله اسميه لاحق اولور .
يعنى آندن اول مبتدا وخبر اوله بيله جك ايكي كلمه دن صكره كلور
وخبر ايله تركب ايدرك بر فعل كې اولور . نته كيم : فلان آدم
زنگين اولدى . دينلديكي كې . بناء على ذلك بوماده اسمله تركب ايلز
وبر اسم ايله تركب ايتدكه اسم مذكور صفت ايله تاويل اولنور .
ننه كه : ديل اوله دينلور وديل لفظنه سويليجى معناسى ويريلور .
بعضاً اولمق مقامنده بولنقى قوللانيلور . حاضر بولنقى كې .

ايتك ، ايتك ، قيلمق ، فعللرى دخى جمله اسميه لاحق
اولورلر . فقط خبر ايله تركب ايليوب مبتدا دخى مفعول به اولور .
فلان آدمى ممنون ايتك ، خشنود ايتك ، متشكر قيلمق كې ،
فقط بعضاً مفعول به اولان اسم ايله تركب ايدرلر ومفعول به
دخى علامت مفعوليت اولان كسره دن مجرد اولور . ايسستك
ايتك ، ناز ايتك ، نماز قيلمق كې .

بیور مق لفظی فی الاصل امر ایتک معناسنه افعال خاصه دن
ایسه ده اکثریا مقام تعظیده ایتک معناسنه قوللانیلور وبو صورتله
افعال عامه دن اولور .

افعال قلوب — ذهنده بروصفک برشیئه نسبتنه دلالت
ایلیان فعللره افعال قلوب دینلور که مضمونلری اولان نسبت
ذهنیه ، قلبه مخصوص اولان احوال دندر .

بوفعللر دخی جلهء اسمیه لاحق اولور وخبر ایله ترکب
ایدوب مبتدا دخی آنلره مفعول به اولور . نته که : بن انی عاقل
صاندم . دینلده ، صانمق فعلی کبی . وبعضاً بوفعللر تقدیم
اولنهرق جلهء خبریه (که) اداتیلر ربط اولنور . نته که مذکور
جمله نك معناسنه اولهرق ، بن صاندم که او عاقلدر . دینلور .
اما ، بن آنك عاقل اولدیغنی صاندم . دینله من .

ظن وزعم ونخمین وعد واعتبار ایلک هپ افعال قلوب دندر .
عد واعتبار ایلک معناسنه صایمق ، ورأی ایتک معناسنه کورمک ،
دخی بویله در . اما طانمق ، سرمک ، تشخیص ایتک افعال
قلوبده معدود دکلدر . بیلک ایکی وجهله استعمال اولنور . بریسی
برشیئی بروصف ایله متصف دیو اعتقاد ایلکدر . بوصورتله
افعال قلوبده اولور . نته که : بن آنی اوصلو بیلوردم دینلور .
دیگری برشیئی بخصوصه ذهنه المقدر که طانمق ، واکر نك
قیلندن اولور . نته که : بن آنك صایغیسز اولدیغنی طورندن
بیلدم دینلور . لکن بوصورتله افعال قلوبدن معدود اولماز .



فصل ثانی

مزیداته دائر در .

جوهر کله یه ادات تعدیه اولان قاساکنه یاخود (در) الحاق اولندقدده لازم ایسه بر مفعوله متعدی اولور . اویناتقی کبی وبر مفعوله متعدی ایسه ایکی مفعوله متعدی اولور . اوقوتقی کبی . واکر ایکی مفعوله متعدی ایسه فعلک اجراسنده بر واسطه بولندیغنی اشعار ایدر . کوسترتک کبی که بر شیئی بر واسطه ایله بر محله یوللامق دیمکدر .

بویابده قاعده شودر که جوهر کله بر حرفدن عبارت ایسه آنی متعدی قیلقی ایچون (در) الحاق اولنور . دیدر مک . کبی .

اما بر حرفدن زیاده اولدینی تقدیرده اگر حرف اخیری متحرک ایسه تا الحاق اولنور . استمک ، استمک ، آجیق ، آجیتقی کبی . واکر حرف اخیری ساکن ایسه (در) الحاق اولنور . کز مک ، کزدر مک ، طور مق ، طوردر مق ، طولق ، طولدر مق کبی . فقط جوهر کله ایکی حرفدن زیاده اولدینی حالده حرف اخیری (را) یاخود (لام) ایسه (تا) الحاق اولنور . اوتور مق ، اوتورتقی طارلق ، طارلتقی کبی .

بو ایکی ادات تعدیه دن بریله متعدی قلنان کله نک بر مرتبه دها متعدیسی مقصد اولدینی حالده اکا دیکری علاوه اولنور .

یازدرتمق، بیوتدرمق کبی . شاذاولهرق آتمق، صایمق، صارتمق،
قوتمق کله لرینک متعدیلری (تا) ایله آقیتق، صایتمق، صارتمق،
قورتمق کلور . و قالتمق کله سنک متعدیسی حذف قاف ایله
قالدرمق، کلور . و امک کله سنک متعدیسنده برقاعده امدرمک .
دینلیدیکی کبی (زا) ایله امزرمک دخی دینلور .

ایچمک، اوچق، آرتق، آشمق، اوشمک، باتمق، بیتک،
پیشمک، چیتق، دوشمک، شاشمق، طاشمق، طوغق، طویق،
قویق، قاقق، کچمک، کوچمک ماده لرینک متعدیلرندن (در) لفظنک
دالی حذف ایله ماقبلی حرکه لنه رک ایچرمک، اوچرمق، آترمق
آشرمق، اوشرمک، باترمق، بیترمک (بتورمک) پیشرمک،
چیقارمق، دوشرمک، شاشرمق، طاشرمق، طوغرمق (طغورمق)
طویرمق، قوپارمق، قاجرمق، کچرمک، (کچیرمک) کوچرمک
دینلور .

آزمق . چوکمک، صیزمق، ماده لرینک متعدیلری برقاعده
(در) ایله کلدیکی کبی شاذاولهرق آرتق، چوکردمک، صیزدرمق
دخی کلور . کورمک رؤیت و تسویه مصطلحت معناسنه اولور
ایسه متعدیسی برقاعده کوردرمک کلور و اگر کوزله مشاهده
معناسنه اولور ایسه متعدیسی مقامنده کوسترمک دینلور که ارا نه
دیمکدر . کلمک لفظنک متعدیسنده دخی شاذاولهرق کترمک،
(کتریمک) دینلور . کیتک لفظنک متعدیسی کیدرمک کلور که

ازاله دیمکدر . اما جل ، نقل واستحصانی مقامنده کوترمک .
دینور .

لام ابله نصیه — براسمک آخرینه لام مفتوحه الحاق اولدقدده
بر فعل متعدی صیغه سی حاصل اولور و قحیه علامت اوله رق ابرقاعده
خفیف حرکه لی اولنره های رسمیه و آغیر حرکه لی اولنره ده
الف یازیلور . تلله مک ، پوللامق ، اکرله مک ، قامچلامق کبی .
ایشله مک ، قوللامق ، کوزله مک ، یوللامق دخی بوقیلدندر .

بعض کتاب آغیر حرکه لی اولنرینی دخی های رسمیه ایله
ویولله مق قامچلامق صورتنده یازارلر . صیزلامق ، صیزلامق ،
قووقلامق ، قووقلامق ، مخفی و اووقلامق ، اووقلامق محفیدر .
بعضاً بونلر تاء تعدیه علاوه سیله بر مرتبه ده متعدی قیلنورلر .
مثلاً : آتی اکرله مک بالنفس آته اکر اورمق واکرلتمک ایسه
سأره اکر اوردرمق مقامنده قوللانیلور .

بعضه افعال لازم — اشبو لام مفتوحه اسم زمانلره لاحق
اولدقدده دخول ووصول معناسنی مفید بر فعل لازم اولور .
کیجه لدی ، صباح لدی کبی که کیجه و صباحه داخل و واصل اولدی
دیگ اولور .

کذلک اصواته لاحق اولدقدده دخی فعل لازم اولور . اوفله مک ،
ایکله مک ، چاغلامق ، کبی که اوف وایگ وچاغ ایتک دیمکدر .
بو لام مفتوحه اصواتک انجق ثنائیلرینه لاحق اولور ورباعیلرنده

لام پرینه دال مفتوحه کلور. ایکلده مک، چاتردامق، طنغردامق کبی.
 نادراً لام مفتوحه تشبیه ایچون کلور. آتلامق، کبی که آت کبی
 صمچرامق، دیمکدر. قاو لاقم دخی بوقیلدندر که قاو کبی اولمق
 دیمکدر. سین دخی بعضاً بویه تشبیهی مفید اولور. کولسه مک کبی.
 آغساقم دخی بوقیلدندر که بر طرفه آغار و میل ایدر کبی اولمق
 دیمکدر. کذلک چیکسه مک، چیک کبی یاغق معناسنه اولوب فقط
 تخفیف ایله چیه مک دینلور. و بعضاً آرزو و احتیاج معناسنی مفید
 اولور. صوساقم، و توتونسه مک کبی. طاوساقم دخی بوقیلدندر.
 فقط معنای لازمیسی اولان طاوی کچمک، معناسنده استعمال
 اولنور. و بعضاً سینک اولنه میم علاوه سیله عد ایلک معناسنه
 متعدی اولور. آزمسه مق، چوغسه مق، کبی که آز کورمک،
 چوق کورمک دیمکدر. بنسه مک دخی بوقیلدن اوله رق کندینک
 عد ایلک معناسنده.

عربیدن بو مقامده بعضاً (استفعال) صیغه سی قوللانیلور.
 استصغار، کبی که کوچکسه مک یعنی کوچک کورمک دیمکدر.
 کذلک استتقال، ثقیل کورمک، واستخفاف، خفیف عد ایلک
 معناسنده. لام وسینک بو وجهله استعماللری سماعیدر. بعضاً
 فعلک استمرارینه دلالت ایچون (را) علاوه اولنور. (سکمک) دن
 سکر مک کبی، سومر مک دخی بوقیلدندر. انجق اصلی اولان
 سومک شمدی متروک و مهجوردر.

بو (را) اصواته الحاق اولندقدہ دخی معنای استمراری مفید فعل لازم اولور . روزکار اوفورمک کبی که اوفله مک آغزله اوف ایتمکدن عبارت اولوب اوفورمک ایسه بوفعلک استمراری افاده ایدر . چاغلامق چاغرمق دخی بوقیلنددر .

وبعضاً دیگر اسم وصفتره دخی لاحق اولهرق تدریج واستمراری مشعر فعل اولور . (کیمک) دن کمیرمک و (قبا) دن قبارمق کبی . قاورمق ، صاورمق دخی بوقیلنددر . وکله نک حرفلری ایکیدن زیاده اولدینی حالده ترخیم اولنور: (سمین) دن سمیرمک . (بللی) دن بلیرمک کبی .

بوصیفه الوانده مطرددر . (آق) دن آغارمق (صاری) دن صارارمق کبی (قرمزی) دن دخی ترخیم ایله قزارمق کلور . صفتره لام ساکنه الحاق اولندقدہ فعل لازم اولهرق صیورت معنای مفید اولور . آزالمق ، چوغالمق ، طارلمق ، اکریمک ، طوغریلمق ، قیصالمق کبی .

آخر کلمده کاف یا قاف بولنور ایسه ترخیم اولنور . (کوچک) دن کوچلمک ، (اوق) دن اوقالمق ، (یوکسک) دن یوکسکلمک کبی بوصیفه دخی سماعیدر .

صیفه مطارعت . — مطاوعت فاعلک بر فصل وتأثیری قبول کیفیتیدر . قاعده سی ماده اصلیه یه نون ساکنه علاوه اولنق و آخری ساکن ایسه حرکه لثمه کدر . سونمک ، کورنمک ، بولنق ،

صانئق، سويلئمك، آرانئق، قاشئمق، بورونمك كېي. (يوتق)دن
يوتقئق شاذ در.

بعضاً نون يرينه لام كلور. آياق اوزرنده ديكلمك كېي.
(طاغئق)دن طاغئق (قورئارمق)دن قورئلق شاذ در. وبعضاً
نون يرينه شين كلور. صاوشمق، قاشئمق، بوزوشمق، كېي.
چالشمق دخي بوقيلدندر.

بعضاً لام مفتوحه ايله نون ساكنه بر اسمه الحاق اولنور
وادات مطاوعت اولور. اولئمك، كدرلئمك، خويلانئق كېي.
وبعضاً صفتلره لاحق اولور. خسته لئمك كېي. وبعضاً نون يرينه
شين كلور. ايولشمك، خوولاشمق، صيقلاشمق كېي.

اورئمك، اوزلئمك وكوجئمك، كوئلئمك وياصلانئق،
ياصيلانئق وياقلانئق، ياقلئشئق مخففيدر. وبعضاً لام ايله
نون ياخود شين تكلف وتشبه ايچون كلور. ننه كه: فلان
افندي شاعرنيور ديلور كه تشعر ايدنيور يعني طبيعت
شعريه سي اولمديني حالده شاعرلكه اوزنهرك شعر سويلكه
چاليشوب چالايور ديمك اولور. كذلك فلان آدم فرنكلشيور.
دينلده، فرنكه تقليد ايچون تكلف ايدنيور ديمك اولور.
وكذلك تركلشدي ياخود تركجه لشدي. دينلده ترك كېي اولدي
ديمك اولور. وشين بعضاً عمل مكرري مشعر اولور. آلشمق
كېي كه آله آله عادت ايدنمك ديمكدر. كلشمك دخي بوقيلدندر.

صیغه شرکت . — بر فعلده متعدد فاعل لرك شركتى افاده ایچون ماده اصلیه شین ساکنه الحاق اولنور و آخری ساکن ایسه حرکه لنور . چکشمک ، قاجشمق ، آغلاشقی کبی .

شاذ اوله رق طوقنق ماده سنده نونك حذفيله وصارمق ماده سنده میم زیاده سیله طوقشمق وصارماشقی دینلور . و بعضاً اسملره لام و شین الحاق اولنور رق صیغه شرکت یاپیلور . عهدلشمک ، اوزلاشقی کبی . یاناشقی دخی بوقبیلندر که اصلی یانلاشقی یعنی یان یانه کلک اولوب لامک حذفيله تخفیف اولنمیشدر .

صیغه شرکتده بعضاً ادات تعدیه علاوه اولنور . چکشدرمک ، اوزلاشدرمق کبی .

لسان عثمانیده صیغه شرکت ایکی صورته استعمال اولنور . صورت اولی شرکت بین الاثنین اولوب بوایکیدن بری فاعل و دیگرى مفعول الیه قلنور . و فاعلک فعله مبدأ و بادی اوله رق مفعول الیه مشارکتی صراحة ، مفعول الیهک دخی اکامشارکتی ثمنناً افاده ایلر . نته که : بوالبسه اکا یاراشدی دینلده که صراحة البسه اکا یارادی یعنی اویدی ، صالح اولدی ، یاقشدی ، چکاک اولوب ضمناً انک دخی البسه یه اوینون اولدینی اکلاشیلور . قایق اسکله یه یاناشقی وفلان کشی فلان محله ایرشمک یاخود نشمک و او بوکا بشمک و آئی بوکا دکشمک دخی بوقبیلندر .

وبعضاً اول ایکیدن بری کافی السابق فاعل اولوب دیکری
(ایله) اداتيله تقدیم اولنور .

نته که : مشتری بایع ایله سویلشدی . وفلان دولت فلان
دولت ایله طوتشدی . و آله جقلولر بورجلی ایله خیلی
اوغراشدیلر . و بورجلی آله جقلولر ایله اویوشدی دینلور .
صورت ثانیه بر فعلده ایکی یاخود زیاده فاعللك علی الاطلاق اشتراکی
افاده اولنمقدردر .

نته که : قاری قوجه چکشدی . بینلرئنده سویلشدیلر ،
اویوشدیلر ، اوزلاشدیلر دینلور . عربجه صورت اولاده (مفاعله)
صیغه می قوللانیلور ،

نته که : ایراد من مصرفز مساویدر . و بومطالعده مسلککزه
مناسب و موافق دکلدر و آنلر بورأیده سکا مشارکت ایلزلر وفلان
دولت بوایشه مداخله ایده من دینلور .

و کذا فلان کیسه فلان ایله مضاربه ایتدی و فلان دولت
فلان دولت ایله محاربه ایتدی دینلور ،

اما صورت ثانیه ده (تفاعل) صیغه می قوللانیلور . نته که :
ایراد و مصرفز متساویدر و دول متجاوره و معاهده نك رأیلری
متوافق و معامله لری متناسب اولمیدر دینلور .

قاعده ، — بعض مصادر اصلیه شمیدی متروک و مهجوره
اولدینی حالده مشتقاندن بعضیلری مستعملدر .

از جمله اصمق مجبور اولدینی حالدہ متعدسی تا ایلہ اصمق
ومطوعی نون ایلہ اصمق مستمدر . اوکرتک ، توکتمک ،
دونامق ، قوشاتمق ، دخی تا ایلہ متعدی و نون ایلہ مطوع
اولوب حالبوکه اصلری مفقوددر . و طرمامق مستعمل اولمیوب
مطواعری اولان طرمامق و طرمامق ایسه مستمدر . اولامق
فی الاصل ترجه وصل ایتک معناسنه اولدینی حالدہ مجبور
اولوب انجق مطاوعت و شرکت صیغه لری اولان اولانغق
واولاشمق مستمدر .

کذلک بارمق فی الاصل محافظه ایتک وکی بی لیان سلامته
صوقق معناسنه اولدینی حالدہ مجبور اولوب حالبوکه مطاوعت
و شرکت صیغه لری اولان بارنق و بارشمق کثیر الاستعمالدر .

کذلک قارمق ، ادخال ایتک معناسنه اولدینی حالدہ مجبور
اولوب مداخله معناسنه قارشمق ایسه استعمال اولنمقدهدر .
دبرنک و دبرشمک دخی بوقیلنددر . و بعض مشتقاتک عرفاً
معناسی تغیر اولنمشدر . مثلاً : اوایلایمق اوایلایمق دیمک اولدینی
حالدہ اشغال معناسنه استعمال اولنمشدر .

کذلک یاقشمق بربری یاقق و پارلاتق معناسنه اولدینی حالدہ
یاراشمق معناسنده مستمدر . بورالری علم لفته عاندر .



لاحقه

مثبت و منفی حقنده در .

مثبت ادات نفیدن عاری اولان فعللردر . بالاده کرارآ
و صرارآ مذکور اولان مثاللر کبی .

منفی مادهٔ اصلیه سنه ادات نفی لاحق اولان فعللردر . فعللرده
ادات نفی میم مفتوحه در . کلمک ، یازمق ، استه ممک ، آرامق ،
اریممک ، او قومق کبی .

اشبو میم نافیه بعضاً خفیف حرکه لی ایسه های رسمیه ایله
و آغیر حرکه لی ایسه الف ایله کلامک ، یازما مق صورتنده یازیلور .
بعضیلر خفیف حرکه لیسنی دخی الف ایله کلامک صورتنده یازارلر .

فصل ثالث

معلوم و مجهول بیاننده در .

فعل متعدی یا معلوم و یا مجهول اولور . شویله که : اکر فاعلنه
اسناد اولنور ایسه معلوم اولور . و اکر فاعلی مسکوت عنه اولور
ایسه مجهول اولور و مفعول به فاعلک مقامنه قائم اولدرق علامت
مفعولیت اولان کسره دن تجرید اولنور .

سوز کسـلـدی . تذکره یازلـدی . دنیـلـدیکی کـبی که ، کسن
ویازان کیم اولدینی مسکوت عنه قالور .

معلومی مجهول قیلیق طریق بودرکه ادات مصدرک ماقبلی
لامدن بشقه برحرف ساکن وار ایسه حرکه لنه رک اکا برلام
علاوه اولنور . سالف الذکر مثالدرده اولدینی کبی . اکر لام
یاخود دیکر بر حرف متحرک ایسه نون علاوه قنور . بیلنک ،
ایستنک ، ارانق ، دینک ، اوقونق کبی .

بعضاً شاذ اوله رق دنیلک وایستنیلک دخی دنیلور . ایلک
لفظندن مجهول کلز . فقط آنک مجهولی مقامنده اولنق لفظی
قوللانیلور . مفعول الیهی اولان فعل لازمردن دخی مجهول
کلور . فلان یره کیدلدی یاخود وارلدی دنیلدیکی کبی . اما
اسنهمک وایومق کبی مفعول الیه تعلیق ایتمیان لازمردن مجهول
کلز .

ماده اصلیه نک آخری متحرک اولدینی صورتلرده مطاوعت
ایله مجهول صیغه لر لفظاً متحد اولوب انحق قرینه ایله فرق اولمور .
مثلاً بر آدم شوراسنی بوراسنی آرادی . مقامنده ، آراندی . دنیلور
ایسه مطاوعت اولور . اکر فلان شیئی آرادیلر . مقامنده ، فلان
شی آراندی دنیلور ایسه مجهول اولور . کذلک « بر آدم کندهی
کندینه سویلنیور » مطاوعت « و بر سوز سویلندی » مجهولدر .
کذلک بر آدم کندنی کندینه ییقانق ، مطاوعت والبسه ییقانق

مجهولدر . كذلك لام ايله مستعمل اولان مطاوعت صيغهسى دخى لفظاً مجهوله مشابه اولور وقرينه ايله فرق اولنور . مثلاً : بر آدم آياق اوزره ديكلمك مطاوعت ويره بر آغاچ ديكلمك مجهولدر . بمضاً بر ماده ده كاه نون ايله وكاه لام ايله مطاوعت صيغهسى ياپيلور ومعناجه ايكي سسنگ پيننده فرق بولنور . مثلاً : عربيه چكلمك مجهولدر . و بر آدم كندى كندينه بر كوشه يه چكلمك مطاوعتدر . كذا بر آدم برشيدن چكلمك يعنى صاقتمق دخى مطاوعتدر .

لام ايله متعدى قلنان كلمه لر ك دخى مجهوللرى ايله مطاوعلرى بر در . مثلاً : آت اكرلنك و مكتوب يوللانمق مجهولدر . وخاتم كندى كندينه سويلنك وياشمق قلنمق مطاوعتدر .

ضابطه — اادات تعديه اولان تالر ادواتن بر شيشه متصل اولوب ده حر كه لند كرنده داله منقلب اولمق قاعده مطرده در . بناء عليه مجهوللرده دخى بوقاعده جارى اولوب اريدملك ، ارادلمق ، قباردلمق ، اوقودلمق دنيلور .

بوقاعده جوهر كلمه دن اولان تالر حقنده جارى دكلدر . فقط ايشيتك ، اونوتمق ، آوتمق ، ديتك ، كيتك ، كوتك كلمه لر ينك تالرى بروجّه بالا حر كه لند كده تاء تعديه كبي داله قلب اولنور و مجهوللرى ايشيدملك ، آودلمق ، ديدملك ، كيدملك ، كودملك ، كلور . ايتك اكر ايتك معناسنه اولور ايسه مجهولى ايدملك ، دورتمك ، قاتقمق معناسنه اولور ايسه مجهولى ايتلك كلور .

کذلک یوتمق اکر بلع معناسنه اولور ایسه مجهولی یودلق
واویونده قازانق معناسنه اولور ایسه مجهولی یوتلق کلور .
ایتمک ، دیتمک ، ماده لرینک مطاوعری دخی ایدنمک ، دیدنمک
کلور .

فصل رابع

مصدر لر بیاننده در .

بالاده بیان اولندیفی اوزره ماده اصلیه (مک) یاخود
(مق) علاوه اولندقدده مصدر اولور . سومک ، سولمک ، یازمق ،
یازلمق ، اوقومق ، اوقونق کبی .

بوکا مصدر اصلی دنیلور که برزمانه دلالت ایتدیکی کبی برذاته
نسبتی دخی ملاحظه اولنمیوب مجرد ذهنده متصور اولان برمعنای
فعلیدن عبارتدر . بوجهتله مضاف ومضاف الیه اولماز وجع قلمنز .
فقط سائر اسملر کبی مجرد یعنی مبتدا وخبر اولور . مکتبه دوام
ایتمک لازمدر . اک اعلی صنعت کوزل یازی یازمقدر . دینلیدیکی کبی
کذلک مفعول به ومفعول الیه دخی اولور . بوش کزمکی سوم .
اوقومغه هوسم وار دینلیدیکی کبی .

اشبو مصدر اصلی به نون بساکنه الحاق اولندقدده تعلیل
معناسنی مفید اولور . سومکین ویازمغین کبی که سودیکی ایچون
ویازدینی ایچون دیمک اولور .

مصدر اصلی به بعضاً (لك) یا خود (لق) زیادہ قینوب
 مصدر تأکید دنیلور . بیومکلك ، کورنمکلك ، شمارمقلق کبی .
 بعضاً کاف وقاف حذف اولئہ رق یرلرینہ ہای رسمیه
 کتوریلوب مصدر تخفیف دنیلور . بیومہ ، کورنہ ، شمارمہ کبی
 مصدر تأکید و تخفیف دخی جملنمز لر . فقط مجرد و مفعول بہ
 و مفعول الیہ اولدقلری کبی مضاف الیہ دخی اولور لر . نتہ کہ :
 انسانک بوش کزمکلكی و بیہودہ طولاشمقلنی فناشیدر . بوش
 کزمکلكک فائدہ سی یوق . اوقومقلغک فائدہ سی چوق .
 دنیلور و بومقامارده مصدر تخفیف دھا زیادہ قوللانیلور
 و کزئمہ سی ، طولاشمہ سی و کزئمہ نک طولاشمہ نک دنیلور . فقط
 مصدر تخفیف بویلہ براتہ متصل اولدقدہ اکثریا ہای رسمیه سی
 حذف اولئہ رق کزمسی ، طولاشمسی ، کزمنک ، طولاشمنک ،
 صورتندہ یازیلور .

قدمای کتابک بعضیلری مخاطب و متکلمک مفردلرنہ ہای
 رسمیه بی الفہ تبدیل ایلہ مثلاً : کسمہک ، قیرمہک ، لفظلرینی کسماک ،
 قیرماک ، صورتندہ یازمشلردر .

اضافت بچشدہ بیان اولندیفی اوزرہ غائب صورتندہ ضمیر
 اضافی (لر) ایلہ جملنمز . والاجملنن ضمیرمیدر؟ یوقسہ لاحق
 اولدیفی اسممیدر؟ بیلنمز . اما مصدرلرک جچی اولمیدیغدن مصدر
 تأکید و تخفیف بہ لاحق اولان ضمیر اضافی غائبک (لر) ایلہ

جملنمسی جائز اولور وانلرك كزمكنرى ، كزملرى دنيلور .
مصدرلرك مجهولارى هر حكمده معلوملى كيدر . شو
قدركه معلوملى فاعلرينه ومجهوللى مفعوللرينه مضاف اولور .
مثلا : فلانك يازمى وبوايشك بيلنمى دنيلور .

بعضاً مصدر تا كيدىنك منفيسنده قاف وكاف زايه قلب
اولندرق نفس الامرده اوليان فعلى اظهار ايتكم معناسنى مفيد
اولور . نتهكه : كورمزل ك ايتدى . ايشتمه مزل كدن كلدى .
طانيما مزل كدن كلدى .

اورمق مادهسى دخى بعضاً بومقامده قوللانيلور . نتهكه :
خسته لكه اوردى . دليلكه اوردى . دنيلور . عربجه (تفاعل)
صيغهسى قوللانيلور . نتهكه : ايشتمه مزل كدن كلمك معناسنه [تصامم]
وخسته لكه اورمق معناسنه [تعارض] قوللانياور . تفاعل و تسامح
دخى بوقبيلدندر .

حاصل مصبر . — ماده اصليه برشين ساكنه الحاق اواندقده
حاصل مصدر اولوب معنای مصدرينك حاصل اولان حالت
خارجيه دلالت ايلر . وشينك ماقبل ساكن ايسه حرکه انور
وبو حرکه اوست طرفنده كى حرفك حرکه سنه تابعدر . انك حرکهسى
ياقتمه يا كسره ايسه بو حرکه كسره اولور . بعضاً كسره يه علامت
اوله رق يا يازيلور واكر آنك حرکهسى ضمه ايسه بو حرکه ضمه
مقبوضه اولور .

آلش (الیش) ویرش (ویریش) وکورش ، سوزش ،
قویش ، طورش کبی .

اگر شینک ماقبلی متحرک ایسه بر یا زیاده قلنور و ماقبلنک
حرکه سی فتحه یا کسره ایله واکر مضموم ایسه ضمه مقبوضه ایله
تلفظ اولور . اسنهیش ، آرایش ، اریش ، چورویش ، او قویش ،
کبی . مجهولردن دخی حاصل مصدر کلور . کیلیلش ، قیریلش ،
آرانش ، او قونش کبی .

حاصل مصدر سائر اسملر کبی (لر) ایله جعلنور . کلش لر ،
کیدشار کبی . مضاف و مضاف الیه و مفعول به و مفعول الیه
اولور . فقط مصدر تأکید و تخفیف کبی معلومی فاعله و مجهولی
مفعوله مضاف اولور . نته که : فلانک او قویشی ، یازینک
او قونشی دنیلور . بعضاً فعل معلوملرده شین یرینه میم کلور
و حاصل مصدرک مجهولی مقامنه قائم اولور . نته که آلان ،
صاتان یوق . مقامنده آلش صاتش یوق . دنیلدیکی کبی . آلنان ،
صاتلان یوق . مقامنده دخی آلیم صاتیم یوق دنیلور که آلنش ،
صاتنش یوق دیک اولور .

کذلک بومالک سورومی یوق . بوخسته نك باقی فنا . دنیله کده
سورولشی و باقلشی دیک اولور . بعضاً میم ماقبلنده کی حرف
املا حذف ایله آلم صاتم صورتنده یازیلور .
بوصیغه میمه بعضاً (مره) یعنی کره معناسنی مشعر اولور .

واولنه اسم عدد کتوریلور . وبوحالده اکثریا معنای مصدرینک متعلقنه اسم اولور . نته که بر ایچیم صو ، ایکی دیلیم امک ، طقوز بوغم قارغی دنیلور . سویم ، آن وجاذبه معناسنده عرف اولمشدر . نته که : سویلی دنیلور . طوتوم دخی طور و معامله معناسنده عرف اولوب بناء مره مقامنده شاذ اوله رق طوتام ، کلور وبر طوتام اوت دنیلور .

(آتمق) دن برقاعده آتیم کلدیکی کبی . آتمغه مخصوص اوله رق آدیم دنیلور .

باب ثانیده بیان اولندیغی اوزره صفتلره (لك) یاخود (لق) الحاق اولندقدده بر نوع مصدر اولور . فقط مصدر اصلی اولیوب بلکه اسم مصدر قیلندن اولور .

اسم مصدر ادات مصدریتدن عاری اوله رق معنای مصدری بی افاده ایلیان اسملردر . یاردیم ، سوکی ، صایغی کبی . بونلر هپ سماعیدر .

فصل ثانیده بیان اولندیغی اوزره اصواتدن دال مفتوحه الحاقیله یاپیلان فعللرده دال مکسور قیلندقدده اسم مصدر قیلندن اولور . چاتردی ، کورولدی ، ایکلیدی کبی بر فعـلك ماده اصلیه سنه (ندی) لفظی علاوه اولندقدده مبالغه معناسنی مفید اولور . آقندی ، صیقندی ، بولاندی کبی . وبوصیغه بعضاً فعلك متعلق اولان شیئك اسمی اولور . چیقندی . صیزندی .

بولندی . دوکندی . سپورندی کبی . شاذ اوله رق (بیورلدی)
لام ایله کلشردر .

فارسینک اصل مصدرلری لسان عثمانیده مستعمل دکلدر .
اما اصل مصدرلری استعمال اولنور قاعده سی دخی ترکیه ده
اولدینی کبی امر حاضره شین ساکنه علاوه ایتمکدن عبارتدر
دانش ، نمایش کبی .

فارسینک اسم مصدرلری دخی لسان عثمانیده استعمال اولنور
لکن سماعیدر . ناز و نیاز و خرام و رقنار کبی .

لسان عربیده مصدر و حاصل مصدر و اسم مصدر صیغه لری
و معلوم و مجهوللری هپ بردر .

بونلر لسانمزدده اکثریا اسم مصدر مقامنده قوللانیلور .
افاده اتمک . لطف ایلک . تلطیف قیلک . احسان بیورمق کبی
وبعضاً حاصل مصدر مقامنده استعمال اولنورلر . نته که :
خواجه نك شوافاده سنه باق . ترکیبنده اولان افاده کبی و بعضاً
اصل مصدر مقامنده قوللانیلور . نته که : بو حالی افاده ممکن
دکلدر دنیلدیکی کبی .

عربی مصدرلر قاعده فارسیه اوزرینه بعضاً فاعللرینه مضاف
اولورلر . عون باری . بعضاً مفعوللرینه مضاف اولورلر .
افاده حال . وازاله کدر کبی .

فصل هفاسی

فرع فعل بیانده در.

فعللردن مشتق اولان صفتلر ایکی قسمدر : قسم اول اسم فاعل ایله مفعول، قسم ثانی مبالغه اسم فاعل ایله صفت مشبهه در. کړك اسم فاعل کړك اسم مفعول معنای مصدری ایله متصف اولان شیء دیمکدر . فقط اسم فاعل معلومدن واسم مفعول مجهولدن مشتق اولور و مجهولی اولمیان فعللردن اسم مفعول کلز . ایکسی دخی سائر صفتلر کبی (لر) ایله جعلنور لر .

طریق اشتقاقلری بودر که فعل معلومك ماده اصلیه سنه نون ساکنه الحاق اولندقدده اسم فاعل اولور ونونك ماقبلی ساکن ایسه مفتوح قیلنور و متحرک ایسه بر یاء مفتوحه زیاده قیلنور . آغر حرکه لی اولانلرده قمحه یه علامت اوله رق الف یازیلور . اسم مفعول دخی فعل مجهولدن بعینه بوجهله مشتق اولور .

اسم فاعللك مثاللری :

چکن	ویرن	آلان	یازان
بلله ین	آرایان	آجینان	اوقونان

اسم مفعوللك مثاللری :

چکیلن	ویریلن	آلنان	یازیلان
بلله نن	آرانان	آجینان	اوقونان

بونلرک املالرنده بین الانام چوق اختلاف وارد در . بعضیلر اولان

لفظنی الف ایله یازدیغی حالده جعنی الفسز اوله رق (اولنلر) صورتنده یازارلر . بعضیلری خفیف حرکه لی کلمه لردن بعضیلرینی الف ایله بلله نان ، چکیلان ، ویریلان صورتنده یازارلر . یازیلان کبی کلمه لرده اکثریا لامدن اول بریا یازیله کلدیکی حالده بعضیلر یاسز اوله رق یازلان ، صورتنده یازارلر . آجینان کبی کلمه لرده دخی بعضا حرف املا حذف اولنه رق آجنان صورتنده یازیلور .

اسم فاعلک بر صیغه سی دها واردرکه فاعلک بر فعه لی بر نوع کار وصنعت اتخاذا یلدیکنه دلالت ایلر . قاعده سی بودرکه ماده اصلیه (جی) علاوه اولنور و ماقبلی ساکن ایسه حرکه لنور و متحرک ایسه بریا زده قیلنور : سیلجی ، یازیجی ، باقیمچی ، کوریجی ، آرایجی ، اوقویجی ، کبی

اسم مفعولک دخی دیگر بر صیغه سی واردرکه مجهولک ماده اصلیه سنه (مش) علاوه سیله اولور . یازلمش ، اوقونمش کبی . اسم مفعولک معلومدن مشتق دیگر بر صیغه سی دها واردرکه مصدر تحفه فی صیغه سیدر . نته که یازمه کتاب ، باصمه کتاب دنیلور . بو صیغه مصدر ایله اسم مفعول بیننده مشترکدر ، فقط سماعیدر .

ادات مصدرک یرینه خفیف حرکه لی اولنلرده کاف و آغیر حرکه لی اولنلرده قاف یا خود غین کتوریلهرک اسم آلت صیغه سی یاپیلور . لکن مطرد دکلددر . واستعمالی نادردر . سورکو ، سوزکو ، باصتی ، بورغو ، چالنی کبی .

اشبو اسم آلت صیغه سی اکثریا مفعولک معنای مصدری
ایله موصوف اولان بر نوعنه اسم اولور . سرکی ، اصقی ،
چیزکی ، یایی کبی .

وبعضاً فاعلک بر حال و کیفیتنه اسم اولور . سوکی ، طویغو ،
صایی کبی .

مبالغه اسم فاعل اداتی خفیف حرکه لیلرده (کن) واغری
حرکه لیلرده (غان) لفظلریدرکه ماده اصلیه لاحق اولور لر .
چکشکن ، اوتانغان ، صولوغان کبی . فقط ماده اصلیه نك آخری
تا یا خودشین ایسه غین پرینه قاف کلور . صریتقان ، چالیشقان کبی .
بیلکیچ ، س-وزکچ ، یوزکچ ، طالعیچ دخی جیم ایله کلمشدر .
(اوشمک) دن بر قاعده اوشنکن کلدیکی کبی اوشنکچ دخی
کلور . کذلک (اوتانق) دن هم اوتانغان ، هم ده اوتانجاج کلور .

صفت مشبهه صیغه لری ایکی صنفدر . صنف اول ادات
مصدرک مینی حذف ایله حاصل اولور . تترك (تترهك) بویاق ،
چوروك کبی . فقط ماده اصلیه نك آخری ساکن اولدینی صورتده
حرکه لنور . سیلیک ، آچیق کبی . طراق دخی اسم آلت
اولدینی حالده شاذ اوله رق بوصیغه اوزره کلمشدر . اولچک دخی
بو قیلدندر . صنف ثانی بودرکه ماده اصلیه خفیف حرکه لی ایسه
کاف ایله و آغیر حرکه لی ایسه غین ایله نون الحاق اولنور :
پیشکین ، طالعین ، دوشکین کبی .

مبالغه اسم فاعله اولديني کي بونلرده دخي ماده اصلينه
آخري تا يا خود شين ايسه غين يرينه قاف کلور . چاتقین
طاشقین ، طوتقین ، جوشقون کي .

کسکین مبالغه اسم فاعل اولديني حالدہ شاذ اوله رق بوسیغه
اوزره کلشدر .

صفت مشبهلر فعل لازم دن مشتق اولور ايسه فاعلك وصفی
اولوب اسم فاعله بکزر واکر فعل متعدیدن مشتق اولور ايسه
مفعولک وصفی اولوب اسم مفعوله بکزر . فقط اسم فاعل واسم
مفعول قیاسیدر . هر ماده دن تصریف اولنورلر ، بونلر ايسه سماعیدر
واسم فاعل واسم مفعول حدوثه و بونلر ثبوتہ دلالت ایدرلر . مثلاً
دون فلان یرده اورکن حیوان وقیریلان عربہ دینلده اورکن ،
اسم فاعل وقیریلان اسم مفعول اولوب بروقت معینده اورکک
وقیرلوق فعللرینک حدوث و وقوعنه دلالت ایدرلر .

اما اورکک حیوان قیریق عربہ . دینلده اورککک
حیوانده وقیریلوق عربده برر صفت ثابتہ و مستمره اولديني
مستفاد اولور .

فأمره — فارسینک اسم فاعللری خواننده و سازنده واسم
مفعوللری کفته و بسته صیغه لری اوزره کلور . بونلر بعضاً لسان
عثمانیده استعمال اولنورلر .

بعضاً فارسی امر حاضرلرک آخرینه الف و نون علاوه سیله
صفت مشبه اولور : کویان ، تابان ، خندان ، نالان کي .

قاعدہ — ہر کلمہ نیک آخرینہ ادوات دن بر حرف ساکن الحاق
اولند قد کلمہ نیک آخری ساکن ایسہ ماقبلندہ کی حرکت نیک نوعنہ کورہ
حرکتہ نور . شویله کہ : ماقبلندہ کی حرکت کسرہ یا خود فتحہ ایسہ
آخر کلمہ مکسور قلنور . اگر ضمہ ایسہ کرک مبسوط اولسون
و کرک مقبوض اولسون کلمہ نیک آخری ضمہ مقبوضہ ایلہ
حرکتہ نور . کیدش ، کلش ، دیلم ، صاتم ، سیلیک ، چیق ،
دلیک ، آچیق ، دوشوک ، بوفوق ، یولوق ، صولوق کہی .
(دونک) دن دونک ، (اورکک) دن اورکک شاذ در .

کلمہ نیک آخرینہ لاحق اولان حرف متحرک حرکتہ سی دخی
بوقاعدہ تابعدر . شویله کہ : آخر کلمہ نیک حرکتہ سی کسرہ یاقمہ
ایسہ بو حرف لاحق مکسور قلنور و آنک حرکتہ سی ضمہ ایسہ
بہمہ حال ضمہ مقبوضہ اولہ جفندن بونک حرکتہ سی دخی ضمہ
مقبوضہ اولور . اریش ، استیش ، چوروش ، صولوش کہی .
اگر کلمہ نیک آخری ساکن ایسہ ماقبلندہ کی حرکتہ
اعتبار اولور . پیشکین ، قیزغین ، اشکین ، طاغین ، دوشکون ،
بورغین ، طورغین کہی .

ادات نسبت اولان لامک حرکتہ سی دخی بوقاعدہ لہ تابعدر .
سلوریل ، ادرنہ لی ، سویلی ، زوراو کہی .

بوقاعدہ لہ سائر فصول و ابوابدہ دخی جاری اولدیفندن
اشاعیلرہ تطبیقاتی اجرا اولنق اوزرہ کوزلجہ حفظ اولنملیدر .

افعالك تصريفى حقنده در .

بالاده اشعار اولندينى اوزره لسان تركيده فعللرك ماده
اصليه سى امر حاضر در . بر صاغى كاف علاوه اولندقدده جمع
اولور . فقط آخرى ساكن ايسه حركه لنور . متحرك ايسه
بريا زياده قيلنور . مثاللى ايسته بونلردر :

كل	ياز	ايسته	آرا	قاشى	اوقو
كلك	يازك	ايسته يك	آرايك	قاشيك	اوقوبك

امر حاضر ك جعنه اكثر يا تعظيم ايچون بروجده آتى بر ز
زياده قلنور وكاف حركه لنور .

كليگز ، يازيگز ، ايسته يگز ، آرايگز ، قاشيگز ، اوقوبگز .
بعضاً امر حاضر ك جعنه (دى) علاوه اولندرق رجا مقامنده
قوللانيلور . كليگدى ، يازيگدى كى .

امر حاضره ميم نافية الحاق اولندقدده نهى حاضر اولور .
مثاللى بونلردر :

نهى ماضرك مفردى :

كله	يازمه	ايسته مه	آرامه	قاشيمه	اوقومه .
-----	-------	----------	-------	--------	----------

نهى ماضرك جمعى :

كليك	يازميك	ايسته ميك	آراميك	قاشيميك	اوقوميك
------	--------	-----------	--------	---------	---------

دبلر جمعى :

كليكنز	يازميكنز	ايسته ميكنز	آراميكنز	قاشيميكنز	اوقوميكنز
--------	----------	-------------	----------	-----------	-----------

مادهٔ اصلیه (سون) الحاق اولندقدہ ، امر غائب مفرد
اولور . مثاللری بونلردر :

کلسون ، یازسون ، ایسته سون ، آراسون ، قاشیسون ، اوقوسون .
ایشته بونلرک آخرینه (لر) الحاق اولندقدہ جمع و (سون)
لفظنک اولنه میم نافیه کتورلدکده نهی غائب اولورلر . کلسون
و کلسونلر کبی .

امردن متکلم صیغه سی کلز اما سائر فعللری هپ اوچ صنفدر .
یعنی غائب ، مخاطب و متکلمدر . فعل التزامینک متکلم صیغه لری
امر متکلم یرینه کچر .

فعل التزامی

فعل التزامی معنای مصدرینک وقوعی متکلمک ملتزم و مطلوبی
اولدیغنه دلالت ایلان بر صیغه درکه مادهٔ اصلیه نک آخری ساکن
ایسه مفتوح قلنوب و متحرک ایسه بریا زیاده ایدیلوب برده های
رسمیه الحاق اولندقدہ مفرد غائب حاصل اولور و (لر) علاوه سیله
جملنور . دیگر صیغه لری دخی ضمیر نسبی ایله تصریف اولنور .
مثاللری بونلردر :

غائب مخاطب متکلم

آخری ساکن اولنلرک مثاللری :

یازه	یازه سین	یازه یم	مفرد
یازه لر	یازه سکن	یازه یم	جمع

آخرى متحرك اولانلرك مثاللىرى:

اوقويه	اوقويه سين	اوقويه يم	مفرد
اوقويه لر	اوقويه سكرز	اوقويه لم	جمع

اشبو فعل التزامينك مفرد غاچى نادراً صفت مقامنده قوللانىلور . صابه بول كچى .

وچوق دفعه دعا مقامنده ايراد اولنور . الله موفق ايليه كچى و آخرينه (سى) علاوه اولندقدده فعلك لازم الاجرا اولديغنى مابين صفت اولور . نته كيم : ويره سى يه آلم ، دىنلور كه صكره و برلمسى لازم كلان پاره مقابلنده آلم ديمك اولور . كذلك بانه سى يه بر كيدش . دىنلور كه باتمغه بادی اوله جق بر يوله كيدش ديمك اولور . بعضاً بد دعا مقامنده قوللانىلور . آصيله سى حريف كچى كه لازم الصلب ديمكدر . كور اوله سى ، آدى بانه سى ، دخى بوقيلدنذر .

حال تركيبى صيغه سى . — فعل التزامينك مفرد غائبنه (رك) يا خود (رق) الحاق اولندقدده حال تركيبى اولور كه اجراى فعل عندنده فاعلك بولنديغنى حالى مابين بر صفت اولور . سويلنهرك كيتدى . اوقويه رق كلدى كچى .

بعضاً حال تركيبى تكرر اولنور اول حالده بو ادا تلردن عارى اوله رق ايراد اولنور . نته كيم : دوشه قالقه كلدى دىنلور كه دوشدرك ، قالقه رق ديمكدر .

فعل مضمر . — فعل وجوبى برايشى ايشلك ايچون فاعله لزوم كوسترن بر صيغه دركه ادات مصدر ك كافى يا خود كافى (لى) حرفنه

تبدیل اولندقدہ بوفعلک مفرد غائی حاصل اولور. سومی؛ کبی که سومک کرک دیمکدر و (لر) ایله جهلنور و بعضا تأکید ایچون (در) علاوه اولنور. سوملیدر، سوملیدر لر کبی. مخاطب متکلمری دخی بروجہ آتی ضمیر نسبی ایله تصریف اولنور :

سومی	سوملیسک	سوملم	مفرد
سوملیر	سوملیسکز	سوملیز	جمع

تغیہ . — فعللر اوچ زماندن برینہ دلالت ایلر که ماضی ، حال واستقبال یعنی کچمش ، شمدیکی وکله جک زمانلر دیمکدر .

امر وفعل التزامی وفعل وجوبی صیغہ لری هپ استقبال ایچوندرد. زیرا کچمش ایچون امر والتزام وارائه ، لزوم، عبدر. کچمش ایچون انجق تأسف اولنہ بیلور. نتہ که : « انسان، کچمشنه متأسف ، حالندن ناخشنود وکله جکه مترقب بر حیواندر . » دیوتعریف اولنور . وطلب اولسان شی زمان تکلمدن صکره اجرا اولنہ بیلہ جکندن حال دخی اوله من . اوچ زماندن برنده بوفعلک وقوعی خبر ویریلور . بونک اوچ صیغہ سی واردر که فعل ماضی ، حال واستقبال صیغہ لیدر .

فعل ماضی . — لسان عثمانیده ماضی ایکی قسمدر : بری ماضی شهودی ودیکری ماضی نقلیدر .

ماضی شهودی متکلمک رأی العین کوردیکی خبر ویرن صیغہ در. اصول تصریفی بوجہله در که ماده اصلیه (دی) علاوه

اولندقدە ماضی^۱ شهودینک مفرد غائبی حاصل اولورو (لر) ایله
جملنور . مخاطب و متکلملری دخی بروجہ آتی ضمیر فعلی
علاوہ سیلہ تصریف اولنور :

ماضی^۱ شهودی

خفیف حرکتی اولانلرک مثالی :

مفرد	سودیم	سودیک	سودی
جمع	سودیک	سودیکز	سودیلر

آغیر حرکتی اولانلرک مثالی :

مفرد	یازدیم	یازدیک	یازدی
جمع	یازدق	یازدیکز	یازدیلر

میم ایله کاف یا قافک حرکتی لندیکی صورتده علامت کسره
اولانیا اکثریا حذف اولنهرق سودک ، سودم ، سودک ویازدک
یازدم ، یازدق صورتده یازیلور .

ماضی نفی . — ماضی^۱ نقلی متکلمک سماع ایله بیایدیکی
بیان ایله یکی صیغه درکه ماده اصلیه (مش) علاوہ سیلہ اولور
و (لر) ایله جملنور و بعضاً تأکید ایچون بونلره (در) علاوہ
اولنور . مخاطب و متکلملری دخی بروجہ آتی ضمیر نسبی ایله
تصریف اولنور : بونک خفیف و اغیر حرکتی لسی متساویدر .

مفرد	سومشم	سومشین	سومش
جمع	سومشن	سومشکنز	سومشلر

اشبو ماضیٰ نقلی صیغہ سنک مجهولی اسم مفعول صیغہ سہیلہ
محددر .

مثلاً سولش صیغہ سی ماضیٰ نقلینک مجهولی ایله اسم مفعول
پہنندہ مشترکدر . ایجابنہ کورہ قوللانیلور . ماضیلرک مجهولاری
ومنغیلری دخی معلوم ومبتلرینہ قیاس ایله تصریف اولنور .
وبعضاً نفی بی تأکید ایچون ماضیٰ منفینک اولنہ (هیچ) کتوریلور .
مثلاً هیچ صورمدی . هیچ صورممش دنیلور .

مال . — زمان حالده بر فعلک وقوعنی بیان ایچون ماده اصلیه
(یور) لفظی علاوه اولنور وماده اصلیه تک آخری ساکن ایسه
حرکه لنور وهای رسمیه یازیلور وزمان حال صیغہ سنک مفرد
غای اولور و (لر) ایله جملنور . مخاطب ومتکلملری دخی
بروجه آتی نغیر نسبی ایله تصریف اولنور :

سوه یور	سوه یور سین	سوه یورم	مفرد
سوه یور لر	سوه یور سکز	سوه یورز	جمع

اکثریا بونلرک های رسمیه سی حذف ایله سویور، یازیور
صورتندہ یازیور .

نفی حال

سومور	سوه یور سین	سومورم	مفرد
سومور لر	سومور سکز	سومورز	جمع

استقبال . — صیغه استقبال قاعده سی بودر که فعل التزامینک مفرد غائبه (جک) یا خود (جق) علاوه اولند قدّه فعل استقبال مفرد غائبی اولور و (لر) ایله جملنور و بعضاً تأکید ایچون (در) علاوه اولور. سائر صیغه لر دخی بروجّه آتی ضمیر نسبی ایله تصریف اولور :

ضعیف حرکتی اولانلرک مثاللری :

مفرد	سوه جکم	سوه جکسین	سوه جک
جمع	سوه جکنز	سوه جکسکنز	سوه جکلر

آغیر حرکتی اولانلرک مثاللری :

مفرد	یازه جغم	یازه جقسین	یازه جق
جمع	یازه جغز	یازه جقسکنز	یازه جقلر

نقی استقبال

ضعیف حرکتی اولانلرک مثاللری :

مفرد	سومیه جکم	سومیه جکسین	سومیه جک
جمع	سومیه جکنز	سومیه جکسکنز	سومیه جکلر

آغیر حرکتی اولانلرک مثاللری :

مفرد	یازمیه جغم	یازمیه جقسین	یازمیه جق
جمع	یازمیه جغز	یازمیه جقسکنز	یازمیه جقلر

مضارع . — لسان عثمانیده حال و استقبال صیغه ایدن بشقه برده

مضارع صیغه سی وارد که زمان حال ایله زمان استقباله شامل اولان معنای عمومی به دلالت ایلر . بعضاً دوام واستمرار معناسی اشعار ایدر . صوت تصریفی بوجمله درکه ماده اصلیه راء ساکنه علاوه اولندقدہ مضارعک مفرد غائبی اولور و (لر) علاوه سیله چملنور و سائر صیغه لری بوجه آتی ضمیر نسبی ایله تصریف اولنور .
 اوقور ، اوقور سین ، اوقورم ، اوقور لر ، اوقور سکنز ، اوقور ز .
 آخری متحرک اولانلرک مضارع لری هپ بوجمله تصریف اولنور ، اما آخری ساکن ایسه حرکه لنور . بو حرکه نک انواعی ایسه مختلفدر . شویله که ثنائیلرده بو حرکه هپ قتمه در . سور ، یازار کبی . فقط اورور ، بولور ، کورور ، ویریر ، آلور (آلیر) بیلور ، (بیلیر) ، سانور (سانیر) قالور (قالیر) کلور (کلیر) شاذ در .
 ثلاثیلرده اگر اوج حرفک حرکه سی بر ایسه مضارعنده اوچنجی حرفی بر قاعده مفتوح قیلنور . اولچر ، اورکر کبی .
 اگر ایکنجی حرفی متحرک ایسه اوچنجی حرفک حرکه سی اکا تابعدر . اگر آنک حرکه سی ضمه ایسه اوچنجی حرفی ضمه مقبوضه ایله تلفظ اولنور . اوکورور ، اوتورور ، بیورور کبی .
 فقط ضمه مقبوضه علامتی اولان (واو) اکثریا تخفیف ایچون حذف ایله اوکورور ، اوتورور ، بیورر صورتنده یازیلور .
 اگر ایکنجی حرفک حرکه سی کسره یا قتمه ایسه اوچنجی حرفی کسره ایله تلفظ اولنور . ایشیدیر ، ایصیریر ، چویریر ، اغاریر ، اوصانیر کبی .

بونلرک یالری دخی اکثریا حذف اولنه رق ایشیدر ،
صورتنده یازیلورلر .

رباعیلرک و خاسیلرک مضارعلرنده دخی بوقاعده یه توفیقاً
حرف اخیرلری ماقبلنک حرکه سنه کوره حرکه لنور: اوکسورور
(اوکسورر) قورتلور ، ایرکلیر ، قصقانیر ، طاورانیر ، قوللانیر ،
ایمزغانیر کبی .

بو اختلافلر مضارع مثبتده در . اما منفیلرنده مطرداً (منز)
علاوه سیله مفرد غائب اولور . سومز ، یازمز ، او قومز کبی و آغیر
حرکه لی اولانلر اکثریا الب ایله یازماز ، او قوماز صورتنده
یازیلورلر و منفیلرک دخی مفرد عائی (لر) ایله جملنور . دیگر
صیغه لر دخی ضمیر نسبی ایله تصریف اولنور . فقط اکثریا تخفیف
ایچون (زا) حرفی متکلمک مفردنده حذف و جمعنده یایه قلب
اولر . مثلاً: یازمزم ، یرنده یازمزم ، او قومزمز ، یرنده او قومیزدنیلور .

مضارع منفیلک مثالی :

سومز ، سومزسین ، سومز ، سومزلر ، سومزسکمز ، سومیز
بعضاً مستقبل کبی مستقبل معنانه اولان مضارعک اولنه
تأکید ایچون (البته) لفظی کتیریلور . والبته یاپه جقدر . البته
یاپه میه جقدر . والبته یاپار . البته یاپماز کبی .

فامه . — ماضی شهودینک جمع متکلم صیغه سی بعضاً اسم فاعل واسم مفعول مقامنده قولانیلور .

نته کیم : انی بیلدک کیسه واری ، وحقنده سویلندک سوز قالدیمی ؟ دنیلورکه بیلین و سویلین دیمکدر .

ماضی نقلی و مستقبل و مضارعک مفرد غائبی بعضاً صفت مقامنده استعمال اولنورلر . کچمش زمان ، کله جک سنه ، یانار طاغ کبی . بعضاً موصوفلری محذوف صفتلر کبی استعمال اولنورلر . مثلاً : بروسه یه کیده جک واری ؟ دینور .

صیغه ربطیه . — رابطه صیغه لری ، مضمونلری دیگر جله نک مضموننه مربوط اولان صیغه لدر ، بونلر بش نوعدر .

نوع اول صیغه عطفیه درکه ماده اصلیه به باء ساکنه واندن اول واو املا علاوه سیله حاعل اولوب ایکی فعلی صیغه لرینک اداتلر تکرر اتمیه رک بربرینه ربط ایله کلامه حسن ویرمک ایچون استعمال اولنور و بوضیغه عطفیه ده مابعدنده کی صیغه نک نوعنه تابعدر . اونه نوعندن ایسه بودخی اول نوعدن اعتبار اولنور و مابعدی فعل اولدیغی تقدیرده قننی زمانه دلالت ایلر ایسه انده دخی اول زمان اعتبار اولنور .

مثلاً : کلوب کیتدی . دینلدکه کلدی کیتدی دیمک اولوب بوراده ماضی شهودی قسمندن اولور . کلوب کیدر دینلدکه

كلوركيدر معناسنه اولمغله كلوب مضارع اولور. وكلوب كیده جك دینلدكده ، كله جك وكیده جك ديمك اولهرق كلوب ، بوراده فعل مستقبل اولور .

نوع ثانی صیغه توقيه دركه ماضی شهودینك متكلم مع الغير صیغه سنه (جه) علاوه سیله اولور وبرجه شرطیه اولهرق مضمونی هر نه وقت واقع اولور ایسه مضمون جزانك بهمه حال واقع اوله جفنی افاده ایدر . نته کیم : سن بویه درسه دوام ایتدجکه علومده ترقی ایدرسین . وحسن اخلاقك اولدجقه هر ایشده موفق اولورسین دینلور .

بعضاً بومقامده (مادامکه) جله عربیه سی استعمال اولنور نته کیم : مادامکه نیتکز مخالص اوله ، یاخود خالصدر . موفق اولورسکز ديمك اولور .

(چه) یرینه (ده) کلدکده علی الاطلاق وقت معناسنی افاده ایدر . سودکده ویازدقده . کبی که سودیکی وقت ویازدینی وقت ديمك اولور..

نوع ثالث صیغه تعقیبه دركه مضموتی مابعدنده کی فعلك تعقیب ایلسنه دلالت ایلر . قاعده سی بودرکه ماده اصلیه نك آخری مكسور قیلنوب كسریه علامت اولهزق یاعلاوه وخفیف حرکه لی ایسه (جك) و آغیر حرکه لی ایسه (جق) الحاق اولنور . كلیمك ، اولیمق کبی بوصیغه پك آز قولالانیلور .

نوع رابع صیغهٔ انتہائیہ درکہ بر فعلک نہایت بولدیغنه
دلات ایلر . قاعده سی بودرکہ مادهٔ اصلیه نك آخری ساکن
ایسه مکسور قیلنوب و متحرک ایسه بر یا زیاده ایدیلوب بعده
(نجه) لفظی الحاق اولنور . کلنجه ، یازنجه ، او قونجه کبی .
اکثریا بوکا ادات انتہا اولان (یهدک) یاخود (یه قدر)
لفظلری علاوه اولنور . کلنجیه دک ، یازنجه یه قدر کبی .

بعضاً بوصیغهٔ انتہائیہ ، صیغهٔ تعقیدیه معناسنده قوللانیلور .
نته کیم : افندی سوزه باشالاینجه هرکس لاقردی بی کسدی .
وسن بویله دینجه بزه دیه جک برسوز قالماز . وبن کلنجه او
قالقوب کیتدی دینلیدیکی کبی .

نوع خامس صیغهٔ ابتدائیہ درکہ فعل التزامینک مفرد غائبه
(لی) علاوه سیله اولوب فعلک ابتدای وقوعندن متکلمک زمان
تکلمنده دک دیکر بر فعلک علی الدوام واقع اولدیغنی افاده ایلر .
نته کیم : درسه باشالیه لی برکون فوت ایلدم دینلیدیکی کبی .
بعضاً بونک آخرینه (برو) علاوه اولنور . باشالیه لی برو
کبی و بعضاً برده (دن) علاوه قلنور باشالیه لیدنبرو کبی .

افعال مرکبه . — مادهٔ اصلیه نك آخری ساکن ایسه مکسور
قیلنوب و متحرک ایسه بر یا زیاده ایدیلوب بعده ویرمک
ماده سیله ترکیب اولندقدہ فعل تجیل اولور و فعلک سرعت
اجراسنی افاده ایلر . بوصیغه ویرمک ماده سنک تصریحیه سائر

فعللر کبی تصریف اولنور . یازیویرمش ، یازیویره جک وهکذا
تصریف اولنور .

فعل التزامینک مفرد غائی بیلک ماده سیله ترکیب ایدلده
فعل اقتداری اولور . یازد بیلک ، سویلیه بیلک ، کبی که یازمه،
سویلیکه مقتدر اولمق دیمک اولور بودخی بیلک ماده سنک
تصریفیه سائر فعللر کبی سویلیه بیلدی ، سویلیه بیلور ، سویلیه
بیله جک دیو تصریف اولنور .

فقط منفیلرنده تحفیف ایچون ماده اصلیه یعنی (بیل)
لفظی حذف وادات نفی ایله اکتفا اولنور. کیده مک ، سویلیه مک
یازمه مامق ، اوقویه مامق کبی .

بعضاً فعل التزامینک مفرد غائی یازمق ماده سیله ترکیب
ایتدکده افعال مقاربه صیغه لری حاصل اولور که معنای فعلینک
قوه قریبه یه کلدیکنی افاده ایلر. نته کیم: دوشه یازدی. دینلور که
آز قالدی دوشه دیمکدر . لسان عثمانیده بونک یالکز ماضی
صیغه لری استعمال اولنور . تصریفی بوجهله در .

فعل مقاربه نک ماضی* شهودیسی

دوشه یازدم	دوشه یازدک	دوشه یازدی
دوشه یازدق	دوشه یازدیکز	دوشه یازدیلر

فعل مقاربه نك ماضی ء نقلیسی

دوشه یازمشم	دوشه یازمشین	دوشه یازمش
دوشه یازمشز	درشه یازمشکز	دوشه یازمشلر

ینه فعل التزامینك مفرد غائبی ، كورمك ماده سیله ترکیب اولندقدہ فاعلك اول فعلده دوام واستمرارینی مفید اولور . ایدہ کوردی ، ایدہ کور کبی . کلمك ماده سیله ترکیب اولندقدہ فاعلك زمان ماضیدن حین تکلمه قدر استمرارینی مشعر اولور . اوله کلمش ، سویلندکلمش کبی . کیتك ماده سیله ترکیب اولندقدہ فاعلك زمان مستقبلده استمرارینی مفید اولور . یاپه کیتسون کبی . اکثریا بومقامده طور مق ماده سی استعمال اولنور . یاپه طورسون کبی . قالمق ماده سیله ترکیب اولندقدہ استمرار معناسی مفید اولور طونده قالدی و باقیه قالدی کبی . و (حقیقه) لفظی کلمك ماده سیله ترکیب اولندقدہ مفاجئه معناسی مفید اولور . چیتمه کلدی کبی که ، آنسزین یعنی وقتسز ، بردن بره کلدی دیمکدر .

ماضی ء نقلی و مستقبل و مضارعك مفرد غائبری (اولوق) لفظیله ترکیب اولندقلرنده زمانی متضمن مصدر اولور . ایتمش اولوق ، ایدہ جك اولوق ، ایدر اولوق کبی بونلر اولوق مصدرینك تصریفیله سائر فعللر کبی تصریف اولنورلر .

فعل اعانه . — ایدی ، فعل اعانه اولوب ماضی ء نقلیسی ایش

وصیفه شرطیه سی ، ایسه ، در . دیگر صیفه لری یوقدر . کیفیت
تصرفلری بوجه آتی بیان اولنور .

ماضی شهودی

ایدی ایدک ایدم ایدیلر ایدیکر ایدک

ماضی نقلی

ایمش ایمشین ایمشم ایمشلر ایمشکر ایمشز

صیفه شرطیه

ایسه ایسهک ایسهم ایسهلر ایسهکر ایسهک

مفرد مخاطبه و متکلملرنده بعضاً های رسمیه حذف ایله ،

ایسهک ، ایسمم ، ایسهک صورتنده یازیلورلر .

اشبو اعانه فعللری بعضاً جمله اسمیهک جزء اخیرینه یعنی خبره

لاحق اولور . ماضی شهودیه جمله اسمیهک مضهوتی

مشاهده طریقیه حکایه دلات ایلر . بنم صاحبم کنج ایکن

قومرال ایدی ، قاره دکل ایدی دینلدیکی کبی . ماضی نقلیه

مضمون جمله ی سماع طریقیه نقل وروایته دلات ایلر . فلانک

قیزی الاکوزلی ایمش ، قاره کوزلی دکل ایمش دینلدیکی کبی .

صیفه شرطیه دخی لاحق اولدینی جمله ی دیگر بر جمله یه

شرطقیلار . شرط بر جمله یه دیگر جمله ی ربط وتعلیق اتمکدرکه

اولکیسنه جمله شرطیه وایکنجیسنه جمله جزایه دینور . نتهکه :

« اوزی بوزوق ایسه سوزی چور وکدر . » و « اوزی صاف

دکل ایسه سوزی موئوق دکلدر . « دینلور . كذلك » عقلی واریسه اکاکفیل اولماز » و « ایشی یوق ایسه بشقهسنه وکیل اوسون . « دینلور .

بعضاً صیغه شرطیه نك الفی حذف ایله تحفیف اولنور . مثلاً : وارسه، یوقسه دینلور . بعضاً یوقسه لفظی . اوله اولسه مقامنده قوللانیلور . و عربجه نك (والا) لفظی مقامنه قائم اولور . مثلاً : « خواجه افندینك غیرتی چوقدر . یوقسه مکتبیز بومرتبه ترقی ایتمز ایدی » و « سن اول طوراندك یوقسه بن سکا کیده جک ایدم . « دینلور . و بعضاً صیغه شرطیه حال مقامنده بولنهرق مضمون شرطك عدم وقوعی تقدیرنده جزانك وقوعی اولویته اولدیغنی افاده ایدر . و بوضورتده آخینه (دخی) یاخود (ده) الحاق اولنور . مثلاً « قصورایتدمسهده التفاتکزی دریغ ایتمیکز . « دینلور که قصورك عدم وقوعی تقدیرنده التفاتك دریغ ایدلمیه جکی اولویته اولدیغنی اکلاشیلور . قصورایتدمسهده جمله سی قصور ایتدیکم حالده بیله دیمك اولوب حال ترکیبی مقامنده بولندیغندن بومثالو شرطره شرط حالی دینلور . بعضاً (دخی) و (ده) یرینه (بیله) کتوریلور . مثلاً : قصور ایتدم بیله و قصورم اولسه بیله دینلور .

بالاده مذکور اولان افعال بسیطه صیغهلری اشبوعانه فعللریله ترکیب اولندقدمه مرکب صیغهلر پیدا اولور . شویله که : فعل اعانه نك

ماضیؑ شہود سیلہ ترکیب اولندقدہ افعال حکایہ صیغہ لری و ماضیؑ نقلیسیلہ ترکیب اولندقدہ افعال روایت صیغہ لری و صیغہ شرطیہ ایلہ ترکیب اولندقدہ افعال شرطیہ حاصل اولور .

افعال حکایہ معنای فعلی بی مشاہدہ طریقیلہ حکایہ یہ و افعال روایت سماع طریقیلہ نقل و روایتہ دلالت ایدرہ . و افعال شرطیہ متضمن اولدینی معنای شرطیہ یہ دیگر برجہ بی ربط و تعلیق ایلر . کیفیت تصریف لری بروجہ آتی بیان اولور :

فعل اعانہ ایلہ مرکب صیغہ لری

حکایہ فعل التزامینک خفیف حرکہ لسی :

سویدی سویدک سویدم سویدیلر سویدیکز سویدک

آغر حرکہ لسی

یازیدی یازیدک یازیدم یازیدیلر یازیدیکز یازیدک

سویدی سوه ایدی مخفی اولدینی کبی یازیدک دخی یازہ ایدک مخفی اولوب بعد التخفیف ایکسی برکہ اولدینغندن فعل اعانہ نک کافی قافہ تبدیل اولنمشدر .

سوملی ایدم	سوملی ایدک	سوملی ایدی
سوملی ایدک	سوملی ایدیکز	سوملی ایدیلر

بونلر دخی بعضاً تخفیف اولنہرق سوملیدی، سوملیدک، سوملیدک دیو تصریف اولنور .

آغیر حرکه لیسلر دخی بویله در . فقط مخففک جمع متکلمنده
فعل اعانه نك کافی قافه تبدیل ايله مثلاً : یازمیدق دینلور .

حکایهٔ ماضیٔ شهودی

خفیف حرکه لیسلر

سویدم	سویدك	سویدی
سویدك	سویدیكنز	سویدیلر

آغیر حرکه لیسلر

یازدیدم	یازدیدك	یازدیدي
یازدیدك	یازدیديكنز	یازدیدیلر

صورت دیکرله تصریفی

سودم ایدی	سودی ایدك	سودی ایدی
سودك ایدك	سودیكنز ایدی	سودیلا ایدی

بوصورتده خفیف حرکه لی ايله آغیر حرکه لیسلر بیننده
بیر فرق یوقدر .

حکایهٔ ماضیٔ نقلی

سومش ایدم	سومش ایدك	سومش ایدی
سومش ایدی	سومش ایدیكنز	سومش ایدیلر

بعضاً یالکنز الفک حذفيله تخفیف اولنهرق ، سومشیدی
کبی تصریف اولنور .

حكاية حال

سويورايدي سويورايدك سويورايدم
سويورايدلر سويورايديكز سويورايدك

بونلر دخي بعضاً الف ويانك حذفيله تخفيف اولنهرق
مثلاً : سويوردي دينلور وبووجهله تصريف اولنور . فقط
جمع متكلمده كرك خفيف حركه لي اولسون ، كرك آغير حركه لي
بولسون لى التخفيف فعل اعانهك كافي قافه تبديل اولنهرق
مثلاً : سويوردي ، يازه يوردي دينلور .

چونكه بعض بلاد عثمانيه ده (يور) لفظى برقاعده خفيف
حركه لي كلمه لرده ضمه مبسوطة ثقيله ايله تلفظ اولنديغندن
سويوردي ، يازيوردي ، دينلك لازم كلور ايسده استانبولجه
بو (يور) لفظى خفيف حركه لي اولان كلمه لرده دخي ضمه
مبسوطة ثقيله ايله تلفظ اولنهرق كلمات شاذه حكمنه كيرمش
اولنديغندن استانبول لسانجه سويوردي دينلك لازم كلور .

حكاية مستقبل

سوه جك ايدى سوه جك ايدك سوه جك ايدم
سوه جك ايدلر سوه جك ايديكز سوه جك ايدم

حكاية مضارع

سور ايدى سور ايدك سور ايدم
سور ايدلر سور ايديكز سور ايدك

بونلرا کثریا تخفیف اولندرق سوردی ، سوردک کبی تصریف اولنور. آغیر حرکه لیلر دخی بوجهله در . فقط جمع متکلمه برمنوال سابق کاف غینه تبدیل اولندرق مثلاً : یازارحق دینلور . منفیلری دخی عینله بوقیاس اوزره تصریف اولنور.

روایت فعل التزامی:

سویشم	سویعشین	سویعش
سویعشز	سویعشکنز	سویعشلر

روایت فعل وجوبی:

سوملی ایشم	سوملی ایمشین	سوملی ایمش
سوملی ایمشز	سوملی ایمشکنز	سوملی ایمشلر

افعال شرطیه تصریفی

فعل التزامی شرطی :

سوسه م	سوسه ک	سوسه
سوسه ک	سوسه لر	سوسه کز

اکثریا مخاطبات مفردنده و متکلملرده های رسمیه اسقاط نیلله،

سوسک، سوسم، سوسک صورتنده یازیلور ،

فعل وجوبی شرطی :

سوملی ایسه م	سوملی ایسه ک	سوملی ایسه
سوملی ایسه ک	سوملی ایسه کز	سوملی ایسه لر

بعضاً الفک حذفیله تخفیف و وصل اولنهرق . سوملیسه
دیو تصریف اولنور .

ماضی^۲ شهودی^۲ شرطی :

سودی ایسه	سودک ایسه	سودم ایسه
سودیلر ایسه	سودیکزایسه	سودک ایسه

بعضاً تخفیف ایله سودیسه ، سودکسه دیو تصریف اولنور .

دیگر صورت :

سودیسه	سودیسهک	سودیسم
سودیسهلر	سودیسهکز	سودیسهک

بوصورتک آغیر حرکه لیمی :

یازدیسه	یازدیسهک	یازدیسم
یازدیسهلر	یازدیسهکز	یازدیسهک

ماضی^۲ نقلی^۲ شرطی :

سومش ایسه	سومش ایسهک	سومش ایسم
سومش ایسهلر	سومش ایسهکز	سومش ایسهک

روایت ماضی^۲ شهودی صیغه سی یوقدر . روایت ماضی^۲
نقلی یه کچکلم :

روایت ماضی^۲ نقلی :

سومش ایمش	سومش ایمشین	سومش ایمشم
سومش ایمشلر	سومش ایمشسکز	سومش ایمشک

روایت حال :

سویور ایمش	سویور ایمشین	سویور ایمثم
سویور ایمشیر	سویور ایمشکیز	سویور ایمشیز

بونلر دخی تخفیف ایله سویورمیش ، سویورمیشین کی
تصریف اولنور .

روایت مستقبل :

سوه جک ایمش	سوه جک ایمشین	سوه جک ایمثم
سوه جک ایمشیر	سوه جک ایمشکیز	سوه جک ایمشیز

بونلر دخی بعضاً تخفیف ایله سوه جکیش کی تصریف اولنور .

روایت مضارع :

سور ایدی	سور ایدک	سور ایدم
سور ایدیلر	سور ایدیکز	سور ایدک

بونلر اکثریا تخفیف ایله سوردی دیو تصریف اولنورلر
وبوصورتده جمع متکلمده کاف قافه تبدیل اولنهرق مثلاً :
یازاردق دینلور .

بونلر دخی بعضاً تخفیف ایله سومشیشه ، یاخود سوه شیشه
دیو تصریف اولنور .

حال شرطی :

سویور ایسه	سویور ایسهک	سویور ایسه م
سویور ایسه لر	سویور ایسه کز	سویور ایسه ک

مستقبل شرطی :

سوجك ايسه	سوجك ايسهك	سوجك ايسه
سوجك ايسهك	سوجك ايسهكز	سوجك ايسهك

مضارع شرطی :

سور ايسه	سور ايسهك	سور ايسه
سور ايسهك	سور ايسهكز	سور ايسهك

بعض تخفيف ايله سورسه ديو تصريف اولور .

كرك حكايه ، كرك روايت وكرك شرط صورتلرنده ادا
جمع اولان (لر) ك اصل فعله علاوه سى جائز اولور .

مثلا : سومشلا ايدى ، سويورلا ايدى ، سوه جكلر ايدى ،
سورلا ايدى ، وكذا سومشلا ايمش ، سويورلا ايمش ، سوه جكلر
ايمش ، سورلا ايمش ، وكذلك سومشلا ايسه ، سويورلا ايسه ،
سوه جكلر ايسه ، سورلا ايسه ، دنلك جائز اولور . بونلر دخى
بعضاً تخفيف ايله مثلا : سومشلا دى ، سومشلا مش ، سومشلا
ديو تصريف اولور .

فأمره . — فعل التزامينك حكايه وروايت صيغله بى بعضاً
شرط مقامنده استعمال اولورلر . نته كه « اكر بروسه كيديك
چوق منفعت كورردك » اكر ~~بيليله~~ دوام ايديشم ، چوق
قائده كوره جكمشم دىلدىكى كى . بونلر بعضاً تمنى ايجون
قوللا نيلورلر . نته كيم : « كاشك وقتيله اوقومغه چاليشيدم .

کافکه تحصیلده بولینیشز « دینلیدیکی کبی . بعضاً فعل التزامی شرطی دخی بویله تمنی معناسنه قوللانیلور . نتهکه : «آه بوسنه بروسه یه کیتسم» دینلیدیکی کبی . بعضاً تعظیم ایچون امر مقامنده بوفعل التزامی شرطی قوللانیلور . نتهکه : «شومکتونی یازیگز» . مقامنده ، یازسه گز . و «افدمز شو مسوده یی تصحیح بیوریگز» مقامنده بیورسه گز دینلیدیکی کبی .

صیغهٔ صد — ماضی شهودینک یاخود مستقبلک مفرد غائبنه ضمیر وصفی علاوه اولدوقده صیغهٔ صله اولورکه اولکیسندن زمان ماضی یی وایکنجیسندن زمان استقبالی متضمن و فاعلنه مضاف مصدر قیلندن اولور . نتهکه : «آنک سنی سودیکی ندن معلوم .» و «آنک سکا تذکره یازدیغی ایشیدلدی .» و «کله جکی محققدیر .» «قاله جغنی بيلم» دینلور .

جعلرنده ادا صله ساکن قلنور و غین دخی قافه منقلب اولور . سودکلری ، یازدقلری ، سوه جکلری ، یازه جقلری کبی . مخاطب و متکلمه مضاف اولدقلرنده آخرلرینه اصولی وجهله ضمیر اضافیلری لاحق اولور . سودیکیم ، یازدیغم ، سوچکگز ، یازه جغز کبی .

صیغهٔ صله چوق دفعه وصف سببی مقامنده استعمال اولنور . نتهکه : «سودیکی ذات ، کوره جکی نفات ، یازدیغ-ک یازی ، اوقویه جغک کتاب ، کیتدیکیم زمان ، اوغرایه جغم یرلر» دینلور .

مصدرک آخرینه (ده) علاوه واولمق ماده سیله ترکیب اولندقدہ زمان حاضری متضمن بر صیغہ صلہ اولور واولمق فعلنک تصریفیله دیکرلری کبی تصریف اولنور . مثلاً: سومکده اولدینی . یازمقده اولدیغک ، کلکده اولدقلری ، کورمکده اولدیغمز کبی ، بعضا اولمق یرنده بولنمق ماده سی استعمال اولنور . یازمقده بولندیغی ، یازمقده بولندیغم کبی . بعضاً ایدیکی قوللانیلور . یازمقده ایدیکی ، یازمقده ایدکلری ، یازمقده ایدیکلک کبی ، بعضیلر بومقامده ایدیکی لفظنی واو ایله ، ایدوک ، ایدوکم ، ایدوکگز ، صورتنده یازارلر .

باب سادس

ادوات یعنی حروف معانی بیاننده در .

ادات نرا . — لسان ترکیده (آ) حرف ندادر و عربینک (یا) لفظنه مقابلدر . آجانم کبی .

بعضاً بوکا (ها) الحاق اولندقدہ مقام تحسردہ (آه) دینلور و (یا) ایله تعجب ایچون (آی) استعمال اولنور . فتحه خفیفه ایله حرکه لندهرک یتیشور مقامنده (آه) دینلور . ضمه ثقیله مبسوطه ایله حرکه لندهرک مقام تلذذده (اوه) دینلور . اولنه واو ادخال اولنهرق مقام تأسفده (واه) دینلور . استعجال مقامنده (هایدی)

لفظی قوللانیلور . نته که : هایدی کیده لم دینلور . بعضاً تأکید ایچون فعللرک آخرینه (آ) کتوریلور . مثلاً : بویله اولور آ . دینلور که شبهه سز بویله اولور دیمکدر . فقط فعل اگر خفیف حرکه لی اولور ایسه (آ) دخی فتحه خفیفه ایله حرکه لنور و فعله وصل اولنور . مثلاً : فلان افندی بوکون مکته کیدر نه (کیدره) دینلور البته کیدر . دیمکدر . باقسک آ (باقسکا) و کلسک نه (کلسکه) دخی بو قیلندر . آخری متحرک اولان فعللردن صکره کلدکلرنده یایه قلب اولنور . مثلاً : دیدیکیم چیقدی یا وافندی کلدی یه ، دینلور . بعضاً (یا) و (یه) تنبیه ایچون کلمه نك اولنه داخل اولور . « یاطوغری ، دیدیکک آدمک بویالاننه نه دیرسک » و « یه سن نیچون بویله یالانجیلرک سوزلرینه آلدانور سین » دینلدیکی کبی . فارسیده ادات ندا اوله رق کلمه نك آخری مفتوح و ممدود قلنور . عربیده دخی کلمه نك اولنه (ای) کتوریلور .

بونلر نادر آ بعض اشعار عثمانیه ده استعمال اولنور لر . نته که : عزتا ، یاخود ای عزت ! عزت ! دینلور .

ادات تنبیه . — تنبیه سویلنه جک سوزه مخاطبک دقت نظرینی جلب ایتمکدر .

(ایشته) تنبیهدر . ایشته ایش بویله کوریلور . ایشته درسه بویله چالشملی دینلدیکی کبی .

(هله) دخی ادات تنبیهدر . هله شوکا باق جله سنده

اولدینی کبی. فقط اکثریا مقام مظفریتده قوللانیلور. هله درسمی بلله دم. وهله دیندیگی یاندم، جله لرنده اولدینی کبی. بعضاً خصوصاً مقامنده استعمال اولنور. استانبولک، هله بوغاز ایچنک هواسی نه لطیفدر! دینلیدیگی کبی.

(ها) دخی ادات تنیدر. نته کم هادیگله بن سکا بومسئله یی آکلاده یم دینلیدیگی کبی. عربیده دخی (ها) ادات تنیدر. هکذا کبی که ایشه بویله دیمکدر.

ادات تعلیل. — (ایچون) ادات تعلیلدر. بر حکمک علتته لاحق اولور. نته کیم: زیارت ایچون کلدیم دینلور.

مبهماته واسم اشارتله وضمیرله وصیغه صلیه دخی لاحق اولور. نه ایچون، بونک ایچون، آنک ایچون، بنم ایچون، بویله اولدینی ایچون کبی. بعضاً الفی حذف ایله تخفیف اولنور. نیچون، آنکچون، بنمچون، اولدینیچون کبی. بعضاً نه یه تخفیف اولنورق نیچون مقامنده نیه دینلور.

فارسیجه (برای) ایچون معناسنه در. برای خاطر کبی که خاطر ایچون دیمکدر.

عربیده لام مکسوره ایچون معناسنه کلور. لغرض، لسبب، کبی که برغرض ایچون، بر سبب ایچون دیمکدر. بعضاً (اجل) لفظیله قوللانیلور. لاجل المصلحه کبی که مصلحت ایچون دیمک اولور. (زیرا) دخی ادات تعلیلدر. فقط جله لرك اولنه داخل

اولور و آلت طرفده کی جله نك اوست طرفنده کی جله یه علت اولدیغنی افاده ایلر . بعضاً (چونکه) لفظی دخی زیراً مقامنده استعمال اولنور . (اوزره) ادات استعلا درکه بر شیئک اوستی دیمکدر . آت اوزره ، واستراحت اوزره کبی و اکثریا ضمیر اضافی ایله قوللانیلور . واوزرینه ، اوزریکه ، اوزریعه ، اوزرینه ، اوزریکزه اوزریعزه دینلور . مصدر لر له لاحق اولدوقده شرط معناسنی متضمن اولور . مثلاً : دفتر طومق اوزره مأمور اولدی . « دینورکه ، دفتر طومق شرطیله دیمک اولور . بعضاً زمان استقبالی زمان حاله تقریب ایدر . کیتک اوزره یم دینلدیکی کبی که همان شمدی کیده جکم دیمک اولور .

فارسیده (بر) اوزره معناسنه در . نته که : بر کال دینلور که کال اوزره دیمکدر . عربیسی (علی) حرفیدر . علی کل حال کبی که هر حال اوزره دیمکدر .

(اگر) حرف شرطدر . فارسیدن مأخوذدر . جله شرطیله لر اوزرینه داخل اولور . « اگر بروسه یه کیدر ایسه ک ، شفا بولور سین . » کبی و شرط حالی اوزره داخل اولدوقده اکا (چه) علاوه قیلنور . مثلاً : اگر چه بن سزک زیارتکزه کیتدم ایسه ده ، سز نزاکت ایدوب بزه کلیکزه . « دینلور و بعضاً الفی حذف ایله کر چه یازیلور . و بعضاً (اگر چه) یرنده (هر نه قدر) لفظی قوللانیلور .

(ایکن) ادات حالتدر . جمله لره لاحق اولور . مثلاً : « بن سکا مخلص ایکن » دینلور که مخلص اولدیغم حالده دیمک اولور . کذلک « بن فلان یره کیدر ایکن » دینلور که کیتمکده اولدیغم دیمک اولور و بعضاً الفی حذف ایله تخفیف اولنور . مثلاً کیدرکن دینلور . (ایله) بعضاً مصاحبت ایچون اولور . یعنی برلکده اولمق معناسنی افاده ایلر . نته که : « فلان اغا، پاشا ایله یالی یه کیتدی . » دینلدیکی کبی و بعضاً تأکید ایچون (بیله) یاخود (برابر) علاوه اولنور . فلان افندی ایله بیله ، یاخود برابر بروسه یه کیتش دینلدیکی کبی .

بعضاً استعانه ایچون اولور . آلیت و وساطت معناسنی افاده ایلر . نته که : قلم ایله یاخود کندی قلمی ایله یازدی . و بچاق ایله ، یاخود بچاغی ایله ، وبالطه ایله یاخود بالطه سی ایله کسیدی دینلور . بعضاً الفی حذف ایله تخفیف اولنور . قلله ، قلیله و بچاقله ، بچاغیله ، بالطه سیله دینلور . بعضاً مصدر لاحق اوله رق تعلیل معناسنی افاده ایدر . کسمکله کبی که کسیدیکی ایچون دیمک اولور . بعضاً (ایله) معناسنده (برله) قوللانیلور . ایتمک برله ، یاقمق برله کبی .

فارسجه (با) ایله معناسنده در . نته که : باسند دینلور ، سند ایله دیمکدر . عربجه ده بو مقامده باء مکسوره و مع لفظی قوللانیلور . بالسلامه کبی که سلامت ایله دیمکدر . و مع مافیه دینلور که شونکله بیله دیمک اولور .

(ایمدی) ادات تفصیلدر . برکلام مجلی تفصیل ایچون کلان
جمله نك اولنه داخل اوله رق بوجمله نك ماقبلنی تفصیل ایده جکنی
اشعار ایلر .

(اما) عربیدن مأخوذدر ، اوست طرفندن چکن مبهم سوزی
ایضاح ایچون ایراد اولنان جمله نك اولنه داخل اولور .

(انجق) ادات حصردر . بر حکمک بر شیئه انحصارینی
افاده ایلر و حصر ایکی معنایی مشتملدر : بری معنای ثبوتیدر که
برشیئک برشیده بولنمسیدر .

دیگری معنای سلیدر که اول حکمک بشقه یره سرایت
ایتمه سیدر . بو حصر (انجق) لفظنك داخل اولدینی کلامده
اعتبار اولنور . مثلاً : « فلان کشی ایله استانبوله آنجق بن کیتدم . »
دینلده کیتک متکلمه مقصور اولوب بشقه سنك کیتمدیکی افاده
ایدر و « آنکله بوکون بن ، آنجق استانبوله کیتدم . » دینلده
کیتهمسی استانبوله مقصور اولوب بشقه یره کیتمدیکی افاده ایلر
و « بن بوکون استانبوله آنجق آنکله کیتدم . » دینلده بشقه سیله
کیتمدیکی مفید اولور . بعضاً جمله استدر اکیه یه یعنی بر
کلامک ایهام ایلدیکی خاطره یی دفع ایچون ایراد اولنان جمله یه
داخل اولور . مثلاً : « چوق سویله دی ، آنجق افاده سندن برشی
اکلاشلمدی » دینلور که چوق سویلیدی دینلده چوق شیلر
اکلاشلق خاطره کلور و بونی دفع ایچون آنجق برشی اکلاشلمدی

دینلور « رجا ایتدی ، انجق رجاسی قبول اولمندی . » عباره سی دخی بوقیلدندر .

عربیدن مأخوذ اولان (فقط) لفظی آنجق کبی حصر واستدراك ایچون قوللانیاور . ینه عربیدن مأخوذ اولان (لکن) لفظی دخی استدراك ایچون استعمال اولنور .

(بلکه) ادات اضرا بدر . یعنی اوسب طرفده کی سوزدن صرف نظرله آلت طرفنده کی سوزه باق دیمکی اشعار ایلر . نته که : آنک سوء حالی یالکز کندوسنه دکل ، بلکه بالجه اقرباسنه مضردر دینلدیکی کبی .

(جه) اسم وصف بابلرنده بیان اولندیفی اوزره اسملره لاحق اوله رق ادات نسبت وصفتره لاحق اوله رق ادات تصغیر اولور . بعضاً دخی ادات تمیز اولور که بر حکمک جهتی بیان ایلر . نته که : سن معلوماتجه آکا فائقسین . دینلور که معلومات جهتیله دیمک اولور . ونجه بویله در ، دینلور که بنم عندمده ، بکا کوره ، دیمک اولور . بعضاً ماضی نقلینک ، یا مضارعک مفرد غائبنه لاحق اولور واکا برده (سنه) علاوه اولنهرق تشبیه معناسی افاده ایلر .

نته که : اولمشجه سنه واید رجه سنه دینلور که اولمش کبی ، واید ر کبی دیمک اولور .

(ده) ادات ظرفیتدر : بروسه ده ، کوز موسمنده ، آت صرتنده

بونده ، شونده ، آنده کبی . صیفه صلهیه لاحق اوله قده
نون ایله مثلاً : کیتدیکنده ، واردیغنده دینلور .

فارسیده (در) ده معناسنه در : درخاطر ، کبی که خاطرده
دیمکدر . عربیده دخی (فی) ده معناسنه در . فی الواقع ، کبی که
واقعه دیمکدر .

ظرفلر ایکی قسمدر . بری ظرف مکندر : یرده ، قونا قده
مکتبه کبی . دیکری ظرف زماندر : آیده ، ییلده کبی .
بعضاً ظرف زمانلردن ادات ظرفیت طی اولنور . اقشام
چیقدم ، بوکون کلدیم کبی .

صکره کلمه سی ظرف زمان اولدینی حالده دائماً اداتسز
قوللانیلور . صکره کلدی کبی .

بومقامده عربیدن بعده ، مؤخرأ ومقابلهده مقدما لفظلری
قوللانیلور .

(دك) ادات انتہادر . بر فلك نهایت بولدینی شیئه لاحق
اولور : بروسه یه دك کیتدم دینلیدی کبی .

بعضاً آخینه یاننون ساکنه علاوه اولنهرق دکن دینلور .
بعضاً تأکید ایچون کلمه نك اولنه (چاق) کتوریلور : چاق
بروسه یه دك دینلیدی کبی ، لکن بو (چاق) لفظنك استعمالی
مهمجوردر . بعضاً دك یرنده قدر لفظی قوللانیلور : بروسه یه
قدر کیتدم دینلیدی کبی .

فارسیمجه بومعنايه تاحرفي قوللانیلور : تابصباح کبی که
صباحه دك دیمكدر. عربیده (الی) ادات انتہادر : الی آخر العمر
کبی که آخر عمره دك دیمكدر .

(دن) ابتدا ایچوندرکه برمسافه نك مبدئنه لاحق اولور :
استانبولدن مصره قدر کیتدم دینلیدیکی کبی . یاخود برزمانك
مبدئنه لاحق اولور وبولفظی علاوه اولنور : شهر رمضانبرو ،
کبی . وبعضاً سبیت ایچون اولوب فلك منشأ وسبینه لاحق
اولور : اوبكا کلدیکندن بن ده آکا کیتدم . وبوندن ناشی
کوروشه مدك ، دینلیدیکی کبی . وبعضاً بیان ایچون اولور :
کومشدن ظرف یاپدر مق ، کبی که ظرفك اصلی بیان اولنور .

مصدر تخفیفیه لاحق اوله رق آندن مقدم برفلك وقوعی
اشعار ایلر : سن اورایه کیتدن بن کلیوردم ، دینلیدیکی کبی
وبعضاً ادات تفضیل اولان دها لفظندن اول کلور : بو آندن
دها اعلادر ، کبی . وبعضاً اشبو (دن) اداتندن صکره (ایسه)
زیاده قیلور :

نته که : آنك لاقدیسنی ایستمکدن ایسه ، کندیسنی کورمك
دها اولادر، دینلور . و(دن) بعضاً بشقه لفظیله ایله برابر استنا
مقامنده استعمال اولنهرق بر حکمدن مستنا اولان شیئنه لاحق
اولور : مکتبدن بریره کیمه ، دینلیدیکی کبی که هیچ بریره کیمه ،
الامکتبه کیت دیمك اولور . وبعضاً بشته یرنده (غیری) یاخود
(ماعدا) قوللانیلور . بندن غیری ، سندن ماعدا ، کبی .

فارسیده (از) وعربیده (من) و (عن) دن معناسنه در :
 ازهرجهت ، من الفرائب ، عن اجزای کتاب کبی که هرجهتدن ،
 غرابدن ، اجزای کتابدن دیمکدر . فارسیده (مکر) عربیده
 (الا) استئنا ایچوندر . ایکیزی دخی بعضاً لسان عثمانیده استعمال
 اولور . مثلاً : فلان افندی بردرس فوت ایلز، مکرکه نامزاج
 اوله . وبریره کیتدیکی یوق ، الامکتبه کیدر دینلور . (دیو) ترجی
 یعنی بر فعلک وقوعنی امید ومأمول ایتک مقامنده قوللانیلور .
 مثلاً : اکرام اولنور دیو کلدیم دینلورکه اکرام اولنور امید
 واملی ایله کلدیم ، دیمک اولور .

ادات نفی . — (سز) ادات نفیدر . اسمله لاحق اولدقده
 صفت اولور . عقلسز، پاره سز، کبی که عقلی، پاره سی اولمیان دیمکدر .
 بعضاً آخرینه بریا ونون ساکنه علاوه اولنور و (زا)
 دخی مکسور قلنور : آگسزین کبی . مصدرلره لاحق اولدقده
 دائماً بویله یا ونون ایله قوللانیلور : کلکسزین، صور مقسزین
 کبی . اماصفتلره لاحق اولماز . انلرده ادات نفی (دکل) لفظیدر :
 دلی دکل ، عاقل دکل کبی . (هیچ) نفی تأکید ایچوندر : او هیچ
 بردرس فوت ایلدی ، بنم اکا هیچ بر دیه حکم یوقدر دینلیدیکی کبی .
 فارسیجه (بی) سز، (نا) دکل معناسنه در . ننه که : بی سبب
 دینلورکه سببسز دیمکدر . ونالایق دینلورکه لایق دکل دیمکدر .
 ینه فارسیجه (نه) ادات نفی اولوب مکرر اوله رق قوللانیلور :

نه اویله اولور ، نه بویله اولور . جمله لرنده اولدینی کبی که ایکی درلوسی ده اولماز دیمک اولور .

عربیده (لا) ادات نفی اولوب لسانمزده دخی بعضا با ایله قوللانیلور : بلا سبب کبی که سببسز دیمکدر .

بعضاً بومقامده (بغیر) لفظی قوللانیلور : بغیر حق کبی که حقسز دیمکدر . یا لکنز (غیر) لفظی صفتلره داخل اولور : معامله غیر لایقه کبی که لایق اولیان دیمکدر .

(که) فارسیدن مأخوذ ادات ربطدر . بعضاً صفتی موصوفه ربط ایلر . نته کیم : بو چو جق که درسنه مداومدر ، آز وقتده فیض بولور دینلور . بعضاً مفعولی فعله ربط ایدر . نته کیم : آکلادم که سن درسه چالشماشسین دینلور . و درسه چالشمادیفکی آکلادم دیمک اولور . بعضاً میم الحاق اولنور وهای رسمیه یایه تبدیل ایله یا حذف ایدیلولر و کیم و یا کم دینلور .

ادات تشبیه . — (کبی) ادات تشبیهدر . مشبه لاحق اولور . نته که : اینجو کبی دینلور . بعضاً صیغه صلیه لاحق اولورق در حال معناسنی افاده ایلر . مثلاً : او کلدیکی کبی بن کیتدم . دینلده آنک کلدیکی وقت بن در حال کیتدم دیمک اولور .

عربیده کاف مفتوحه ادات تشبیه اولوب لسان عثمانیده ناهراً قوللانیلور : کالاول ، کبی که لولکی کبی دیمکدر .

(جلین) دخی لسان ترکیده ادات تشبیهدر . شمدی نادر قوللانیلور : بنجلین ، کبی که بنم کبی دیمکدر .

بويله ، شويله ، اويله لفظلری دخی بونك كېي ، شونك كېي ،
آنك كېي معنارینه استعمال اولنورلر .

عربجه (كذا) بويله و (هكذا) اشته بويله و (كذلك)
شويله ديك اولوب بعضاً باره آره سنده استعمال اولنورلر .
(نته كه) و (نته كيم) دخی تشبيه و تمثيل ايچوندر ، فقط جله لرك
اولنه داخل اولورلر .

(صان) امر حاضر در ، فقط (صانكه) تشبيه مقامنده
استعمال اولنور . مثلاً : «صانكه او بنی بيليور» دینلوركه بيليور
كېي ديك اولور .

(كویا) فارسی اولوب (صانكه) معناسنه استعمال اولنور .
لسان فارسیده (وش) و (آسا) ادات تشبيه اولوب بعض
اشعار و منشئات عثمانیه ده استعمال اولنور . ماهوش و مسك آسا
كېي كه آی كېي و مسك كېي ديمكدر .

كذلك (واری) دخی ادات تشبيهدر . نته كه : كل كېي
ديه جك یرده كلواری دیرلر .

(می) ادات استفهامدر . دائماً مسئول عنیه لاحق اولور .
مثلاً : بروسه یه می کیتدك ؟ دینلده کیتدیکک یر بروسه میدر ؟
دیو سؤال ایدلش اولور . و بروسه یه واپور ایلهمی کیتدك ؟
دینلده ، بروسه یه کیتدیکی معلوم اما نه واسطه ایلله کیتدیکی
مجهول اولدیغندن واپور ایلهمی دیو سؤال ایدلش اولور . اگر

کیتک فعلنک وقوع وعدم وقوعدن سؤال اولنه جق اولور ایسه .
فعله الحاق اولور و ضمیر تعلیلردن صکره و ضمیر نسبیلردن
اول کتوریلور . مثلاً : بروسه یه کیتدکی ؟ یا خود کیده جکمسین ؟
دینلور . بو وجهله واقع اولان سؤاللرک جوابلرنده اگر جمله
حالی اوزره تقریر اولنه جق ایسه ادات تصدیق اولان (اوت)
لفظی قوللانیلور . نته که : بروسه یه کیتدکی ؟ سؤالنک جوابنده ،
اوت دینلده کده کیتدم دیمک اولور و اگر (خیر) دینلور ایسه
رد ایدلمش یعنی کیتدم دینلمش اولور .

بعضاً اوت یرنده عربیدن مأخوذ اولان بلی قوللانیلور .
استفهام بعضاً مقام نفیده ایراد اولنوب استفهام انکاری
تسمیه اولور . نته که : یاپه مدک ، مقامنده یاپه بیلدکی ؟ دینلور .

صروف عطف — لسان عربیده واو مفتوحه حرف عطف
اولوب لسان عثمانیده دخی مستعملدر ومطلقاً جمع ایچوندر .

ایکی ذاتک بر حکمده و یا خود ایکی حکمک بر ذانده اشتراک
کلرینی افاده ایدر . مثلاً : فلان وفلان کلدی دینلده کده ایکی
ذاتک کلمک فعلنده اشتراکلی افاده اولور فلان وفلانی کورد
دینلده کده کورمک فعلنک تعلقنده ایکی ذاتک اشتراکی افاده
اولور . فلان کلدی و کیتدی ، دینلده کده ، کلمک و کیتک
فعللرنده بر ذاتک اشتراکلی افاده اولور . لکن بو اجتماع
اشتراکلردن معیت یا خود تقدم و تأخر معنالری استفاد اولماز .

اگر معیت معناسی افاده اولمق ایستیلور ایسه برلکده
یاخود برابرلفظی علاوه اولنور . مثلاً : فلان وفلان برلکده
یاخود برابر کیتدیلهر دینلور .

تقدیم وتأخیر ایچون دخی صکره ، یاخود بعده علاوه
اولنور . مثلاً : فلان صکره یاخود بعده فلان کلدی دینلور .
وبعضاً بر واو ایله ایکی کلمه دیکرایکی کلمه اوزره عطف اولنور .
مثلاً : فلان افندی قلمه وبرادری مکتبه کیدیور دینلور . بعضاً
برجمله دیگر جمله اوزرینه عطف اولنور : فلان او قودی ، فلان
یازدی کبی . لسان عثمانیده ادات عطف چوق دفعه ترك اولنور .
نته که : کاغد قلم کتور ، فلان کلدی کیتدی ، دینلور که کاغد و قلم ،
کلدی و کیتدی دیمک اولور . (دخی) و مخفی اولان (ده)
ادات عطفدر . بعضاً واو یرنده قوللانیلور . نته که : فلان دون
کلدی . بوکون دخی ، یاخود ، بوکون ده کیتدی دینلور .
بعضاً جزالره داخل اولور : اوکلور سه بن دخی یاخود بن ده
کیدرم کبی . (ده) بعضاً صیغه عطفیه علاوه اولنور : کلوبده
کیتدی . کبی .

(هم) دخی جمع و اشتراك معناسنه ادات عطفدر : کلدی هم
کیتدی کبی . چوق دفعه مکرر اوله رق ایراد اولنور . هم
کلدی ، هم کیتدی ، کبی . بعضاً ایکنجیمس : نك آخرینه (ده)
علاوه اولنور . هم کلدی ، هم ده کیتدی کبی . واو اسان فارسیده

دخی حرف عطفدر . فقط معطوف علیہک آخرندہ حرف املا
یاخود حرف مد بولنور ایسه مصموم اوقنور : خانه وکاشانه ،
صفا وجفا کبی ، والا واو تلفظ اولنمیوب معطوف علیہک آخری
ضمه ایله حرکه لنور : کاغد و قلم کبی . اشعار عثمانیه ده دخی بعضاً
واو عطف بو وجهله استعمال اولنور .

(یاخود) و مخفی اولان (یا) دخی حرف عطفدر . فقط احد
امرین ایچوندر . نته که : صو ، یاخود شربت کتور وفلان
یافلان کلسون ، دینلور . بو (یا) چوق دفعه مکرر اوله رق ایراد
اولنور . نته که : (یا کتابی اعاده ایت یا پاره سنی ویر) و (یا مکتبه
کیت ، یا بر صنعته تثبث ایت) دینلور و مقام استفهامده بعضاً
یاخود یرینه (یوقسه) کتوریلور . نته که : خواجه افندی
مکتبه کلدیمی ، یوقسه کلدیمی ؟ دینلور که یوق بلکه کلدیمی ؟
دیغک اولور . واکر امرینده تساوی قصد اولنور ایسه (کرک)
لفظی قوللانیلور : کرک کلسون ، کرک کلسون کبی که کلوب
کله می متساویدر دیغک اولور .

باب رابع

کلام و جمله لره مخصوص اولان بعض مسائل حاویدر .
کلام بر تمام سوز دیغکدر . ارکان اصلیه سی مسندالیه و مسند

و رابطه در. نته که: عدالت کوزلدر، دیدیکمزده مبتدا یعنی عدالت، مسندالیه و خبر یعنی کوزل، مسنددر. و (در) اسناده دلالت ایلان رابطه در.

جمله فعلیه لرده ایسه، فاعل مسندالیه، فعلی مسنددر. و بعضی افعاله رابطه اولیوب اسناده دلالت ایلان آنجق صیغه و هیئتدر. نته که: کل وکلدی برر کلامدر. بونلرده ایسه مستقلاً اسناده دلالت ایده جک بر لفظ یوقدر.

مضاف الیه و صفت مسند الیهک، یامسندک قیدلری اولوب بونلر ایسه بحثزدن خارجدر. آنلر یوقاروده بیان اولنشددر. بوراده متممات جمله دن بحث ایده جکز:

متممات جمله اوچدر. یعنی حال، تمیز و متعلقات فعلدر. حال اکثریا فاعلک حین اجرای فعلده هیئتنی مبین اولور: کوله رک کلدی کبی. بعضاً مفعولک هیئتنی مبین اولور. نته که: بن آنی کیدنش اولدینی حالده کوردم دینلدیکی کبی.

تمیز نسبتک جهتنی بیان ایلر. نته که: سن اکا معلوماتجه فاقسین دینلدیکی کبی.

متعلقات فعل مفعول به، مفعول الیه، حروف تعلیل، استعلا، مصاحبت، ظرفیت، انتها، ابتدا و تشبیه ایله فعللری مربوط اولان لفظلردر: قلبی قیرمه، کناهه کیرمه، نیچون بو قدر اوزریمه واریورسین. بنمله اوغراشمه، بن مکتبده

صباحدن آقشامه دك درسه چالیشیورم . بنم کبی آرقداشیمی
 بوله جقسین ؟ جله لرنده اولدینی کبی . بونلر بعضاً مسند اولورلر .
 بکا ایتدیك ادا نیچوندر ؟ خواجه مکتبده در . درس ساعت
 اوتهدکدر . بنم چکدیکم هپ سندندر . بوباغچه باغ ارم کیدر
 دینلیدیکی کبی .

هرکلام بر جله در . لکن هر جله یه بر کلام دینلز . زیرا
 بعض جله لر واردر که بر بشقه جله یه مربوط اوله رق مستقل
 بر کلام اولمز . بلکه کلامک بر جزئی اولور . مثلاً : جله شرطیه
 کلام اولیوب بلکه جله جزئییه ایله برابر بزکلام اولور . کذلک
 جله لر بعضاً حال ترکیبی اوله رق دیگر جله یی متم اولور . مثلاً :
 بن سکا پدرانه نصیحت ایلشیکن سن طوتمدک . ترکیبنده ،
 نصیحت ایلش جمله سی حال ترکیبی اوله رق ، طوتمدک جمله سی
 متم اولور . و حال بویله ایکن نیچون عناد ایدیورسین ؟ ترکیبنده ،
 حال بویله ایکن جمله سی ایدرسین جمله سی متم اولور .

کذلک بر جله صیغه صیله صورتنه قونلدن صکره (حالده)
 یاخود (تقدیرده) لفظی علاوه اولنه رق حال ترکیبی اولور .
 نته که : ایش بویله اولدینی حالده ، یاخود بویله اولدینی تقدیرده ،
 دینلور و بعضاً جله لر تمیز اولور . نته که : بن سکا مخلص اولدیغم
 جهته بویله نصیحت ایدیورم . یاخود سکا اخلاصم برکال
 اولدینی جهته اخطار ایدیورم دینلور .

بعضاً جمله‌لر صیغهٔ صله صورتنه قونیه‌رق متعلقات فعلدن اولورلر. مثلاً: او بکا اکرام ایتدیکچون بنده اوکا اکرام ایتدم دینلده، اکرام ایتدیکچون جمله‌سی صیغهٔ صله اوله‌رق اکرام ایلدم فعلنه تعلق ایتشد. سائرلری دخی بوکا قیاس اولنه.

فأمره — صیغهٔ صله معقول الیه صورتنه قونیه‌رق (مبنی) یاخود (بناءً) الحاق اولندقد، تعلیل معناسنی مفید اوله‌رق دیگر برجه‌لرک متممی اولور. توجه‌لر برکال اولدیغنه مبنی، یاخود بناءً دینلدیکی کبی که اولدیغیچون دیمک اولور. بعضاً (مبنی) یا (بناءً) یرینه (نظراً) لفظی کتوریلوب تمیز مقامنده اوله‌رق متم اولور. نته که: سزک بو طور و معامله‌ده بولندیغکزه نظراً دینلور که بولندیغکزه کوره، یاخود باقیلورسه دیمک اولور.

باب سادس

الفاظ عربیه مخصوص اولان مسائل بیاننده در

فصل اول

معرفه و نکره یه دائر در

لسان عربیده اسم جنسلر یا معرفه یاخود نکره اولور. شویله که: اولنه لام تعریف دینلان (ال) کتوریلور ایسه معرفه دینلور. و بونک همزه‌سی همزه وصل اولدیغندن اوست طرفنه

متصل اولدوقده ساقط اولور. فی الحال کبی که اول حالده دیمکدر.
واکر آخرینه تنوین دینلان کیزلی نون کتوریلور ایسه نکره دینلور
وعلامت اولهرق ایکی حرکه قونور : لغرض ولغنی کبی که
برغرض ایچون وبر معنی ایچون دیمکدر . بعضاً تنوینی تأکید
ایچون (ما) علاوه ونون میه قلب وادغام اولنور: لغرض ما کبی که
غرضلردن برغرض ایچون دیمک اولور. نوع مادخی بوقیلنددر.
اسمک آخری منصوب یعنی مفتوح اولدینی حالده آخرینه
تنوین لاحق اولدوقده علامت اولهرق الف یازیلور وبوصورتله
بعضاً تمیز مقامنده قوللانیلور. نته که : شرعاً و عرفاً بویله اولمق
لازم کلور دینلور که شریعتجه و عرفجه دیمکدر . فقط اسمک
آخرنده تاء تأیید بولنور ایسه حالی اوزره قالور : عادة کبی که
عادتجه دیمکدر . بعضاً صفتلر بویله منون اولهرق حال ترکیبی
مقامنده قوللانیلور: ماشیاً کلدی کبی که یورویه رک کلدی دیمکدر.
لسان عثمانیده اسماء عربیه بعضاً بویله معروف یا منکر اولهرق
استعمال اولنور ایسه ده اکثر یا ادات تعریف و تنکیدن مجرد اولهرق
استعمال اولنور لر و عربجه مضافلر دائماً لام تعریفدن و تنویندن مجرد
اولور وفارسیده اولدینی کبی مضاف الیه اوزرینه تقدیم اولنور.
و آخری ایجابنه کوره مرفوع یا منصوب ، یا مجرور اولور.
امالسان عثمانیده دائماً مرفوع یعنی مضموم قلنور دارالمعلمین و دارالفنون
کبی .

فأَمَهُ . — عربیده صاحب معناسنه اولان (ذو) و (ذی) و جعلری اولان (ذوی) کله لری بعضاً مضاف اوله رق لسان عثمانیده استعمال اولنور: ذوالوجهین کبی که ایکی یوزلو دیمکدر. و ذوی الید ، ال صاحبی و ذوی العقول اصحاب عقول دیمکدر.



فصل ثانی

تذکیر و تأیث حقنده در .

مذکر اړک و مؤنث دیشی دیمکدر . بونلر مذکر حقیق و مؤنث حقیقیدر . ترکی و فارسی لسانلرنده بونلرک صورت استعماللرنجه برفرق یوقدره . اما عربی ترکیب و صیغه لرنده فرقلری واردر .

عربیده بونلرک لفظیلری دخی واردر که اسملرک بعضیسی مذکر و بعضیسی مؤنث اعتبار اولنور . مثلاً : جد مذکر ، محبت مؤنث ، وقر مذکر ، شمس مؤنثدر .

مؤنث یا لفظی ، یا قیاسی و یا سماعیدر . قیاسی ، قاعده تحتنده بولنان مؤنثلردر . شویله که آخرنده تاء تأیث بولنان اسملر هپ مؤنث اعتبار اولنور . تاء تأیث کلمه نك آخیرینه الحاق اولنان بر تاء زائده در که تاء کرد صورتنده یازیلور . یعنی ها رسمنده یازیلوب اوزرینه ایکی نقطه قونور و حال وقفده ها اوقونور .

کړک فارسيده ، کړک لسان عثمانیده اشبو تاء تأنيث ايکي صورتله يازيلور . شويله که : بانقطه لری اسقاط ايله هاء رسميه تبديل قيلنور : نقطه وعبارہ کښي . ياخود تطويل ايله تا تلفظ اولنور : عادت ، مصلحت ، ملاقات ، عبارت کښي . فقط اولنه لام تعريف کتوريلور ، ياخود قاعده عربيہ اوزره مضاف قلنور وياخود آخرينه تنوين الحاق ايديلور ايسه ، ينه تاء کرد صورتنده يازيلور : لاءجل المصلحة ، بالملاقاة ، خاتمة الكتاب ، لمصلحة وعادة کښي .

پت ، التفات ، ثبت ، ثبات ، ثبوت ، اثبات ، سبب ، سمت ، صمت ، سکوت ، اسکات ، صيت ، وقت ، ميقات ، توقيت کلمه لرینک آخر لرنده کی قالر نفس کلمه دن اولوب تاء تأنيث دکدر .

برده تا بعضاً ادات مبالغه اولور . او حالده علامت تأنيث عدد اولنمز : علامه کښي که پک زیاده عالم آدم ديمکدر . برده علمر بو بابه مستنادر . مثلاً : طلحه ، رفعت ارکک آدی اولد قلرندن مذکر حقیقی اولمقله تأنيث لفظيلرينه اعتبار اولنماز . وهند برقادینک آدی اولوب مؤنث حقیقیدر . لفظنک مذکر اولديغنه باقلماز .

عربیده علامت تأنيث اولان برده الف واردر که آکا الف تأنيث دینلور وایکي قسمه تقسیم ايله برینه الف مقصوره ، دیکرينه الف ممدوده دینلور . الف مقصوره (یا) صورتنده

يازيلور والڤ ممدوده كندى صورتندە يازيلوب آندن صكره بر همزه كلور .

الف مقصوره ايله مؤنث اولان اسملردن لسانغزده مستعمل اولانلر (اى، خنى، دعوى، فتوى، شورى، حى) كلهلريدنر. كرچه معنى ومبنى كېي آخرنده الف مقصوره اولان پك چوق الففاظ عربيه وار ايسهده بونلرك الفلرى نفس كلهدن اولوب الف تائىث دكلدر . بومثللو كلهلرك آخرنده كى الف مقصوره لر بعضاً الف ايلهده يازيلور.

مثلا : مدعى ومدعى عليه قاعده عربيه جه ايكيسيده يا ايله يازلىق لازم كلور ايسهده دفع اشتباه ايچون ايكنجيسى الف ايله مدعا صورتندە يازلىق مستحسن كوريلور .

كرك علامت تائىث اولسون ، كرك اولسون الف مقصوره ادوات تركيه دن برينه متصل اولدقده الف صورتندە يازيلور: دعوالر مبناىلر كېي .

الف ممدوده ايله مؤنث اولان اسملر لسانغزده پك نادر قولانيلور. فقط صحرا لفظى زبازددنر. كرچه غدا كېي آخرنده الف ممدوده اولان سائر كلهلرده وار ايسهده انلرك الفلرى علامت تائىث دكلدر . الف ممدوده لسان عثمانيده همزه سز اوله رق صحرا وغدا كېي يازيلور .

مؤنث سماعى علامت تائىث اولمدينى حالده لسان عربيده

مؤنث اعتبار اولسان اسملردر . مثلاً : اذن (قولاق) عین (کوز) دیک اولوب سامعه و باصره تأویلیله مؤنث اعتبار اولمشدر . کذلک سلاح دخی برنوع آلت اولق ملابسہ سیله بعضاً مؤنث اعتبار اولنور . بونلر برقاعده تحتندہ اولمقلرندن ایشیدوب بلله مکہ موقوفدر . بونلردن لسان عثمانیدہ آرزوق استعمال اولنانلر ذیل کتابک بشنجی فصلندہ ضبط و تحریر اولنور .

عربی صفتلر دخی اسملر کبی تاء تأنیث ایله مؤنث قیلنورلر . حسن ، حسنه ، کامل ، کامله ، شرقی ، شرقیه کبی و بعضاً الف مقصوره و ممدوده ایله مؤنث اولورلر : عطشان ، عطشی واجر ، جراء کبی .

اعداء وصفیه تا ایله مؤنث اولور : ثانیه ، ثالثه کبی . فقط اولک مؤنثی اولی کلور .

قاعده عربیه جه کیفیت تذکیر و تأنیثده صفتک موصوفه مطابقتی یعنی موصوف مذکر ایسه صفتک دخی مذکر ، و مؤنث ایسه بونک دخی مؤنث اولسی لازمدر .

عربی اسملر عربی صفتلر ایله قاعده فارسیه اوزره ترکیب اولندقلرنده اهل فرس اکثریا بومطابقتہ رعایت ایتیموب مثلاً : عزت عظیم ، صحبت قدیم ، لقمه لطیف و قاعده اول دیرلر .

امالسان عثمانیدہ اوילה عربی صفتلر عربی اسملر ایله قاعده فارسیه اوزره ترکیب اولندقدہ دائماً کیفیت تذکیر و تأنیثده

مطابقتہ رعایت اولنہ کلمشدر . مثلاً : عبدقدیم ، التفات عالی ، صحبت قدیمه ، لقمه لطیفه ، دعوای کاذبه ، صحرای واسعه دینلور .

فقط مؤنث سماعیلره اعتبار اولنماز . مثلاً : شمش منیر ودار واسع دینلور . یالکز نفس کلهسی مؤنث اعتبار اولنهرق نفس اماره ، نفس مطمئنہ دینلور . برده حروفک اسملری مؤنث اعتبار قیلنور . راء مفتوحه ، نون ساکنه کبی . آنجق بعضاً قاعده فارسیه اوزره رای مفتوح ونون ساکن دخی دینور . آیلرک اسملری هپ مذکر در . فقط جادی مؤنثدر . بناء علیه جادی الاولى ، جادی الاخری دینلور .

بعض اسماء فارسیه نك آخرنده کی هاء رسمی هاء تأییدن مبدل اولمدینی جهتله آنلری مؤنث ایله توصیف ایلك جائز اولماز . مثلاً : خانه واسع دینلور ، خانه واسعه دینله من . فقط بعض ابنیه جسمیه میریه نك اسملری شاذ اولهرق مؤنث ایله توصیف اولنور . طوبخانه عامره ؛ پوسته خانه عامره کبی . بونلر دخی ابنیه تأویلیه معنی مؤنثدر ، دیوتوجیه اولنہ بیلور .

بعضاً موصو فلر متروک و مهجور اولهرق یالکز صفتلر بر شیئه علم اولور . محودیه کبی که فی الاصل سفینه محودیه یاخود ترعه محودیه در .

بالاده موضوع بحث اولان مطابقت آنجق قاعده فارسیه جه ترکیب وصفیلرده در ، اما ترجمه ترکیب وصفیلرده مطابقتہ رعایت

اولناز. مثلاً: مشكله مسئله دینز. مکرکه مؤنث حقیقی اوله. اول حالده مطابقته رعایت اولنه بیلور. نته که: مشهوره قیز و مکاره قاری دینلور.

وبرده موصو فلر ادات ترکیه یه متصل یا خود صفتلر خبر اولد قده مطابقت ارا نماز. مثلاً: نیتی فاسد، مطالعه سی سقیم بر آدم، یا خود بونیت فاسد در، و بو مطالعه سقیمدر دینلور. فاسده و سقیمه دینلور. فقط ارباب صک بو مثللو مقابلرده دخی مطابقته رعایت ایدره ک مثلاً: دعواسی مسموعه اولور و بودعوی مسموعه در دیرلر.

بعضاً عربجه نك ترکیب وصفیسی تغییر اولنمه سزین استعمال اولنور. شهر ربیع الاول، شهر ربیع الآخر کبی. بو صورتده تاء تأییدلر ها صورتنده یازیلور. ولیة النعم، کریمه الشیم، مستجابة الدعوه، سالفه الذکر کبی.

عربی اسم عددلر بعضاً صفت مقامنده قوللانیلورلر. قلاع اربعه کبی که در تلك ایله متصف قلعه لر دیو تأویل اولنور. ارباع ثلثه و اخماس اربعه دخی بو قیلدندر.

فصل ثالث

تذیه و جمع عربی حقنده در.

لسان عثمانیده مستعمل اولان اسماء عربیه بعضاً قاعده عربیه

اوزره جعلنور. فقط عربیده اقل جمع اوچدر. ایکی فردایچون
تئیه صیغه سی قوللانیلور وایکیدن زیاده سی ایچون جمع قلنور.
فارسی جعلرنده اولدینی کبی اسمک آخرینه الف ایله نون،
یاخود یاءساکنه ایله نون کتورلدکده تئیه اولور: ثلثان وثلثین
کبی که ایکی ثلث دیمکدر. لسان عثمانیده اکثریا بویله یا ایله استعمال
اولنور: مشیرین، دولتین، سنتین کبی

صفتلر دخی بوجهله تئیه قلنور واصلول عربیه اوزره
صفتک کیت افرادجه دخی موصوفه مطابقتی لازم اولدیفندن
موصوف تئیه ایسه صفت دخی تئیه قلنور: صدرین محترمین
ودولتین فحیمتین کبی.

عربجه جعلرک اوچ صیغه سی وارددر. بری جمع مذکر سالم،
دیگری جمع مؤنث سالم و اوچنجیسی جمع مکسر صیغه لریدر. کرک
اسملر، کرک صفتلر بواوچ وجهله جعلنور. صورت تصریفلری
بروجه آتی بیان اولنور:

مفرد مذکر آخرینه نون ایله واو، یاخود یاعلاوه اولندقدده
جمع مذکر سالم اولور: مشیرون، مشیرین کبی که ایکیدن زیاده
مشیردیمکدر. بوایکنجیسی رسم خطده تئیه بکزر. آنجوق مفردک
آخری تئیه سنده مفتوح و جعنده مکسور اوقونقله تفریق اولنور.
بوصیغه ذوی العقولک مذکر لرینه مخصوصدر. فقط شاذ اوله رق
سنه نك جعنده سنین و عالمک جمیده عالمن دینور.

مفرد مؤنثك تاء تأنيثی حذف اولندقدن صكره الف وتا الحاق
اولندقدنه جمع مؤنث سالم اولور: عتبه، عتبات، عنایت، عنایات،
عشره، عشرات كبی، اكر كلمه نك آخرنده الف بولور ایسه واوه
قلب اولور: ادات وادوات، قنات و قنوات كبی .

مؤنث سماعیلر دخی بوصورتله جعلنور : ذراع، ذراعات
وكأس، كاسات كبی .

صفتلرك جمع سالملى دخی بومنوال اوزره كلور . نته كه :
حسنك جمع مذكر سالمده حسنون وجمع مؤنث سالمنده حسنات
دینلور . اما جمع مكسر كرك اسم اولسون ، كرك صفت اولسون
مطررد دكلدر . فقط اكثریت اوزره مستعمل اولان صیغه لری
ذیل كتابك آلتنجی فصلنده بیان اولنه جقدر .

قاعده عربیه اوزره موصوف جمع اولور ایسه صفتك دخی
آكامطابقی لازمدر . اهل فرس بوكا اعتبار ایتمز . مثلاً : اوصاف
جیل ، اعمال صالح ، علمای معتبر ، دیرلر . اما ادبای عثمانیه بوبابده
قاعده عربیه اوزره مطابقته رعایت ایدرلر . شویله كه : موصوف
جمع مذكر سالم ایسه صفتی دخی جمع مذكر سالم ، یاخود جمع
مكسر صیغه سی اوزره كلور . معلمین کاملین و مدرسین کرام كبی .
موصوف اكر جمع مؤنث سالم ایسه صفتی دخی جمع مؤنث سالم
اولور : صلوات زاکیات كبی .

جمع برجاعت اولقی ملابسہ سیله عربیده جعلر مؤنث لفظی

حکمنده اولدیفندن بوسورتده صفتلر اکثراً مفرد مؤنث صیغه سیله کتوریلور . مثلاً: صلوات زاکیه دینلور . موصوف اکر جمع مکسر ایسه ، ذوی العقولدن اولدینی تقدیرده ، صفتی دخی جمع مکسر ، یاخود جمع مذکر سالم ویاخود مفرد مؤنث اولور . موالی فحام ، علمای عاملین واطبای مشهوره کبی .

اما ذوی العقولدن اولدینی حالده صفت اکثراً مفرد مؤنث و بعضاً جمع مکسر اولور . امور مهمه ، مواد مشکله ، اعمال صالحه ، مسائل شتی کبی . بعضاً موصوفلر مقدر اولور : داخلیه ، خارجیه ، مالیه کبی که امور داخلیه ، امور خارجیه ، امور مانیه دیمکدر . كذلك طریق علمیه ، طریق کبار علمیه وطریق سیفیه ، طریق امرای سیفیه وطریق قلمیه ، طریق رجال قلمیه دیمک اولور .

تنبیه — باب ثالثه مندرج ضابطه حکمنجه ترکی استملر اصوله عربیه اوزره جملنه مزملر . فقط شاذ اوله رق چفتلکات قولالانیلور .

تتمل راجع

ضمائر عربیه حقه ده در .

نسان عربیده (هو) مفرد مذکر غائب ضمیریدر ، لسان

عثمانیده بعضاً ندا مقامنده، یا هودینلور و بعضاً هو، هوه سنه دینور، عینی عیننه دیمک اولور. (هو) لفظی برکمه یه متصل اولدقده و اوی حذف اوله رق (ه) قالور و اکثر مواقعده مضموم اوقنور: بعده، و قدس سره، و رجه الله کبی. فقط اوست طرفنده کسره، یا خود یا حرفی بولنور ایسه کسره ایله اوقنور: بعینه، بطبقه، بمسطره، بتمامه، و رجه الله علیه عباره لرنده اولدینی کبی.

اشبو (ه) ضمیرینک مفرد مؤنثی (ها) وایکسینک دخی تنیه سی (هما) و جمع مذکر لری (هم) لفظلریدر. و جمع مؤنثی اولان (ها) قولانیلور. مفرد مؤنثک هاسی الفه متصل اولدیفندن دائماً فتح ایله اوقنور. اما هما وهم ضمیرلرنده کی هالرك حرکه لری (ه) ضمیرینک حرکه سی کبی ماقبلنه تابع اولور. نته که: قدس سرهما، و رجهما الله، و قدس سرهم، و رجهم الله عباره لرنده هالر ضم ایله و رجه الله علیهما، و رجه الله علیهم، عباره لرنده کسره ایله اوقنور.

بو ضمیرلر لسان عثمانیده بعضاً (الی) حرفنه منضم وایما اولنمش معناسنه مومی، و اشارت اولنمش معناسنه مشار کله لرینه ملحق اوله رق (سالف الذکر) مقامنده قولانیلورلر. نته که: میرمومی الیه، مشیر مشار الیه، صدرین مشار الیهما، و زرای مشار الیه، سلطان مشار الیه، سلاطین مشار الیهما دینلور.

افندی لفظی بو مقامده مفرد و تنیه و جمع مقامنده قولانیلور

وذكرى سبق ایدن افندی بر ایسه افندی مومی الیه ، وایکی
ایسه افندی مومی الیهما ، و زیاده ایسه ، افندی مومی الیه
دینلور . و میر و پاشا لفظلری دخی بوقیلدن اولوب میر مومی الیه ،
میر مومی الیهما ، میر مومی الیه و كذلك پاشای مشار الیه ، پاشای
مشار الیهما ، و پاشای مشار الیه دینلور .

فصل هفتم

افعال عربیه بیانده در .

عربینک ذات فعللری اسان عثمانیده مستعمل دکلدرد : فقط
بعضاً عباره آره سنده وارد اولورلر . اما مصدرلری و فرع
فعللری کثیر الاستعمالدر .

عربی فعللر اولاً ثلاثی و رباعی دیوایکی قسمه تقسیم اولورلر .
رباعی نادر الاستعمالدر : زلزله کبی .

ثلاثی دخی مجرد و مزید فیه دیوایکی قسمه تقسیم اولور .
ثلاثی مجرد ماده اصلیه سی اوچ حرفلی اولوب حرف زائد
بولقیان فعللردر . ثلاثی مزید فیه اصلی اوچ حرفلی اولدینی
حاله حرف زائد بولنان فعللردر .

ثلاثی مجردک مصدرلری سماعیدر .

لسان عثمانیده مستعمل اولان صیغه لرینک مثاللری بروجہ
آتی بیان اولور :

قتل	فسق	شغل	طلب	صفر
سلام	قیام	سؤال	قبول	دخول
امان	حرمان	خسران	دعوی	شوری
رحمت	رفعت	نصرت	غلبه	سعادت
درایت	سهولت	مرحمت	محبت	

سلام و قبول امثالک الف و واولری ولمان امثالک الف و نونلری و بعضیلرینک اولنده کی میلر هپ حروف زائد: در . دعوی امثالک آخرنده کی الف مقصوره ایله دیکرلرینک آخرنده کی تالر دخی علامت تأنیثدر . جمله سنک ماده اصلیه سی اوچ حرفدر . هپ فعللر و فرع فعللر بونلردن مشتق اوله رق حروف اصلیه سی اعتباریله تصریف اولنور .

آخرنده حرف علت یعنی واو ، یاخود یا اولوبده سلام ، قیام ، سؤال وزنلری اوزره کلان کلمه لرده واو ویا همزه یه قلب اولنور : صفوتدن صفاء ، خفیه دن خفاء کبی . یوقارولرده بیان اولندیغی اوزره بوهمزه لر لسان عثمانیده اکثریا اسقاط اولنور . مدخل و مولد صیغه لری مصدر ایله اسم زمان اسم مکان بیننده مشترکدر .

مصدر اسم آلت صیغه سیدر . مفتاح دخی اسم آلتدر . فقط بوسیغه بعضاً اسم مکان اولور : میقات کبی و بعضاً اسم زمان اولور : میلاد کبی . میلاد ولادتدن مشتقددر . فقط ماقبلی مکسور اولان

واولرك يايه انقلابي قاعده مطرده اولديغندن بونك واوي دخى يايه
منقلب اولمشدر زمان ولادت ديمكدر . فقط بوكلمه عيسى عليه
الصلاة والسلامك زمان ولادتلرنده ومولد دخى محمد عليه الصلاة
والسلام حضرتلرينك زمان ولادتلرنده عرف اولمشدر .

ثلاثى مجردلرك اسم فاعللى (فاعل) واسم مفعوللى (مفعول)
وزننده كلور : مدحن ، مادح وممدوح ، وكتابتدن ، كاتب
ومكتوب كبي .

ماده اصليله نك ايكنجى واوچنجى حرفلى برجىسدن
بولنور ياخود ايكنجى ويا اوچنجى حرفلى حرف علت اولور
ايسه ادغام يا اعلال ايله اسم فاعل واسم مفعول صيغه لرينه تغير
كلور . بونلرك مصدر لريله برابر برر مثالى بروجه آتى ايراد اولنور :

مصدر	اسم فاعل	اسم مفعول
دلالت	دال	مدلول
قول	قائل	مقول
بيع	بايع	مبيع
دعوت	داعى	مدعو
رمى	راى	مرمى

دال ، مدعو ومرمى كبي حرف اخيرى مشدد اولان كلمه لر
لسان عثمانيده اكثر يا مخفف اوله رق تلفظ اولنور . نته كه يوقارولرده
سبقت ايلمشدر .

مصدر لر بعضاً اسم فاعل معناسنه اولور ، تمام اولدی کبی که
تام اولدی دیمکدر . بعضاً اسم مفعول معناسنه اولور . خلق .
کبی که مخلوق دیمکدر . لکن بونلر سماعیدر .

اسم فاعل واسم مفعول لر تا علاوه سیله مؤنث اولور لر . کاتبه ،
مکتوبه ، داله ، مدلوله ، داعیه ، مدعوه ، رامیه ، مرهیه کبی .
وسائر صفتلر کبی تننیه قیلنور لر . کاتبین مکتوبین کبی وجع
مذکر وجع مؤنث سالمیری کلور : کاتبون ، کاتبات ؛ مغدورون ،
مغدورات کبی .

داعی ورامی کبی آخر لر نده یاء ممدوده اولانلرک جمع مذکر
سالمیرنده بویا حذفی اولنور وداعین ورامین دینلور .

اسم فاعلک جمع مکسرلری بعضاً حرف اولک ضمی و حرف
ثانینک فتح و تشدید ایله (کمل) صیغه سی اوزره کلور و بعضاً
فواعل وزنی اوزره کلور : خارق ، خوارق ، حادثه ، حوادث
کبی . و بعضاً فمحتین ایله (کتبه) وزنی اوزره کلور . فقط آخری
واو ، یا خود یا اولور ایسه الفه قلب اولنهرق فانک ضمیمه
(غذات) و (رمات) صیغه سی اوزره کلور . و بعضاً حرف
اولک ضمی و حرف ثانینک تشدید ایله (جهال) صیغه سی
اوزره کلور . و بوصیغه نک حرف اولی مفتوح قلنور ایسه مبالغه
اسم فاعل اولور : کذاب کبی که زیاده کاذب دیمکدر .

اهل حرف و صنایعک اسملری دخی اکثراً بوصیغه اوزره
کلور : حال ، حداد ، عطار کی .

مبالغه اسم فاعل بعضاً (علامه) و حرف اولك كسرى
و حرف ثانينك تشديدى ايله (صديق) و بعضاً كسر ميم ايله
(مكثير) و بعضاً (فاروق) صيغه لرى اوزره دخى كلور .
بونلر دخى اسم فاعلار كې تثنيه و جمع قىلنورلر . فقط علامه نك
جمع مذكر سالمى كلز .

فعل و فاعل صيغه لرى مبالغه اسم فاعل ايله صفت مشبهه
بيننده مشتركدر . نته كه : زياده عالم معناسنه علم ، و زياده كلاتم
معناسنه كتوم دىنلور . شريف و وقور ايسه صفت مشبهه در .
صفت مشبهه صيغه لرى سماعيدر . آنلر دخى اسم فاعلار كې
تأنيث و تثنيه و جمع قىلنورلر . و جمع مكسر لرى دخى كلور . فقط
مطرد دكللردر . كثير الاستعمال اولنلر ك مثاللرى ذيل كتابك
آلتنجى فصلنده بيان اولنور .

افعل صيغه سى صفت مشبهه ايله اسم تفضيل بيننده مشتركدر
مثلا : اجر . قرمنى دىك اولوب صفت مشبهه در و افضل اسم
تفضيلدر . اسم تفضيل ايكي وجهله استعمال اولنور : يامضاف اولور .
آنلر ك افضل دىنلديكى كې كه آنلر ك اك فاضلى دىك اولور .
ياخود (دن) حرفندن صكره كلور : بو آنندن افضلدر . دىنلديكى
كې كه بو آنندن ده فاضلدر دىك اولور .

ماده اصله سنك حرف اخرى واو ، ياخود يا اولان كلمه لرك
اسم تفضيل (اقوى) صيغه سى اوزره كلور . آنلر ك اقواسى بودر
ياخود بو آنندن اقوادر دىنلور .

اسم تفضیلک مؤثی حرف اولک ضمی و ثانینک سکونی ایله
(فعلی) کلور . وجع سالم صیغه لر ی اوزره جملنور . و مذکرینک
جمع مکسری افاعل و مؤثنک جمع مکسری فانک ضمی و عینک
فتحی ایله (فعل) وزنی اوزره کلور . صورت تصریفی بوجله در:

افضل	افضلان	افضلون	افاضل
فضلی	فضلیان	فضلیات	فضل

ثلاثینک مزید فیهلرینه کلنجه ذکر اولنان ثلاثی مجردلرک جوهر
اصلیه لرینه بعض حروفک علاوه سیله برطاقم صیغه لر پیدا اولور .
اشته بونلره ثلاثی مزید فیه دینلور . بونلردن طقوز بابنک مصدرلری
و فرع فعللری اسان عثمانیده استعمال اولنمغله بوجه آتی بیان
اولنورلر . شویله که . حروف اصوله فاء ، عین ، لام حرفلری مقابل
طوتیلهرق وزائد اولان حرفلر عیناً کوستریله رک وزنلری تصریف
قیلنور .

(افعال) . — همزه سی مکسوردر . اکثریا لازم لری متعدی قیلار .
ایشتمک معناسنه اولان سمعدن ایشتدیرمک معناسنه اولان اسماع
کبی . کله نک حرف اولی (واو) یا خود (همزه) اولورایسه یایه
قلب اولنورلر ، وجوبدن ایجاب اجرتدن ایجار کبی . و حرف
ثانیسی واو یا خود یا اولورسه حذف اولنهرق آخرینه تاء تأنیث
کتوریلور ، عودتدن اعاده و میلدن اماله کبی .

(تفعیل) . — فتح تا ایله اولوب بودخی اکثریا لازمی متعدی

قیلار: تکمیل کبی. و بعضاً بوبابك مصدری (تفعله) وزنی اوزره کلور: تکمیل کبی. وکله مضائف یعنی عین ولایمی برجنسندن اولدیفی حالده ادغام اولنور تته کبی. حرف اخیری واو، یاخود یا ویاخود همزه اولان ماده لرك مصدری دائماً اشبو وزن ثانی اوزره کلور. وواوی یایه قلب اولنور صفوتدن تصفییه، رضادن ترضیه، برؤدن تبرئه کبی. همزه نك یایه قلیلیه تبریه دینلک دخی جائز اولور.

(مفاعله). — میك ضمی وعینك فتحی ایله اولوب باب خامسك فصل نانیسنده بیان اولاندیفی اوزره اثنین بیننده مشارکت ایچوندر: مجادله کبی و بعضاً کسر فایله فعال وزنی اوزره کلور: جدال کبی. و ماده اصلییه نك حرف اخیری واو یاخود یا اولور ایسه الفه قلب اولنور لر. مکافات و مجازات کبی واکر مضاف اولور ایسه ادغام اولنور. مضاده کبی.

(انفعال). — همزه نك وتانك کسر لری وفانك سکونی ایله اولوب بناسی مطاوعت ایچوندر و دائماً فعل لازم اولور. کسردن انکسار کبی.

(افعال). — همزه نك وتانك کسر لری وفانك سکونی ایله اکثریا مطاوعت ایچوندر. جعدن اجتماع کبی و بعضاً تاسی داله قلب اولنور: زوجدن ازدواج و دعوا دن ادعا کبی. و ماده اصلییه نك اولی واو یاخود یا اولور ایسه تابه قلب ایله ادغام اولنور: وسمدن اتسام کبی.

(تفعّل) — تا وفانك قتمی وعینك ضمی و تشدیدى ايله اكثرثیا تفعیلك مطاوعی اولور، تعلیم و تعلم کبی و باب خامسك فصل نایدسنده بیان اولندیغی اوزره بعضاً تکلف ایچون کلور و حرف اخیری یا اولور ایسه ماقبلی مکسور قلنهرق مد اولنور: وقایه دن توقی کبی واکر و او اولور ایسه یایه قلب و كذلك ماقبلی مکسور قیلنور: ترجی کبی .

(تفاعل) — تانك قتمی وعینك ضمی ايله در. باب خامسك فصل نایدسنده بیان اولندیغی اوزره بونك بناسی اشتراك ایچوندر و بعضاً نفس الامرده اولیان حالی اظهار ایچون اولور . و آخری و او یاخود یا اولور ایسه، ترضی و زنی اوزره کلور و مضاعف اولور ایسه تضاد کبی ادغام اولنور .

(افعال) — همزه وعینك کسری وفانك سکونی و حرف اخیرك تکراری ايله اولوب دائماً لازم اولور : احرار و اعوجاج کبی . (استفعال) — همزه و تانك کسری وسین وفانك سکونی ايله اکثریاسؤال و طلب ایچوندر : مدد ایستمك معناسنه استمداد کبی . و باب خامسده بیان اولندیغی اوزره بعضاً عد ایلک معناسنی متضمن اولور : استکثار کبی که چوق کورمك دیمکدر . ماده اصلیه نك حرف اولی و او یاخود همزه اولور ایسه یایه قلب اولنور . وجوبدن، استیجاب و اجرتدن استیجار کبی واکر ایکنجی حرفی و او یاخود یا اولور ایسه حذف اولنهرق آخرینه تاء تأنیث کتوریلور : استفاده کبی .

قاعمره . — افعال ، انفعال ، افتعال ، استفعال صیغہ لرندہ کلمہ نك حرف اخیری و او یا خود یا او اور ایسه همزه یه قلب اولنور . وصفاء ، خفا قیلندن اوله رق لسان عثمانیده بو همزه لر اکثر احوالده ساقط اولور : افتا ، انقضا ، اقتضا ، استثنا کی ، کلمہ شمدی مذکور مزید فیہ اولان صیغہ لرک اسم فاعلرینه :

مذکور طقوز بادن کلان اسم فاعلرک اولی هپ میم مضمومه در . و (فا) افعال ، افتعال ، افعلال ، استفعال صیغہ لرندہ ساکن و دیگر لرندہ مفتوح در و (عین) جله سنده مکسور در و بونکله برابر تفعیل و تفعیل بابرندہ مشدد در . و افعلال باینده لام یعنی حرف اخیر مکرر اولمغله ادغام اولندیغدن کسره ظاهر اولماز . و زنلری بروجه آتی علی الترتیب ایراد اولنور :

مفعول	مفعول	مفاعل	منفعل	مقتعل
متفعل	متفاعل	مفعل	مستفعل	

افعال صیغہ سنک فارسی یعنی حروف اصولدن حرف اولی یا اولان ماده لرک اسم فاعلرندہ بویا واوه قلب اولنور . نته که : یسردن مشتق اولان ایسارک اسم فاعلی موسر کلور . و عینی یا اولوبده ماقبلی ساکن اولان اسم فاعلرندہ حرکه سی ماقبلنه نقل ایله مد اولنور و واو او اور ایسه یایه قلب اولنه رق ینه بو وجهله معامله ایدیاور . اماله دن ، میمل و اعاده دن معید و استفاده دن مستفید کی .

وعینی واو یاخود یا اولوب ماقبلی مفتوح اولور ایسه ،
ایکیسی دخی الفه قلب اولنور لر : منقاد و مختار کبی . ولامی واو
اولور ایسه یایه قلب ویا کبی مد اولنور : مفتی ، مغنی ، مسوی ،
مساوی ، منقضى ، مقتضى ، متمنى ، متساوی مستقى کبی . واکر
کله مضاف اولور ایسه یعنی عین ولامی برجنسدن بولنور ایسه
افعال ، مفاعله ، انفعال ، افتعال ، تفاعل ، استفعال بابلرینک اسم
فاعلرنده ادغام اولنور .

امداددن ، حمد ، مضاده دن ، مضاد ، انسداددن ، منسد ،
اشتداددن ، مشتد ، تضاددن ، متضاد ، استمداددن ، مستد کبی .

اشبو مزید فیه اولان اسم فاعل وزنلرینک عینی مفتوح
قیلندقدده اسم مفعول اولور و آخری یاخود ماقبلی یا ایسه الفه
تبدیل اولنور . مفتی ، مفتا ، مقتضى ، مقتضا ، متمنى ، متنا مفید ،
مفاد ، مستفید ، استفاد کبی . بویله متمنا و مستثنا کبی اسم مفعوللرک
آخرندکی الفلر قاعدۀ عربیه اوزره یایله یازیلور لر . فقط یوقاروده
بیان ایتدیکمز وجهله لسان عثمانیده بولر اکثریا الف ایله
یازیلور . مزیداتده اسم مفعول صیغه سی اسم زمان واسم مکان ایله
مشتکر کدر . مثلاً : میک ضمی و رانک فتحی ایله مخرج لفظی
هم اسم مفعول ، هم اسم زمان و مکان اولور وقریندلر ایله فرق
وتمیز اولنور .

فأمره . — لسان فارسیده بعضاً عن قریب ، وان شالله کبی عربی

ترکیبلر عینیلہ استعمال اولنور. فقط بعض حروف یکدیگرہ متصل یازیلور: عنقریب وانشاءالله کبی. لسان ترکیده دخی بویله، عربی ترکیبلری قوللانیلور. ازجمله انشاءالله پک چوق قوللانیلور. فقط تمنی و آرزو مقامنده ایراد اولنور.

ذیل کتاب

فصل اول

همزه نك املاسی حقنده در.

(ء) اشارتی عربی کلمه لرده قوللانیلور. شویله که : کلمه لرله وسطنده واقع اولان همزه ساکن اولدقده اکر ماقبلی مفتوح ایسه الف ایله یازیلوب اوزرینه همزه اشارتی وضع اولنور: مأمور کبی. واکر مکسور ایسه بردندان یازیلوب کذلک اوزرینه همزه قونور: بئر کبی. واکر مضموم ایسه واو یازیلوب اوزرینه همزه قونیلور: مؤمن کبی. کلمه نك وسطنده متحرک اولدینی صورتده ماقبلی مضموم ایسه کذلک واو یازیلوب اوزرینه همزه قونور: سؤال، مؤجل کبی واکر مفتوح، یا مکسور، یا خود حرف مد و یا ساکن ساکن حرف اولور ایسه بردندان یازیلوب اوزرینه همزه قونور: سئله، فته سائل، قائل، اسئله مسؤل کبی، مائه وامرائه کلمه لرلی شاذدر.

کلمه نك آخرند، واقع اولوبده ماقبلی مفتوح ایسه الف ایله یازیلوب اوزرینه همزه وضع اولنور : منشأ ، وملجأ کې . اکر ادوات ترکیه دن برینه متصل اولور ایسه دندان یازیلوب اوزرینه همزه قونور : منشی، منشئ کې . اکر ماقبلی ساکن ایسه یالکز همزه اشارتی یازیلور : شیء، جزء کې . اما ادوات دن برینه متصل اولور ایسه دندان ایله یازیلور : شیئی ، جزئی ، شیئك ، جزئك کې . فقط بدأ لفظی الف ایله وبرؤ لفظی واو ایله یازیلور، بعضاً جزؤ دخی بویله واو ایله قولانیلور . لکن برشیئه متصل اولدقلری حالده دندان ایله یازیلورلر : بدئی، برئی کې . اکثریا شیء لفظنك همزه سی تلفظدن وکتابدن اسقاط اولنهرق شیء، شیلر، شیدن دینلور .

ترکیب اضافی و ترکیب وصفی فصللرنده بیان اولندیغی اوزره بوهمزه اشارتی بعض تراکیب فارسیده دخی استعمال اولنور .



فصل ثانی

مؤکده صفتلرک امثله مشهوره سی

آپ آچیق، اوپ اوزون، آپ آکسیر، اپ ایو، چپ چوره، سیپ سیوری، صاپ صاری، صاپ صاعلام، طوپ طولو، قاپ قره قپ قمرنی، قپ قیزل، قوب قوری، بس بتون، بس بلو، بوس

بولانیق، باس بیاغی، تاس تمام، طوس طوغری، قاس قاتی، قیس
قیوراق، موس مور، ماس ماوی، یوس یوارلاق . بام بشقه، بوم
بوش، بم بیاض، چام چارشو، خام خللط، دیم دیک، سیم سیاه،
صیم صیتی، طام طاقر، گوم گوک، یم یشیل، یام یاصی. شاذ اوله رق،
چرچپلاق، وصر صقلام را ایله کلمشدر. (آگسز) ک کافی نون
کبی تلفظ اولندیغندن پک چوق ذوات آنی نون ایله یازارلر.
بعضاً ادات تأکید وصل و تخفیف ایله آپانسز یازیلور. لکن
فی الاصل ذکر ویاد وفهم معناسنه اولان (آک) صاغر کاف ایله در.
اپ ایو دخی بعضاً وصل و تخفیف ایله اپیو یازیلور. اکثریا
بس بتون و بعضاً بس بللو دخی متصل اوله رق بسبتون و بسبللو
یازیلور. آغر حرکه لو اولان صفتلرک سینی دخی بعضاً صاد ایله
یازیلور: باص بیاغی و قیص قیوراق کبی .



فصل ثالث

مصادر ترکیه سماعیه حقننده در.

ثنائی

اوپمک	آتمق	ایتمک	اوتمک	اوتمک
آچق	آجیمق	ایچمک	اوچق	آرامق
اوده مک	اریمک	آرامق	ایرمک	اورمک

اوره مك	اورمق	ازمك	آزمق	اوزمك
اوزامق	اسمك	اشمك	آشمق	اوشمك
اوشومك	آسمق	آغمق	اوغمق	آقمق
اوقومق	اكمك	آكمق	اوكك	الدمك
آلمق	اولمك	اولمق	اولومق	امك
اوعمق	اينك	اويغق	اويومق	بيتمك
بيچمك	بودامق	بورومك	بورمق	بزمك
بزه مك	بوزمك	پنشمك	بوشامق	باشمق
بوغمق	باقق	بيقمق	بوكك	بيلك
بيله مك	بولمك	بولمق	بولامق	باتمق
بينك	بونامق	بيومك	بويامق	تونمك
توره مك	چورومك	چيزمك	چوزمك	چاقق
چيقمق	چكمك	چوكك	چلك	چالمق
جايغق	دپمك	ديتمك	ديرمك	ديره مك
دورمك	ديزمك	دوزمك	دشمك	ديشه مك
دوشمك	دوشه مك	دگمك	ديگمك	دوكك
دوگمك	دلمك	ديلمك	ديله مك	دنه مك
ديغمك	سچمك	سرمك	سورمك	سوريك
سزمك	سوزمك	سوسمك	سوكك	سوكك
سيلك	سينك	سوزمك	سونمك	سومك

صاچق	صاتمق	صاچق	شیشمک	شاشمق
صاغق	صوصق	صیزمق	صورمق	صارمق
صوقق	صیقمق	صوغومق	صیغامق	صیغمق
صینامق	صانعق	صولومق	صولمق	صالمق
صویمق	صایمق	صیوامق	صاومق	صونمق
طاشمق	طرامق	طوتمق	طاتمق	طاچق
طیقامق	طیقمق	طاقق	طوغمق	طاشیق
طولمق	طالامق	طالمق	طوکمق	طوقومق
	طویمق	طیامق	طینق	طولامق
	قاتمق	قویمق	قپامق	قایمق
	قورمق	قیرمق	قوجامق	قاچق
قیزمق	قازیق	قازمق	قورومق	قوریمق
قوصمق	قیصمق	قاصمق	قوشمق	قاشیق
قیلق	قالق	قوقق	قاقق	قوغمق
کچمک	کوتمک	کیتمک	قانامق	قاتمق
	کورمک	کیرمک	کرمک	کوچک
	کلمک	کوسمک	کسمک	گزمک
یاچق	ویرمک	کیمک	کوممک	کولمک
یرمک	یدمک	یوتمق	یاتمق	یتمک
یوزمک	یورمق	یوریمک	یارامق	یارمق

ياشامق	ياغىق	يىغمىق	ياققى	يىقىمىق	يىقامىق
يىكمىك	يالامىق	يوىمىق	يوىغىق	يىقىمىق	يىقامىق
		ئىلاىى			
آبانىق	آپشىمىق	اوتورمىق	اوتانىق	آجىمىق	
اوقشامىق	آزىغىق	اورتىمىك	اورىمىك	اىستىمىك	
اسكىمىك	اسنىمىك	اىشىمىك	اشىلەمىك	اىصرىمىق	
اىسلامىق	اوصانىق	آغرىمىق	اوغرامىق	آغلامىق	
اوكورمىك	اكشىمىك	اوكلقى	اولچىمىك		
اىلشىمىك	اولشىمىك	اونوتىمىق	اىنجىمىك	اىنانىق	
آوتىمىق	آىرمىق	اىلەمىك	اوينامىق	اويانىق	
بجرىمىك	باداشمىق	براقىق	برىكمىك	پورصومىق	
بىلەمىك	باشارىمىق	بىكزەمىك	بىكلەمىك	يىكىنكىمىك	
بالەمىك	بىورىمىق	تترەمىك	توكورىمىك		
چابالامىق	چارپىمىق	چىرىمىق	چىكىنەمىك	چاقىق	
چىنىمىك	چوورىمىك	دوشونىمىك	دىكلەمىك	زبارمىق	
سپورىمىك	سرىمىك	سىلكىمىك	سىوشىمىك	سويلەمىك	
شمارمىق	ساتاشمىق	صىچىرامىق	صىرىتمىق	صارىمىق	
صارمىق	ساقلامىق	ساقنىمىق	ساللامىق	سواشمىق	
سىرىمىق	طادانىق	طارنىمىق	طاسلامىق	طاغنىمىق	
طوغىرامىق	طوقنىمىق	طاملامىق	قوچنىمىق	قودرىمىق	

قور تارمق	قازانمق	قاغشامق	قاگرمق	قالقمق
قاشمق	قالقمق	قاورامق	قبورمق	قاوشمق
قايرمق	قاينامق	کيرمک	کچيکمک	کرتک
کوزوکک	کوزتمک	کيزله مک	کوسونک	کيشنه مک
ککرمک	کوکره مک	کوککک	کولشمک	کوره مک
کوشه مک	کوهله مک	پيرامق	يرتمق	يورمق
يوغرمق	يومشامق			

رباعی

اور پرمک	اورسه له مک	ايرغلامق	ايرکک
اسرکه مک	آق تارمق	آق سرمق	ايکرتک
اوکسورمک	ايمرتک	آيارتمق	بوروقلمق
پوسکورمک	باغشلامق	تتسنمک	
توسکورمک	طاسارلامق	طاسملامق	تکرله مک
چيلديرمق	چيرتمک	ديوشرمک	صرتارمق
صايقلامق	طيرمالامق	طيقسيمق	طاورانمق
زمت	قورجا لامق	قيصقانمق	قولانمق
کوندرمک	هايقرمق	يادرغامق	يلتمک
يالوارمق	يوارلامق		

فصل رابع

فارسی امر حاضر لره دائر در .

فارسی امر حاضر لر ايله اسم مفعول لر دن ياپيلان وصف
ترکيلردن لسان عثمانیده مستعمل اولانلرک برر مشالی بروجہ
آتی ترجمہ سيله برابر تحریر اولنور :

دل آرا مخفی اولان (دلارا) کوکل بزہ یچی .- (خون آشام)
قان ایچیچی .- دل آور مخفی (دلاور) کوکل کتور یچی یعنی جنگاور
وجنک اہلی .- دل آویز مخفی (دلاویز) کوکل آصیچی کہ معشوقدن
کنایہ در .- (دل افروز) و (دلفروز) کوکل پارلا دیچی .- (فرح افزا)
و (فرح فزا) فرح آرتیر یچی .- (جهان آفرین) جهانی یارادن .-
(فتنہ انکیز) فتنہ قالدیران .- (دروغ آمیز) یالان قاریشان .-
(ادب آموز) ادب اوکرتن .- (کوهر بار) کوهر یاغدییران .-
(قارباز) قار اوینایان .- (پیرایہ بخش) و (پیرایہ بخشا) زینت
باغشلا یان یعنی ویرن .- (دلبر) کوکل کوتورن .- (دلپذیر) مقبول
القلب و مطبوع و مرغوب .- (خود پسند) کندینی بکنمش اولان .-
(پای بند) ایاغی باغلا یان .- (جهان پیرا) جهانی تزیین ایدن .-
(دور بین) اوزاغی کورن .- (دشت پیا) اوه اولچیچی .- (جهانتاب)
جهانی پارلادان .- (وظیفہ خوار) وظیفہ ییچی .- (خوشکو)
خوش سويلیچی .- (مولد خوان) مولد او قویچی .- (جانخراش)
جانی طر مالیان .- (سحر خیز) سحر وقتی قالقچی .- (دلدار)

کوکلی طوتان .. (قدردان) قدر ییلمی .. (دلربا) کوکل قایلمی ..
 (فریادرس) فریاده ایریش .. (مدرسسان) مدد ایریشدیرن ..
 (خاکروب) طوپراق سپورن .. (دلساز) کوکل یایلمی .. (سرمه سا)
 سرمه سورن .. (دلسوز) کوکل یایلمی .. (دلشکن) کوکل
 قیریلمی .. (قدرشناس) قدر آکلایلمی .. (جفاکش) جفا چکیلمی ..
 (دلکش) کوکل آچیلیم .. (رومال) یوز سورن .. (مدرسه نشین)
 مدرسه ده اوتوران .. (رهنا) یول کوستریلمی .. (دلنواز) کوکل
 اوقشایلمی .. (وقعه نویس) وقعه یازیلمی .



فصل هفاس

مؤنث سماعیلر حقنده در .

لسان عربیده مؤنث سماعی یتمش یدی اسمدر وایکی قسمدر .
 بری دائما مؤنث اعتبار اولنور . دیکرینک تذکیر و تأنیثی جائز
 اولور . بونلردن لسان عثمانیده آزچوق مستعمل اولنلر بروجه
 آتی قرق یدیدر :

دائما مؤنث اعتبار اولنالر :

نفس ، عین ، اذن ، ید ، کف ، ملح ، ذهب ، اصبع ،
 ذراع ، فخذ ، ساق ، قدم ، اهل ، عین ، شمال ، شمس ،
 ارض ، ینبع ، بئر ، دلو ، دار ، کأس ، خمر ، نار ،

ججیم ، جهنم ، عترب ، عنكبوت ، عصا ، قوس ، درع ،
حرب ، فرس ، نعل ، ریح ، صبا ، فردوس .

تذکیر و تأییدی جائز اولانلر :

عنق ، لسان ، سما ، قضا ، سییل ، طریق ، سلاح ، سکین ، حال ، مسک ،

مؤنث سماءیلرده علامت تأیید مقدر اولوب قاعدۀ عربیه
اوزره تصغیرلرنده ظاهر اولور . مثلاً : عین ، کوز ، واذن
قولاق معناسنه اولوب مصغرلری عینه واذینه درکه کوزجکز
وقولاقجکز دیمکدر .



باب سادس

جمع مکسرلر حقنه ددر

ثلاثی اسملرک جمعلری . — حرف اولی ، مفتوح و حرف

تأییدی ساکن اولان اسملرک جمعلری اکثریا ضم فا ایله فعول
صیغه سی اوزره کلور : سمت سموت ، قبر ، قبور ، فصل ، فصول ،
الف ، الوف و او طه معناسنه بیت ، بیوت کبی و بعضاً فتح همزه
ایله افعال صیغه سی اوزره کلور : ثوب ، اثواب و شعرده مستعمل
اولان بیت ، ابیات کبی .

ارضك جي اراضی ڪلور. وياڻڪ ڄمندی ابواب، وٽاج ایلہ
 جار ڄملرنده تیجان، وڃیران دینلور. قوسڪ ڄمی قسی ڪلور.
 اصلی قووس اولوب اعلال اولندرق قافڪ وسینڪ کسرہ لری
 ویاہ مشدده ایلہ قسی اولمشدر. بحرك ڄمی بحور ڪلدیکی کبی
 بحار وایجر دخی ڪلور. یدڪ ڄمی ایدی وڄع الجمی ایادی ڪلور.
 حرف اولی مفتوح و حرف ثانسی مضموم اولان اسملرك ڄمی
 کسر فا ایلہ فعل صیغہ سی اوزره ڪلور: رجل، رجال، سبع،
 سبع کبی. ساثر ثلاثی اسملرك ڄملری اکثریا قمع همزه ایلہ افعال
 صیغہ سی اوزره ڪلور. سمر، اسمار، قفل، اقفال، طرف،
 اطراف، احد، آحاد، عنق، اغناق کبی. بثرڪ ڄمندی قلب
 وتخفیف ومد ایلہ آبار دینلور. كذلك رایك ڄمی دخی آرا ڪلور.
 درعك ڄمی اوچ وجهله ڪلور. یعنی ادراع، یاخود دروعورانك
 ضمیله ادرع دینلور. ریمك ڄمندی دخی اریاح، یاخود ریاح دینلور.
 اذنك ڄمی اغناق کبی ڪلور. فقط همزه تخفیف ومد ایلہ اذان
 دینلور.

ثلاثینك مؤنثلری

مفرد —	بلده	نعمت	رتبه	رقبه
جمع —	بلاد	نعم	رتب	رقاب

آخرنده علامت تائیت اوله رق الف مقصوره یا خود الف

مدوده بولنان اسملر

مفرد — اثی صحرا

جمع — اناث صحاری

صحاری بویله یا ایله یازیلور ویا ایله اوقونور. لکن الف ایله اوقونق دخی جائزدر. كذلك دعوی وفتوی لفظلرینک جملری دعاوی وفتاوی کلور وایکیسندده دخی واوک کسر وقعی جائز اولور .

اولنده میم زائد بولنان اسملر

مفرد — مکتب معنی مسجد مسطر

جمع — مکاتب دعائی مساجد مساطر

ایکنجی حرفدن صکره الف زائده سی اولان اسملر

مفرد — زمان کتاب سؤال

جمع — ازمنه کتب اسئله

غزال و غلامک جملری غزلان و غلمان کلشدیر .

ایکنجی حرفدن صکره یا ویا خود واو زائده سی اولان اسملر

مفرد — طریق عمود

جمع — طرق اعده

ضمیر کی بعض اسملر ضمائر وزنی اوزرنده جهلنورلر

مؤثر

مفرد — مسئله مسعات

جمع — مسائل مساعی

كذلك مؤث

مفرد — عامه رساله كتيبه مزیت

جمع — عام رسائل كتابت مزایا

فاعل وزنده اولان اسملك مذکر ومؤثری فواعل صیغه سی

اوزره چملنور . جامع جوامع ، عاطفت عواطف ، ناحیه نواحی کبی .

ایکی حرف زیاده اولئر

مفرد — سلطان مکتوب مفتاح ینبوع

جمع — سلاطین مکاتیب مفتاح ینابع

رباعی اسملك جعلری

مفرد — کوبک درهم اصبع

جمع — کواکب دراهم اصابع

صفت مشبهلرک جمع مکسرلری

ثلاثی

مفرد — صعب جلف حر بطل

جمع — صواب اجلاف احرار ابطال

شينك ڄمى شيوخ واشياخ وظيفك ڄمى ضيوف ، اضياف
وضيفان دخی ڪلور . بطل وزنده اولئرڪ دخی ڄملری بعضاً
صماب وزنده ڪلور : حسن ، حسان ڪبي.

زائد حرفلری اولئر

مفرد — جبان شجاع عجوز

جمع — جبناء شجيمان عجائز

فعل وزنده اولئرڪ ڄملری بعضاً فعال وبعضاً افعال وزنی
اوزره ڪلور: جيد ، جیاد ، میت اموات ڪبي . فعیل وزنده
اولان صفت مشبهلر لسان عثمانیده ڪثیر الاستعمال اولدینی حالده
ڄملری مختلف صیغهلر اوزره ڪلور :

مفرد — ڪریم شریف صديق مریض نظیر

جمع — ڪرام شرفاء اصداقاء مرضی نظائر

ڪریڪ ڄمى ڪرما وشریفڪ ڄمى اشراف دخی ڪلور .

فعیلك ایکنجی حرفیله حرف اخیری برجنسدن اولدینی
حالده اصداقاء وزنی اوزره ڄمئلندڪده ادغام ایله ایکیسی برحرف
اولوب اوزرینه تشدید قونور : حیب احبا وخیل اخلا ڪبي.
مرضی وزنده دخی بوقاعده جاری اولور : شتیت شتی ڪبي .

مفرد — اجر احور ابیض حراء

جمع — جر حور بیض جر

اجرڪ ڄمى حیران دخی ڪلور .

مفرد — عطشان عطشى

جمع — عطاش عطاش


سكران وكسلان كلمه لرینك جمی سكارى ، وكسالى كلور .

خاتمه

بالاده مسطور اولان امثله اكثريت اوزره مستعمل اولان
جمع مكسر صیغدلریدر . لکن هر ماده ده مطرد ازله رق كلزلر .
وبونلر بر قاعده مطرده آلتنه آلتنه مازلر . ايمدی لدى الحـاجـه
كتب لغته مراجعت اولنمق لازم كلور .

الحمد لله على حسن الختام والصلاة على سيد الانام وعلى آله
واصحابه الكرام والسلام

مطبعة عامره



TBMM KUTUPHANESI